


159-2



PRIMI TOMI
S E X T A
CONTROVER-
SIA GENERALIS,

DE ECCLESIA, QVÆ
EST IN PVRGATORIO,

DV OBVS LIBRIS
explicata.

A R. P. ROBERTO BEL-
LARMINO POLITIANO
Societatis IESV.

PRIMI TOMI
S E X T A
C O N T R O V E R
S I A G E N E R A L I S .

DE ECCLESIA QVAE
EST IN PREGATORIO

DVORVS LIBRIS
explicata.

A R . P . R O B E R T O B E L L I
L A R M I T O P O L I T I C O
Societate 1727.

INDEX

LIBRORVM ET
CAPITVM.

LIBER PRIMVS,
De Purgatorio.

PRÆFATIO.

- CAP. I. De nomine Purgatorij.
- II. De erroribus circa Purgatorium.
- III. Purgatorium esse probatur ex Scripturis Testamenti veteris.
- III. Purgatorium esse probatur ex Testamento nouo.
- V. Afferitur Purgatorium testimoniis Conciliorum.
- VI. Afferitur Purgatorium testimoniis Patrum Græcorum & Latinorum.
- VII. Idem afferitur ratione.
- VIII. Soluuntur argumenta ex Scripturis.
- IX. Soluuntur obiectiones ex Patribus.
- X. Soluuntur obiectiones ex ratione de præcepto.
- XI. Purgatorij confessionem ad fidem Catholicam pertinere.

LIBER SECVNDVS,
De circumstantiis Purgatorij.


- CAP. I. De personis quibus Purgatorium conuenit.
- II. In Purgatorio non posse animas mereri vel peccare.

2 INDEX LIBRORVM ET CAP.

- III. *Soluuntur obiectiones.*
III. *Animas in Purgatorio certas esse de sua aeterna salute.*
V. *Soluuntur obiectiones.*
VI. *De loco Purgatorij.*
VII. *Sitne post hanc vitam aliquis locus pro animabus iustis prater Cælum & Purgatorium.*
VIII. *Num ex receptaculis suis anima defunctorum egredi valeant.*
IX. *De tempore quo durat Purgatorium.*
X. *Qualis sit Purgatorij pœna.*
XI. *Ignem Purgatorij esse corporeum.*
XII. *Sciri non posse quomodo ignis corporeus animas urat.*
XIII. *An in Purgatorio torqueantur anima à Demonibus.*
XIV. *De gravitate pœnarum.*
XV. *Suffragia Ecclesia defunctis prodesse.*
XVI. *Quot sint genera suffragiorum.*
XVII. *Quis possit animas iuuare.*
XVIII. *Quibus prosint suffragia.*
XIX. *De funere.*



LIBER



LIBER PRIMVS DE PURGATORIO.

PRÆFATIO.

DISSERVIMVS HACTENVS
de ea parte Ecclesia qua est in terris:
Nunc de ea disputandum est, qua de-
git infra terram; disputaturi ultimò
de illa, qua regnat in cælis; & quoniam fideles iam
defuncti, necdum beati, & corpore, & animo sunt
infra terram, diuersis in locis, ideo primùm de lo-
co animarum dicemus; secundo de loco corporum,
id est, de sepultura.

Sed antequam ad quæstiones veniamus, tria
præmittenda sunt. PRIMO, quid nomine Pur-
gatorij hoc loco intelligamus. SECUNDO, qui
fuerint errores de Purgatorio. TERTIO, quo or-
dine sit explicanda hæc disputatio.

Scriserunt autem de Purgatorio Ioannes
Roffensis contra articulos Lutheri; Ioannes Ecki-
us lib. 4. de Purgatorio; Ioannes Bunderius in suo
compendio, titul. 18. Ioannes Garetius libro de o-
ratione pro defunctis; Iacobus Latomus in expli-

4 INDE PRÆFATIO.

catione artic. sexti Lonanienſium; Iodocus Clich-
tous in libro de Purgatorio; Bernardus Lutzen-
burg. lib. unico de Purgatorio; Alphonſus de Ca-
ſtro, verbo, Purgatorium; Martinus Peresſus Aia-
la de traditionibus; Claudius Couſſord contra
VValdenſes; Caietanus tomo 1. tractat. 23. & 24.
Franciſcus Orantiuſ libro 5. de locis Catholicis;
Hugo Etherianuſ de reſſu animarum, ab
inferis; Catharinuſ libro de veri-
tate Purgatorij.



CAPVT

CAPVT PRIMVM.

De nomine Purgatorij.

TRIASCRIPTEVRIS INVENIANTVR, QUI-
bus tribuitur purgatio peccatorum, & pur-
gatoria dici possunt. PRIMO, Christus ipse,
de quo dicitur Hebr. i. *Purgationem peccato-
rum faciens.* Ioan. i. *Ecce agnus Dei, ecce qui
tollet peccata mundi.* Sed de hoc non loqui-
mur, tum quod nõ soleat Christus vocari Purgatorium, tum
quod sit extra controuersiam cum purgatore peccatorum
esse.

SECUNDO, tribulationes huius vite, de quibus ad litteram
videtur intelligendus Malachias, cap. 3. *Ipse sedebit quasi ignis* 20
*conflans, & quasi herba fullonum, & purgabit filios Levi, & co-
labit eos quasi aurum, & quasi argentum.* Nam, vt rectè expo-
nit B. Hieronymus, hic agitur de tribulatione, quæ præcedit
diem iudicij ad purganda peccata fidelium. & Ioan. 15. *Omne*
palmitem in me non ferentem fructum, tollet eum, & omnem,
qui ferit fructum, purgabit, & fructum plus afferat. De hoc Pur-
gatorio non loquimur, tum quod sit extra controuersiam,
tum etiam quod non semper tribulatio huius vite sit purga-
toria. Nam multi iniusti affliguntur, non vt purgentur, sed vt
exerceantur, & probentur iuxta illud Ecclesiastici 27. *Vasa* 30
siguli probat fornax, & homines iustos tentatio tribulationis. Et
multi iniusti affliguntur, non vt purgentur, sed vt incipiant
damnationis suæ poenas gustare.

Vocatur ergo TERTIO Purgatorium, locus quidam, in
quorūquam in carcere post hanc vitam purgantur animæ,
quæ in hac non plenè purgatæ fuerunt, vt nimirum sic pur-
gate in celum ingredivaleant, quod nihil intrabit coinquina-
tum. De hoc est tota controuersia.

MULTI & inter se contrarij errores fuerunt de Purgatorio. PRIMVS omnium, qui aliquid sensit contra Purgatorium, videtur fuisse Aërius, qui teste Epiphanio, hæc. 75. & Augustino hæc. 53. docuit, non esse pro defunctis orandum. Hinc enim sequitur, aut eos non egere precibus, aut non posse iuari, quorum vtrumque Purgatorio repugnat, saltem eo modo existenti, quo ab Ecclesia ponitur.

Disertè autem Purgatorium negauerunt VValdenses, vt Guido Camelita, in summa de hæreticis, & B. Antoninus 4. parte, tit. II. cap. 7. §. 2. summæ Theologiæ referunt.

Idem docuerunt Apostolici apud B. Bernardum serm. 66. in Cantica. & fortè VValdenses proles sunt Apostolicorum; nam in erroribus, qui eis tribuuntur, conueniunt, & tempore sunt vicini. Nam VValdensium secta exorta est circa annum Domini M. C. LX. iuxta Trithemij Chronicum, vel ²⁰ M. C. LXX. iuxta Guidonem in sua summa, cap. 1. & Reynierum, qui floruit ante annos CCC. cuius testimonium vide in fine libri Claudij Cusfordij contra VValdenses. Apostolici autem sunt paulò antiquiores, nam exorti sunt tempore B. Bernardi, qui obiit anno M. C. LIII. vocari autem voluisse Apostolicos, etiam ipsos VValdenses, quòd Apostolorum paupertatem sectarentur, manifestum est ex historia ipsorù, apud Æmilium lib. 6. de gestis Francorum, & Abbatem VVspersensem in Chronico anni M. CC. XII.

Idem cum VValdensibus docuerunt eodè tempore Henricus & Petrus Bruis, contra quos scribit B. Bernardus epist. 240. & Petrus Cluniacensis in epistola ad omnes Episcopos.

Idem postea docuerunt Albigenes, qui tamen non solum Purgatorium, sed etiam infernum tollebant, testis B. Anton. 4. part. tit. II. cap. 7. §. 5.

Idem tribuit VViclefistis, & Hussitis Bernardus Lutzenburgensis in præfatione libri sui de purgatorio, sed fortasse falso, cum nihil tale eis tribuat Concilium Constantiense, nec Thomas VValdensis, Æneas autè Syluius, qui inter errores Hussitarum hunc etiam numerat lib. de origine Boëmorum, cap. 35. videtur cõfundere Hussitas cum VValdensibus.

Idem

Idem tribuitur Armenis & Græcis à Guidone Carmelita in Summa de hæreticis, & quanquam Græci ipsi in Concilio Ferrariensi, sess. 1. affirmabant se non negare Purgatorium, sed ignem tantum, & existimare Purgatorium esse locum tenebrososum, & laborum plenum, tamen credibile est Græcos de hac hæresi saltem suspectos fuisse; nam B. Thomas in opusculo contra Græcos refellit etiam hunc errorem, & probat, Purgatorium esse; & in Concilio Florentino, sess. vlt. damnatus est idem error, cum tamen in eo Concilio solum damnati sint errores Græcorum, aut certè de quibus 10 Græci suspecti erant.

Denique Lutherus, & omnes posteriorius, licet in varias sectas dissecti, in hoc tamen conveniunt, ut Purgatorium tollant, quanquam Lutherus ipse valde varius fuit. Nam PRIMO, Purgatorium planè Catholicè admittebat; nam in disputatione Lipsica, quæ adhuc existat: *Ego, inquit, qui credo fortiter, immò ausim dicere, scio Purgatorium esse, facile persuadeor in Scripturis de eo fieri mentionem.*

DEINDE, Purgatorium admittit quidem, sed multis admittit erroribus. PRIMVS error fuit, Purgatorium non posse probari ex Scripturis. SECUNDVS, animas in Purgatorio non esse certas de salute consequenda. TERTIVS, animas in Purgatorio posse mereri, & demereri. QUARTVS, animas in Purgatorio sine intermissione peccare, dum horrent pœnas, & requiem quærunt. QVINTVS, animas, quæ liberantur per suffragia Ecclesie, minus beari, quàm si per se satisfecissent. Isti quinque habentur inter articulos à Leone damnatos in fine.

VLTIMO, simpliciter sustulit Purgatorium, suffragia pro defunctis, & asseruit nullum esse Purgatorium post hanc vitam, sed solum in vita, & in morte; horror enim, & pœna mortis purgat, si quid purgandum superest. Ita docuit in lib. de abroganda Missa priuata, ubi dicit, melius esse in totum negare Purgatorium, quàm credere B. Gregorio referenti animarum apparitiones, suffragia petentium. & in libro ad Valdenses de Eucharistia: *Cum, inquit, negatis Purgatoriu, damnatis missas, sigillas, cœnobîa, monasteria, & quicquid per hæc imposturam erectum est, per omnia etiam probo.*

Hoc vltimum sequuti sunt omnes hæretici huius temporis. Lutherani rigidi, ut Centuriatores, Cent. 1. lib. 2. cap. 4.

col. 460. & Cent. 4. cap. 4. col. 304. Lutherani molles, vt Philippus in locis capite de satisfactione, & Brentius in Confessione VVirtemberg. capite de Purgatorio. Item Zvingliani apud Cochläum in actis Lutheri anni M. D. XXVI. Item Bernardinus Ochinus in Dialogo de Purgatorio. Caluinus lib. 3. Instit. cap. 5. §. 6. vbi dicit Purgatorium esse exitiale Satanae commentum, quod Christi crucem euacuat; quod contumeliam non ferendam Dei misericordiae irrogat, quod fidem nostram labefacit, & euertit. Petrus Martyr in cap. 3. prima ad Corint. duo dicit. PRIMO, siue sit, siue non sit Purgatorium, certè non esse dogma fidei. SECUNDO, dicit nec esse probabile Purgatorium existere. Denique Anabaptistae Trinitarij lib. 2. cap. 1. exiis, quos nuper ediderunt anno M. D. LXXII. dicunt Lutherum iecisse fundamentum reformationis Ecclesiae, cum Purgatorium, Missas, & similia sustulit: *Fundamentum omnium Lutheranorum est, quia tollunt satisfactionem, & discrimen peccati mortalis à veniali; isto enim fundamento posito, necessario sequitur nullam esse Purgatorium.*

Porto non defuerunt, qui adeo Purgatorium probant, vt nullas pœnas nisi purgatorias post hanc vitam agnouerint. Ita Origenes sentit, qui omnibus impijs hominibus, & daemionibus tandem salutem pollicetur, vt refert Epiphanius in epistola ad Ioannem Hierosolymitanum, & Augustinus lib. 21. de ciuitate Dei, cap. 17. vbi addit aliorum opinionem, qui non quidem daemionum, sed hominum tamen omnium pœnas solum purgatorias agnoscebant, & eodem lib. 21. cap. 13. dicit eandem sententiam Platoniorum fuisse, nullam videlicet esse pœnam post hanc vitam, nisi purgatoriam, & probat ex illis Virgilij versibus in 6. Aeneidos:

30 *Quin & supremo cum lumine Vita reliquit,
Non tamen omne malum miseris, nec funditus omnes
Corporea excedunt pestes, penitusq; necesse est
Multa diu concreta modis inolescere miris.
Ergo exercentur pœnis, veterumq; malorum
Supplicia expendunt, &c.*

Quamquam in ipsius Platonis operibus aliud legimus nam in Phaedone, & in Gorgia, tria facit hominum generum, qui ad iudicium euocantur post mortem. VNUM eorum, qui pie iusteq; vixerunt, & hos statim ad insulas beatorum

rum transmitti dicit. ALTERVM eorum, qui peccata curabilia perpetrarunt, & hos asserit ad tempus exercei pœnis, donec scelus eluatur. TERTIUM eorum, qui peccata incurabilia commiserunt, & hos dicit in tartarum deiici in æternum puniendos, quorum supplicia ipsis quidem nihil profunt, sed aliis tamen profunt ad exemplum. & Virgilius quoque id non tacuit, vbi ait Æneid. 6.

--- Sedet, æternumque sedebit

Infelix Theseus Phlegiasq; miserimus, omnes

Admonet, & magna restatur voce per Umbras,

Discite iustitiam moniti, & non temnere Divos.

10

Ac de his satis.

Disputatio tota decem capitibus continetur. PRIMO, ostendemus esse Purgatorium. SECUNDO, id fide tenendum, TERTIO, quibus personis conueniat, an iustis, an peccatoribus omnibus, an quibusdam tantum. QUARTO, de statu eorum qui sunt in Purgatorio, an videlicet certi sint de salute. QUINTO, possintne mereri ac demereri. SEXTO, de loco Purgatorii. SEPTIMO, de tempore quo durat. OCTA VO, de ipsa pœna, qualis sit, & à quibus infligatur. NONO, de remedio pœnæ. DECIMO, de sepultura corporum.

CAPVT TERTIVM.

Purgatorium esse probatur ex Scripturis Testamenti veteris.

P R I M V M igitur Purgatorium esse, quinque generibus argumentorū probabimus. Afferemus enim primò, Scripturas Testamenti veteris. Secundò, Scripturas Testamenti noui. Tertio, Concilia. Quarto, Patres. Quintò, rationes, & tum demum soluemus argumenta. PRIMVS locus habetur 2. Machab. c. 12. vbi postquam Scriptura narrauit Iudam Machabæum misisse in Hierusalem 12000. drachmarū argenti in sacrificia pro mortuis expendenda, subiungit: *Sancta ergo & salubris est cogitatio pro defunctis exorare, ut à peccatis soluantur.*

Hinc enim sequitur. PRIMO, posse mortuos post hanc vitam à peccatis solui, & proinde esse Purgatorium. SECUNDO, sacrificia, & orationes viuorum prodesse defunctis. TERTIO, non expiari semper in morte omnes peccatorum reli-

reli-

reliquias, vt Lutherus dicit; nam isti pro quibus orari iussit Iudas, mortui erant morte violenta, & pro religione, tamen credebatur Iudas adhuc illos non plenè esse purgatos. **QUARTO**, posse hominem sanctè & piè mori, & tamen habere debitum aliquod soluendum, vel propter venialia peccata non remissa in vita, vel propter satisfactionem pro mortalibus remissis non plenè expletam; nam Scriptura hoc loco dicit eos, pro quorum peccatis iussit orari Iudas, cum pietate dormitionem accepisse. **QUINTO**, hoc esse de fide.

10 Ad hunc locum respondent aduersarij. **PRIMO**, librum hunc non esse canonicum, cum auctor ipse in fine libri veniam petat, si qua in re errauerit: *Ergo*, inquit Brentius, *demus illi veniam quòd errauerit, cum suffragia pro defunctis laudauit.*

SECUNDO, quia saltem hæc pars non potest esse canonica (*sanctè & piè de resurrectione cogitans, nisi enim eos qui ceciderant resurrecturos speraret superfluum videretur, & vanum pro defunctis orare*) continet enim exploratum errorem quod nimirum animæ cum corporibus moriantur & resurgant, **20** alioqui non esset superfluum & vanum orare pro mortuis, etiamsi non resurgerent. Addit Ochinus, ex hac ipsa particula tolli posse Purgatorium; nam si Purgatorium esset, etiamsi resurrectio mortuorum non esset, non tamen fuisset vanum orare pro mortuis, quia profuisset illis oratio ad liberationem à pœnis Purgatorij.

TERTIO, quia illa conclusio: *Sancta ergo & salubris est cogitatio, &c.* non videtur historico conuenire, & fortè erat annotatio aliqua marginalis, & inde in textum violenter intrusa est.

30 **QUARTO**, quia non fit mentio in hac Scriptura Purgatorij, sed solùm resurrectionis, dicitur enim Iudas iussisse orare pro mortuis, sanctè & piè de resurrectione cogitans.

QUINTO, quia sacrificia, & orationes iubentur fieri à Iuda Machabæo pro illis, quos constabat in peccato mortali decessisse; nam ibidem habemus reperta fuisse tunicis omnium illorum occisorum quædam de donariis idolorum, quæ illi rapuerant contra expressam prohibitionem, Deut. 7. *Inuenerunt, inquit, sub tunicis interfectorum de donariis idolorum, quæ apud lamniam fuerunt, à quibus lex prohibet Iudæos:* Omnibus ergo manifestum factum est, ob hanc causam eos

corruisse, ergo vel superstitiosum fuit factum hoc Iudæ, vel non orarunt vt animas illas iuuarent, sed solùm vt seipfos consolarentur.

SEXTO, quia non sequitur, oratum & sacrificatum est pro mortuis, ergo erant in Purgatorio; nam potuerunt, pro quibus orabatur, esse in inferno, & potuerunt qui orabant, orare & sacrificare, vt piùm erga eos affectum, & memoriam ostenderent, & seipfos consolarentur.

SEPTIMO, quia Scriptura ista non profert legem aliquam, aut decretum, sed solùm vnius hominis exemplum, non tenemur autem imitari, immò nec possumus, omnia exempla Scripturarum. Neq; obstat quòd laudatur hoc loco exemplum Iudæ; nam in eodem libro laudatur exemplum Razæ, qui se occidit, 2. Machab. 7.

Ad PRIMVM dico, librù Machabæorum non esse Canonicum apud Iudæos, sed apud Christianos esse. siquidem Ecclesia vniuersa legit hunc librum in Missa, & legebat iam olim, vt patet ex epistola Petri Cluniacensis cõtra Petrobrufianos, & tamen prohibitum fuerat in Concilio III. Carthaginens. can. 47. ne vllus liber legeretur in Ecclesia sub nomine diuinorum librorum, nisi canonicus esset. Præterea eum numerat cum diuinis libris, ex Conciliis Carthaginens. III. can. 47. ex Pontificibus, Innocentius I. in epistola ad Exuperium, cap. vlt. ex Patribus, Augustinus lib. 18. de ciuitate Dei, cap. 36. vbi sic ait: *Libros Machabæorum non Iudæi, sed Ecclesia pro canonicis habet.*

Ex quibus testimoniis refellitur mendacium impudentissimum Ochini, qui in Dialogo de Purgatorio sic ait: *Quod apocryphis sint, ex Laodicensi, & Africana Synodo manifestum est, immò ex omnibus sacris Doctõribus, qui sacrorum librorum catalogum percensentes, de Machabæicis nullam mentionem faciunt.* Hæc ille. Qui quàm apertè mentiatur, facilè cognoscet, qui legerit Carthaginense Concilium III. quod Ochinus Africanum vocat, & præterea Innocentium loco citato, Augustinum lib. 2. de doct. Christ. cap. 8. Gelasium in decreto de libris canonicis, quod edidit in Concilio LXX. Episcoporum; Isidorum lib. 6. etymologiarum, cap. 1. aliosq; Patres à nobis citatos lib. 1. de verbo Dei, cap. 15.

Respondet Petrus Martyr in cap. 3. primæ Corint. ab Augustino, & Ecclesia ipsa hunc librum receptum in Canonem,

non

non eorum librorum, qui valent ad confirmanda dogmata, sed eorum qui valent ad morum adificationem. & probat, quia Augustinus lib. 2. contra epistolam Gaudentij, cap. 23. dicit hunc librum non esse paræ auctoritatis cum lege, Prophetis & Psalmis, sed tamen vtilem esse si sobriè legatur. Item, quia Cyprianus in expositione symboli dicit hos libros non valere ad probanda dogmata.

At perfidè agit Pseudomartyr, nam Augustinus adeo putabat hunc librum valere ad confirmanda dogmata, vt lib. 1. de cura pro mortuis, cap. 1. ex solo hoc libro argumenta petat ad probandum orandum esse pro mortuis. & hoc esse dogma fidei idem Augustinus docet, cum in libro de hæresibus, cap. 53. ponit Aërium in numero hæreticorum, quia negauerat orationes pro defunctis. In 2. autem lib. contra Gaudentium, cap. 23. non dicit eos libros non esse pares Psalmis, Legi, & Prophetis, in Ecclesia, sed apud Iudæos. *Et hanc quædam Scripturam, inquit, quæ appellatur Machabeorum, non habent Iudæi sicut legem, & Prophetas, & Psalmos, sed recepta est ab Ecclesia non inuuliter, si sobriè legatur, & laudatur.* Ex quo apparet insignis fraus Martyris. Quod autem Augustinus dicit, debere sobriè legi, non ideo dicitur, quia sint in hoc libro aliqui errores, sed propter exempla eorum, qui se occiderunt, quæ in hoc libro narrantur, & imitanda non sunt; quomodo etiam Genesis sobriè legenda est, ne putemus imitandum factum Iudæ Patriarchæ, qui incestum perpetravit.

Deceptus est autem idem Martyr, cum Cyprianum pro Ruffino adduxit; illa enim Symboli explicatio, Ruffini est, non Cypriani, vt patet ex præfatione, vbi auctor indicat, se esse Aquileiensem, & Aquileiæ baptizatum, & educatum, & ibidem meminit Photini hæretici, qui centum annis Cypriano posterior fuit; & vbi libros sacros enumerat, ibidem meminit Donati, Manichæi, Arii, Eunomij, aliorumq; hæreticorum, qui post Cypriani obitum exorti sunt. Neq; mirum esse debet, si Ruffinus hos libros non esse canonicos putauit; nam libri Machabeorum sunt eorum numero, de quibus aliquando etiam inter Catholicos dubitatum est, & postea tamen ab vniuersa Ecclesia, tanquam verè canonici, recepti sunt.

Ad probationem dico, auctorem non petere veniam er-
rorum, sed elocutionis, quomodo etiam B. Paulus excusat
sermonis sui imperitiam.

Ad SECVNDVM dico, ideo videri ineptam sententiam
huius libri, quia non obseruatur apud Iudæos olim fuisse
vsitatissimum, habere pro eadem quæstione illam de resur-
rectione, & illam de animorum immortalitate, etsi reuera
distinctæ sunt. Nam apud Iudæos, qui negabant vnum, ne-
gabant alterum, vt Sadducæi; & qui vnum fatebantur, fate-
bantur alterum, vt Pharisæi, vt patet Act. 23. Nec immeritò; 10
nam cum anima rationalis sit vera forma corporis, & proin-
de vera pars hominis, non est verisimile, Deum voluisse ani-
mam perpetuò viuere sine corpore. Hinc Dominus Matth.
22. probaturus Sadducæis resurrectionem, vtitur illo testi-
monio Scripturæ: *Ego sum Deus Abraham, Deus Isaac, Deus
Iacob; & subiungit: Non est Deus mortuorum, sed Sumentium.* ex
quibus inferre intendit, ergo mortui resurgunt.

At hoc argumentum nihil concludit, nisi præsuppona-
tur, quæstionem de immortalitate animorum, & de resurre-
ctione corporum accipi pro vna & eadem; posset enim alio- 20
qui negari consequentia. Nam Deus erit Deus viuentium,
etiam si mortui non resurgant, quandoquidem animi ipsi
viuunt. PARI ratione Apostolus cum ait 1. Cor. 15. *Quid mi-
hi prodest, si mortui non resurgunt? comedamus, & bibamus, cras
enim moriemur;* nisi præsupponat animas esse mortales, si
corpora non resurgunt, nihil concludit. Nam si animus est
immortalis, etiam si corpora non resurgant, multum prode-
rit ieiunare, & bene viuere, quia proderit ad gloriam animæ
acquirendam. Scriptura ergo libri Machabæorum loquitur
omnino eodem modo, quo hic B. Paulus, & idem præsuppo- 30
nit. Vult enim dicere; Si mortui non resurgunt, inde sequi,
animas esse mortales, & proinde superfluum & vanum orare
pro mortuis, nisi speretur resurrectio.

Ad TERTIVM dico, in textu Græco nō haberi particulam,
Ergo; sic enim legimus: *ἐτ' ἐμὴ λέγω τοῖς μετ' ἐνσε-
θεαυρισμένοις καὶ λίσσονται κείνων χειρῶν,
δοῦναι ἢ εὐσεβῆς ἢ ἐπίνοια, ὅθεν περὶ τῶν τεθνηότων ὄν-
ἐξίλασμον ἐπέσαστο, τῆς ἀμαρτίας ἀπ' αὐθνήων.* hoc
est; *Deinde consideratis, is, qui cum pietate obdormierant optimā
reposit-*

repositam gratiam, quae sancta & pia consideratio fuit, ideo pro mortuis expiationem fecit, ut à peccato soluerentur. Tamen sensus est omnino idem. Nec potest reiici Latina lectio, quin reiiciatur etiam Graeca. Neque est insolitum historicis, aliquid interdum colligere ex rebus gestis, quod ad imitationem, & bonos mores pertineat.

Ad **QVARTVM** dico, non esse necesse fieri mentionem expressam Purgatorij, cum satis apertè colligatur ex iis, quae hic habentur. Non enim de nomine, sed de re ipsa contendimus. Neque verò cum dicitur, Iudas iussisse orari pro mortuis, bene & religiosè de resurrectione cogitans, sensus est, iussisse eum orare pro mortuis, ut resurgerent, sed est sensus, Iudam cum religiosè cogitaret resurrectionem futuram, & proinde animas esse immortales, & formidaret, ne animæ interfectorum militum suorum, propter peccatum aliquod, in alio seculo punirentur, iussisse pro eis orari & sacrificari, ut à peccatis soluerentur, ut in fine capitis exprimitur.

Ad **QVINTVM** dico, peccatum illorum aut fuisse veniale, quia forè ignorabant legis prohibitionem, & non acciperunt ex donariis illis in honorem idolorum, sed solum ditescendi cupiditate, quae venialis esse potest, aut certè si mortale fuit, in mortis articulo milites illos doluisse de peccato, & quoad culpam remissum illis fuisse, iuxta illud Psalmi 77. *Cum occideret eos, querebant eum, & reuertebantur;* aut saltem Iudam Machabæum ita existimasse, alioqui non diceret Scriptura, eum considerasse eos, qui cum pietate obdormuerant, optimam habere repositam gratiam. Adde vltimò, saltem incertum fuisse statum illorum, & propterea licuisse pro eis orare, etiamsi damnati fuissent.

Ad **SEXTVM** dico, nostram consequentiã non esse istam, oratum est pro illis, ergo erant in Purgatorio; sed, orarunt pro quibusdam defunctis, ergo existimantur posse fieri, ut illi essent in Purgatorio; vel istam, laudatur in Scriptura oratio pro defunctorum peccatis, ergo Purgatorium est in alia vita; nam alioqui frustra oraretur, & Scriptura erraret laudando eiusmodi orationem. Quod autem hoc loco laudetur oratio pro expiatione peccatorum, & non pro humano affectu ostendendo, patet, tum ex eo, quod occasio huius orationis fuit peccatum illorum mortuorum detectum ob donaria inuenta sub vestibus eorum, ut historia dicit, tum

ex eo,

creo, quod expressè dicitur, Iudas misisse 12000. drachmas offerri sacrificium pro peccatis mortuorum. & infra, ut à peccatis solvantur. ADDE, quòd si nullum esset Purgatorium, liceret quidem flere ad humanum affectum ostendendum; at orare nõ item. quorsum enim oratio pro illis, qui aut non egent, aut iuvari non possunt?

AD SEPTIMUM dico, argumentum non sumi ab exemplo vnus hominis, sed partim ab antiquo & solenni ritu Ecclesiæ Testamenti veteris, partim à testimonio in fallibi scriptoris sacri; quòd enim hic fuerit solennis ritus Ecclesiæ, patet, cum hoc loco dicitur: *Omnes qui cum Iuda erant ad preces conuersos.* & deinde: *Collatione facta,* id est, singulis conferentibus aliquid, collectam esse multam pecuniam, & missam à Iuda, nomine omnium in Hierusalem, ad sacrificia pro mortuis; & hoc quidem magnum est argumentum: sed maius est, & fidem Catholicam faciens, quod sumitur à verbis Scripturæ sacræ laudantis orationem pro peccatis mortuorum tanquam sanctam, piam & religiosam. NEQUE valet instantia de laude Razia, qui se occidit; nam, ut Augustinus ostendit lib. 2. contra epistolam Gaudentij, cap. 23. Razias laudatur, quòd fortiter & viriliter egerit, non quòd piè & sanctè. vel, si volunt probari hoc factum ab auctore huius libri, potius dicendum est, habuisse Raziam peculiarem inspirationem, & præceptum Dei, ut hoc faceret, sicut habuit Samson, teste Augustino lib. 1. de ciuitate Dei, cap. 21. quàm dicendum esset, hunc auctorem potuisse errare. Præter hunc locum sunt alia quædam, quæ solum probabiliter suadent, & quibus tamen S. Patres vsi sunt. Igitur ea quoque hic breuiter annotabimus.

SECUNDVS locus est Iob. 4. *Panem tuum & Vinum super sepulcrum iusti construe, & noli ex eo manducare, & bibere cum peccatoribus.* Huius loci non potest esse alius sensus, quàm is, quem communiter expositores tradunt, videlicet; Instue conuiuium, & voca fideles pauperes, ut ipsi post acceptam eleemosynam orent pro anima defuncti. Hinc enim nata est illa consuetudo, quæ & olim in Ecclesia fuit, & nunc etiam est, ut affines defuncti conuiuium faciant, & mittant etiam cibum & potum pauperibus & religiosis, ut orent pro anima defuncti. CHRYSOSTOMVS hom. 32. in Matth. Cur, inquit, post mortem tuorum pauperes conuocas? Cur Presbyteros, & pro

ei velint orare, obsecras? NEQUE valet quidquam commemo-
rum Munsteri, qui interpretatur nomine sepulcri, ora pau-
perum iustorum, quia scriptum est Psal. 6. *Sepulcrum patens
est guttur eorum, ut sensus sit; Pone panem tuum in ore iustorum,*
ut non moriantur fame. Hæc enim falsa expositio est.
PRIMO, quia nusquam in Scriptura vocatur sepulcrum os
iusti, sed solum os peccatoris, unde exhalant fetores vicio-
rum. SECUNDO, quia Tobias in eodem capite multis verbis
commendauerat pauperes viuos, & deinde transit ad com-

10 mendationem mortuorum, ut in litera patet.

TERTIUS locus est lib. I. Reg. cap. vlt. vbi legimus, quod
habitatores Iabes Galaad audita morte Saul, ieiunauerunt
septem dies. Et 2. Reg. I. Dauid fleuit, & ieiunauit pro Saule
& Ionatha, & aliis occisis, quod idem fecit pro Abner, 2. Reg.
3. Quamuis enim hæc videbantur fieri in signum doloris &
tristitię, tamen credibile est, præcipue facta esse ad iuandas
animas defunctorum, ut Beda exponit in fine commentarij
in lib. I. Reg. id quod ex duobus colligimus. PRIMO, ex eo,
quod irrationabile fuisset, in signum doloris septem dies iei-

20 iunare. SECUNDO, ex eo, quod Dauid 2. Reg. 12. ieiunauit,
& orauit pro filio suo infantulo, dum ægrotaret; postea vero
quando audiuit eum esse mortuum, non amplius ieiunauit;
quo facto suo ostendit, se ieiunare solitum, ut aliquid à Deo
impetraret; ideo enim pro morte pueri non ieiunauit, quia
sciebat, non esse puerum ad vitam rediturum, & præterea
eum suffragiis non egere; quod etiam spectat illa sollicitudo
Patriarcharum, qui cupierunt in terra promissionis sepeliri,
Gen. 47. & 50. nimirum ut essent participes precum & sacrifici-
orum, quæ ibi offerebantur.

30 QVARTUS locus est Psal. 37. *Domine, ne in furore tuo arguas me, neque in ira tua corripas me.* Etsi enim hæc verba
variè exponi possint, tamen B. Augustinus ita exponit, ut in
furore argui à Deo, sit in æternum dampnari; in ira corripì, sit
puniri seuere post hanc vitam, ad correctionem tamen & com-
mendationem. Vnde subdit: *In hac vita,* inquit, *purges me. &
talem me reddas, cui iam emendatorio igne non opus sit, &c.* Eo-
dem modo exponit Beda, Haymo, Dionysius Carthusia-
nus, & alij.

QVINTUS locus est Psal. 65. *Transiimus per ignem & aquam, & eduxisti nos in refrigerium.* Hic etiam locus potest
haberi

habere varios sensus, tamen Origenes homil. 25. in Num. & B. Ambrosius in Psal. 36. & sermon. 7. in Psal. 118. exponit per aquam, Baptismum, per ignem, Purgatorium: *Hic, inquit, per aquam, illic per ignem; per aquam & abluantur peccata, per ignem & exurantur.*

SEXTVS locus est Isai. 4. *Purgabit Dominus sordes filiorum & filiarum Sion, & sanguinem emundabit de medio eorum spiritu iudicij. & spiritu combustionis.* Hunc locum exponit de pœna Purgatorii B. Augustinus li. 20. de ciuitate Dei, cap. 25.

SEPTIMVS locus est Isai. 9. *Succensa est quasi ignis impietas, & vepres & spinas deuorabit.* Basilius in hunc locum dicit, per confessionem peccatum arefieri, vt igne purgatorio post hanc vitam absumi possit, & ex hoc loco probat.

OCTAVVS locus est Mich. 7. *Ne lateas, inimica mea, nam secedi, resurgam, cum sedero in tenebris, iram Domini portabo, donec causam meam iudicet. Adducet me in lucem, & dabo iustitiam eius.* Hunc locum afferri solitum pro Purgatorio, docet Hieronymus in cap. vlt. Isaia, & Glossa ordinaria exponit; iram Domini portabo hinc, vel in Purgatorio.

NONVS locus est Zach. 9. *Tu autem in sanguine Testamenti tui eduxisti gentes tuas de lacu, in quo non est aqua.* Et si enim hunc locum adducunt passim pro liberatione Patrum ex limbo, tamen melius conuenit liberationi animarum ex Purgatorio, quas Christus eduxit, cum eò descendit post mortem suam. PRIMO, quia isti rectius dicuntur in cœti. SECVNDO, quia in Purgatorio non est aqua consolationis, quæ est in limbo, vt patet Luc. 16. de Lazaro: *Hic Verò consolatur.* Vnde Augustinus epist. 99. ad Euodium, & lib. 12. in Gen. cap. 37. contendit, Christum cum descendit ad inferos, non solum Patres inuisisse, sed etiam eos, qui cruciabantur in inferno; id est, in Purgatorio, & multos eorum inde liberasse.

DECIMVS locus est Malach. 3. *Ipse se debet quasi ignis conflagrans, & purgabit filios Leui, & colabit eos, &c.* Hunc locum exponunt de pœna purgatoria Origenes hom. 6. in Exodum, S. Ambrosius in Psal. 36. B. Augustinus lib. 20. de ciuitate Dei, cap. 25. & B. Hieronymus in hunc locum. & quanquam pœna illa purgatoria non est ea, de qua nunc agimus; nam illa purgabit viuentes, nos autem agimus de pœna mortuorum; tamen inde rectè inferitur Purgatorium. Nam ideo tunc præcedet tribulatio grauissima, & postea etiam ignis descendet,

& purgabit celerrimè omnes reliquias peccatorum in hominibus iustis, quia, vt Irenæus etiam notat in fine libri 5. tunc repentè Ecclesia, quæ est in terris, assumenda erit ad sponsum, nec erit tempus purgationis vlteriùs, vt nunc est post mortem ante iudicium.

CAPVT QVARTVM.

Purgatorium esse probatur ex Testamento

noũo.

10



P R I M V S locus est Matth. 12. vbi dicit Dominus, esse quoddam peccatum, quod non remittitur, neque in hoc seculo, neque in futuro. Hinc enim colligunt S. Patres, quædam peccata remitti in futuro seculo per orationes & suffragia Ecclesiæ. ita B. Augustinus lib. 21. de ciuitate Dei, cap. 24. & lib. 6. in Iulian. cap. 5. B. Gregorius lib. 4. Dialogor. cap. 39. B. Beda in cap. 3. Marti. B. Bernardus homil. 66. in Cantica, qui hoc solo testimonio contentus fuit contra hanc hæresim. Item Petrus Cluniacensis in epistola contra Petrobrusianos. Rabanus lib. 2. de institut. Cleric. cap. 44. & omnes Glossæ, vt ordinaria, interlinearis, &c.

20

At contra hunc locum obiicit **P R I M O**, Petrus Martyr, hæc dici per exaggerationem. **R E S P O N D E O**, hoc modo poterimus etiam tollere infernum, & dicere esse exaggerationem, cum dicitur: *Ite in ignem æternum*. Præterea exaggeratio non debet esse inepta, qualis est, cum fit partitio, & vni membro nihil respondet.

S E C V N D O, dicunt aliqui esse comminationem. **R E S P O N D E O** eodem modo.

T E R T I O, obiiciunt alij, Christus comparat peccatum in Spiritum sanctum cum grauissimis peccatis mortalibus, cum blasphemia in Patrem, & in Filium; ergo si vellet dicere, aliqua peccata posse remitti in alio seculo, intelligeret maxime de illis, quibuscum comparabat tunc peccatum in Spiritum sanctum; at hoc est falsum, quia sola venialia dimittuntur, per nos, in alio seculo, &c. **R E S P O N D E O**, Christus loquitur de perfecta remissione, quæ completur remissionem culpæ & pœnæ, quomodo peccata grauissima remittuntur etiam in alio seculo, quia ibi completur eorum remissio.

QVARTVM

QUARTO, inquit, Christus videretur significare, gratiora peccata remitti in futuro seculo, in hoc autem solum leviora, si aliqua ibi remitti vellet, alioqui non diceret; Neque in hoc seculo, neque in futuro, sed è contrario dixisset; Non dimitteretur, neque in futuro, neque in hoc, ut oratio crescat. RESPONDEO, orationem crescere, quia in futuro maius spatium est diluendi peccata, quam hic; & præterea præponitur hoc seculum, quia hic inchoatur, ibi perficitur remissio delictorum.

QUINTO, obiicit Caluinus, Dominus loquitur de remissione culpæ, ergo malè allegatis hunc locum pro remissione pœnæ Purgatorij. RESPONDEO, in Purgatorio remitti etiam culpas saltem veniales; præterea fallum est, loqui Christum de sola culpa. hic enim est sensus; Peccatum in Spiritum sanctum non remittitur in hoc seculo, nec in futuro, neque quantum ad culpam, neque quantum ad pœnam, cum alia peccata vel remittantur in hoc seculo quoad culpam, & in alio interdum quoad pœnam, ut mortalia; vel hic & ibi quoad culpam, & quoad pœnam, ut venialia.

SEPTIMO, inquit Caluinus, in hoc seculo & in futuro, vult dicere; In hoc iudicio & in nouissimo non remittetur, & sic nulla fit mentio Purgatorij. AT CONTRA; nam qui erunt illi, quibus hic non est remissum, & in iudicio remittetur? nõne illi, qui aut venialium purgatione indigebunt, aut solius pœnæ debitores erunt? Qui enim hinc cum iniustitia decedunt, certè in iudicio non absoluentur.

SEPTIMO, obiicit Petrus Martyr, quia ex negatione non sequitur affirmatio in bona Dialectica. non licet inferre, peccatum in Spiritum sanctum non remittitur in futuro seculo, ergo quædam alia peccata in eo remitti possunt. sicut non bene sequitur; Rex Philippus non est Rex Venerorum, ergo aliquis alius est Rex Venerorum. Et confirmat Ochinus; Non potuit Christus dicere; Hoc peccatum non remittetur in hoc seculo, neque in inferno: & tamen non colligeremus inde, quædam peccata remitti in inferno.

RESPONDEO, non sequi secundum regulas Dialecticorum, id quod inferimus ex verbis Domini, sed tamen sequi secundum regulam prudentiæ, quia alioqui faceremus Dominum ineptissimè loquutū. ineptè enim diceret; Hoc peccatum non remittetur, neque in hoc seculo, neque in futuro,

si in futuro nullum remittitur: sicut ineptè loqueretur qui diceret; Rex Philippus non absoluet te, neque in aula Hispaniæ, neque in aula Franciæ. Non autem loqueretur ineptè, si diceret, neq; in aula Hispaniæ, neq; in aula Brabantia. Vnde Ioan. 19. cum dixisset Christus: *Regnum meum non est de hoc mundo.* Intulit Pilatus: *Ergo Rex es tu;* nec respondit Christus, non bene sequi ex negatiuo affirmatiuum, sed approbauit. Neq; valet similitudo allata ab Ochino; nam Christus non potuit dicere; Neq; in hoc seculo, neq; in inferno, nisi ineptè loqui voluisset, tum quia seculum tempus est, infernus verò locus; proinde, non opponuntur, sicut seculum præsens, & futurum: tum etiam, quia in inferno constat nullam fieri remissionem.

OCTAVO, obiiciunt illud: *Neq; in hoc seculo, neq; in futuro,* idem significare, quod nunquam, siue in æternum, vt exposuit Marcus, qui cap. 3. ait: *Non habet remissionem in æternum.* Et sicut Petrus ait Ioan. 13. *Non lauabis mihi pedes in æternum.*

RESPONDEO, non debere exponi Matthæum per Marcum, sed potius Marcum per Matthæum, cum Matthæus pluribus verbis vtatur, cum constet Matthæum copiosius scripsisse, & Marcum fecisse quasi compendium ex Euangelio Matthæi. Neq; ita accepit Marcus vocem, In æternum, sicut Petrus apud Ioannem. Nam ineptè dixisset Petrus; Non lauabis mihi pedes, neq; in hoc seculo, neq; in futuro, cum in futuro non lauentur pedes. Non autem ineptè dixit Dominus apud Matthæum: *Non remittetur neq; in hoc seculo, neq; in futuro.* Itaque Petrus apud Ioannem accepit vocem, *In æternum,* impropiè pro solo tempore huius vitæ, Marcus autem propriè pro toto spatio huius seculi & futuri. Præterea aut Christus dixit, vt habet Matthæus, vel, vt habet Marcus, vel vtroque modo, si primum vel tertium, habeo intentum; si secundum, quanquam hoc non est probabile, tunc Matthæus duce Spiritu sancto, exposuit verba Christi, & nisi ineptè exposuerit, indicauit, in alio seculo dimitti aliqua peccata.

NONO, dicunt esse phrasim Hebraicam. **RESPONDEO,** falsum esse, phrasim quidem Hebraica est illa Petri, *In æternum;* dicunt enim, passim haberi *עלמדין* etiã de rebus temporalibus. At *neq; in hoc seculo, neq; in futuro,* non est propria phrasim Hebræorum. Neque Marcus phrasim Hebraica vitur, sed propriè loquitur.

SECUNDVS locus i. Corinth. 3. vbi Apostolus dicit: *Ipse autem saluus eris, sic tamen quasi per ignem.* Nota in primis, locum istum Apostoli i. Corinth. 3. esse vnum ex difficillimis & vtilissimis totius Scripturæ; nam ex eo statuunt Catholici duo Ecclesiastica dogmata, Purgatorium, & venialia peccata contra hæreticos & hæreticorum fautores, qualis in primis fuit Erasmus, qui annotatione in hunc locum conatur ostendere, nec Purgatorium, nec peccata venialia ex hoc loco statui posse.

Quod sit difficillimus, testatur AVEVS TRINVS libro de fide & operibus, cap. 15. *Diligenter, inquit, oportet attendere, quomodo accipienda sit Apostoli Pauli illa sententia planè ad intelligendum difficilis, sibi ait, Si quis autem superadificat super fundamentum hoc, aurum, argentum, &c.* Et infra: *In his deputanda est quæ Petrus dicit, esse in Scripturis eius quadam difficilia intellectu, quæ non debent homines peruertere ad proprium suum iudicium.* Et cap. 16. *Fateor, inquit, me malle audire intelligentiores atq; doctiores.* Idem repetit q. i. ad Dulcitium.

Nos igitur, vt locum istum diligenter explicemus, exponemus primùm Metaphoram, qua Apostolus vsus est; dein de proponemus, & soluemus difficultates, quæ circa hunc locum occurrunt. Quantum ad PRIMVM, hæc sunt Apostoli verba: *Secundum gratiam Dei, quæ data est mihi, sic sapiens architectus fundamentum posui. Alius autem superadificat, vnusquisque autem videat quomodo superadificet; fundamentum enim aliud nemo potest ponere, præter id, quod positum est, quod est Christus IESVS. Si quis autem superadificat super fundamentum hoc, aurum, argentum, lapides preciosos, lignum, feruum, stipulam, vnuscuiusque opus manifestum erit. Dies enim Domini declarabit, qui in igne reuelabitur, & vnuscuiusque opus quale sit ignis probabit. Si cuius opus manserit, quod superadificauit, mercedem accipiet; si cuius opus arserit, detrimentum patietur, ipse autem saluus erit, sic tamen quasi per ignem.*

Vtitur autem Apostolus in hac sententia similitudine duorum architectorum, quorum vnus super fundamentum lapideum & solidum erigit domum ex preciosa materia, & quæ ignem non timet, qualia sunt aurum, & argentum, lapides preciosi, vt Iaspis, Porphireticus, Parius lapis. Nam ex auro & argento fiunt laminæ, & columnæ, vt de templo Salomonis legimus; ex lapide Pario, & Porphiretico

etiam integri parietes erigi possunt. Alterverò super simile fundamentum, id est, lapideum & solidum, erigit domum more pauperum rusticorum ex asseribus & stipitibus, eamq; regit fœno & stipulis.

Hæc posita similitudine, fingamus vtriq; domui adhiberi ignem, videbimus priorem nihil penitus lædi, & si architectus intus fortasse sit, similiter nihil pati. At posteriorem domum videbimus continuò ignem concipere, & breui tempore totam consumi, & si architectus intus sit, & velit saluus
 10 egredi, videbimus eum exire non posse, nisi per ignem. In quo transitu non quidem morietur, sed tamen barba & capilli non egredientur incolumes, nisi fortasse fiat miraculum trium puerorum, qui in fornace Babylonica non comburebantur. Hæc est similitudo, qua B. Paulus vititur, cum ait: *ipse autem saluus erit, sic tamen quasi per ignem.*

Quantum ad SECUNDVM; quinque sunt difficultates huius loci. Prima, quid intelligatur per ædificantes. Secunda, quid intelligatur per aurum, argentum, lapides preciosos, ligna, fœnum, & stipulas. Tertia, quid intelligatur per diem
 20 Domini. Quarta, quid intelligatur per ignem, qui in die Domini vniuscuiusq; opus probabit. Quinta, quid intelligatur per ignem, de quo dicitur; Ipse autem saluus erit, sic tamen quasi per ignem. His explicatis, sententia erit perspicua.

PRIMA igitur difficultas est; Qui sint architecti, qui superædificant. B. Augustinus libro de fide & operibus, cap. 16. & in Enchirid. cap. 68. & alibi, censet omnes Christianos dici hæc ab Apostolo architectos, & omnes superædificare super fidei fundamentum, vel opera bona, vel mala. Idem mihi docere videntur, Chrysostomus, Theodoretus, Theo-
 30 phylactus, & Oecumenius in hunc locum.

Alij permulti docent, architectos hæc ab Apostolo non vocari, nisi Doctores & Prædicatores Euangelij; ita Ambrosius & Sedulius in hunc locum. Idem insinuat Hieronymus lib. 2. in Iovinianum. Idem recipiunt B. Anselmus & B. Thomas in hunc locum, etiam si priorem sententiam non reiciant. Idem multi recentiores, vt Dionysius Carthusianus, Lyranus, Caietanus, & alij in hunc locum.

Vtraque expositio est bona, & ex vtraq; deducitur assertio Purgatorij & peccatorum venialium, tamen magis literalis est posterior, id quod patet manifestè ex verbis præceden-

cedentibus & sequentibus eius capitis; dixerat enim antea: *Ego plantavi, Apollo rigavit.* Deinde in eodem sensu statim subiungit: *Ego sic sapiens Architectus fundamentum posui, alium autem superædificat.* Et ibidem: *Qui plantat, & qui rigat unum sunt. Vnusquisque autem propriam mercedem accipiet secundum suum laborem; Dei enim sumus adiutores, Dei agricultores estis, Dei ædificatio estis.* Vbi apertissimè comparat se & alios prædicatores Euangelij agricolis, & architectis; populos autem qui docentur; comparat agris & ædificiis. Item in verbis sequentibus iterum loquitur de Doctoribus, cum ait: *Si quis videtur inter vos sapiens esse, stultus fiat, sic sit sapiens.* Et rursum: *Nemo itaque gloriatur in hominibus; omnia enim vestra sunt, siue Paulus, siue Apollo, siue Cephas;* id est, nolite gloriari in Doctoribus & Prædicatoribus vestris, & dicere: *Ego sum Pauli, ego vero Apollo.* Nam omnes sunt vnum, & pro vobis omnes laborant. Itaque sicut dixerat, se plantasse, & Apollinem rigasse, ita nunc dicit; *Ego fundamentum posui prædicans Christi fidem.* Alij autem superædificant docentes ea, quæ ad vitam & mores pertinent, & etiam explicantes latius fidei nostræ mysteria. Et in hac prima quæstione conveniunt nobiscum Calvinus, & Petrus Martyr, atque Ochinus.

ALTERA difficultas est paulò grauior; sunt enim sex sententiæ. Quidam nomine fundamenti intelligunt fidem veram, sed informem. Nomine auri, argenti, lapidum preciosorum, opera bona. Nomine ligni, fœni, stipulæ, peccata mortalia; ita Chrysostomus in hunc locum, quem sequitur Theophylactus.

At hoc defendi non potest. PRIMO, quia, vt Gregorius dicit lib. 4. Dialog. cap. 39. peccata mortalia potius comparantur ferro & plumbo. SECUNDO, quia sequeretur, veram esse hæresim Origenis, quòd omnes saluarentur, quia Apostolus dicit; Saluus erit quasi per ignem.

RESPONDENT Græci; Saluus erit, id est, nunquam penitus confumetur, sed quasi per ignem, quia semper ardebit. Hæc solutio in primis est dura & coacta; deinde est contra omnem usum loquendi Scripturarum. Nunquam enim in Scripturis accipitur nomen Salutis in malam partem, sed semper in bonam, vt in Concilio Florentino ante sessionem primam Latini ostenderunt. Præterea illud (Per) significat

transitum, non mansionem. Non dicit Apostolus: *Salvus erit, sic tamen quasi in igne; sed: Salvus erit quasi per ignem*; id est, ad similitudinem eius, qui euadit mortem transiens per ignem. Denique, ex communi consensu Doctorum. Nam summa consensione volunt alij omnes tam Græci, quam Latini hunc locum intelligi de venialibus peccatis, quorum sententias in quinta difficultate proferemus. Neque verò hinc putet aliquis, Chrysostomum negasse Purgatorium, vel peccata venialia. Nam Purgatorium esse seipsum docet, **10** sed præcipuè hom. 3. in epist. ad Philip. & hom. 69. ad populum Antiochenum. Item peccata venialia concedit hom. 24. in Matth. in hoc verò loco aliter exposuit, vt hæresim Originis refelleret, quæ docet, pœnas Gehennæ non esse æternas, vt patet ex ipsa homilia.

SECUNDA sententia est, nomine fundamenti intelligi Christum, siue fidei prædicationem; nomine auri, argenti, & lapidum preciosorum intelligi Catholicas expositiones; nomine ligni, fœni, & stipulæ intelligi hæretica dogmata, ita videtur docere commentarius Ambrosij, ita etiam Hieronymus exponens illud Isaia 5. *Vt qui coniungitis domum ad domum*. Atq; huc propender Calvinus, Martyr, & Ochinus, qui docent, per ligna, fœnum, stipulas intelligi humanas traditiones & commenta, quæ pugnant cum verbo Dei.

Hæc sententia minus defendi potest, quam præcedens. PRIMO, quia hæretici non saluantur per ignem purgatorium, sed damnantur ad ignem æternum. SECUNDO, quia hæretici non ædificant super fundamentum, quod est Christus, nisi nomine tenus. Omnis enim hæresis quantumcunque de Christo magnificè loquatur, tamen non verum Christum **30** prædicat, sed alium, quem sibi finxit. Neque ista sententia, quam refellimus, est Ambrosij vel Hieronymi. Nam commentarius Ambrosij intelligit nomine ligni, fœni, & stipulæ, hæreses quidem, & falsa dogmata, sed per imprudentiam prolata, & sine pertinacia: dicit enim, eiusmodi Doctores saluos futuros per ignem purgatorium. Hieronymus verò aperte de hæreticis loquitur, sed ex mente aliorum, non sua. cum enim posuisset suam expositionem, subdit: *Quidam autem, inquit, hæc de hæreticis intelligunt, &c.*

TERTIA sententia, nomine fundamenti intelligit fidem viuam: nomine auri, argenti, & lapidum preciosorum intelligit

ligit opera supererogationis: nomine ligni, fœni, & stipulæ intelligit omissionem consiliorum, & affectum quandam carnalem ad bona huius mundi, licitum quidem, sed qui dolorem adfert, cum illa bona amittuntur. Ita B. Augustinus lib. de fide & operibus, ca. 16. quæ sententia vera quidem est, sed non conueniens huic loco, nisi cum illo carnali affectu intelligamus peccata saltem venialia; nam non dantur opera media in particulari, aut ergo ille amor carnalis est bonus, aut malus; si bonus, quare ardebit more stipulæ? si malus, ergo saltem admixtum habuit peccatum veniale. 10

QUARTA sententia est eorum, qui exponunt per aurum, argentum, &c. opera bona, per stipulam, fœnum, &c. peccata venialia: ita B. Gregorius lib. 4. Dialogorum, cap. 39. & alij, quæ bona est, sed alia est melior.

QUINTA est eorum, qui intelligunt per aurum, argentum, &c. bonos auditores; per stipulas, malos auditores. Sunt enim auditores opificium Doctoris, & quidem Doctor saluus erit, sed ex auditoribus alij sic, alij non, &c. Ita Theodoretus, & Oecumenius; at refellitur rectè à Chrysostomo; nam detrimentum tribuitur etiam Architecto, & ipse dicitur ædificare stipulam, ergo non est sola culpa & pœna auditorum. 20

SEXTA sententia, quam omnibus antepoſuimus, est, vt nomine fundamenti intelligatur Christus, à primis prædicatoribus annunciatuſ, quales erant Apostoli, qui fidem Christi & Euangelium detulerunt ad eos populos, qui nihil vnquam de Christo audierant. Hinc enim beatus Paulus ait: *Ego plantauis. & ego ſi sapiens Architectus fundamentum poſui.* Hinc etiam qui primi in aliqua regione fidem prædicant, dicuntur Apostoli eius regionis. Nomine verò auri, 30 argenti, & lapidum preciosorum intelligatur doctrina vtilis & salutaris aliorum prædicatorum, qui eos docent, qui iam fidem receperunt, & docent non solum verbo, sed etiam exemplo, ita vt verè auditores suos ædificent, & promoueant in religione & pietate. Nomine autem ligni, fœni, & stipulæ intelligatur doctrina, non quidem hæretica, vel mala, sed tamen curiosa, inutilis, superuacanea eorum prædicatorum, qui ad Catholicum populum Catholicè concionantur, sed absque eo fructu & utilitate, quam Deus requirit, ita vt sicut priores cū magno merito concionantur, ita

ita isti non solum sine magno merito, sed etiam non sine peccatis venialibus concionentur.

Hæc expositio maximè probatur propter tria. PRIMO, quia (vt ostendimus) nomine ædificantium intelliguntur soli Doctores, ergo nomine operis ipsorum intelligi debet doctrina.

SECUNDO, quia valde conuenit hæc similitudo sic explicata Doctores Corinthiorum. Erant enim plus æquodediti eloquentiæ & Philosophiæ, quæ licet ex se iuuent, tamen interdum impediunt fructum concionum; quocirca Paulus de utroque Corinthios in hac epistola reprehendit.

TERTIO, quia hoc totum caput optimè explanatur, siquidem B. Paulus in hoc capite tres similitudines posuit. PRIMAM, de agricolis plantantibus & rigantibus, qua solum bonos Doctores complexus est. SECUNDAM, de ædificantibus super bonum fundamentum, qua non solum bonos, sed etiam malos Doctores comprehendit. TERTIAM, de corruptoribus templi, qua solos malos contineri voluit, & malos non quomodocunque, sed perfectè malos, vt hæreticos, errores pro veritate, & vitia pro virtutibus docentes, de quibus non dicit, quòd salui erunt, quasi per ignem, sed quòd disperdet illos Deus.

TERTIA difficultas est de die Domini. Aliqui intelligunt nomine diei præsentem vitam, siue tempus tribulationis, in quo discernuntur sæpe boni à malis. ita B. Augustinus libro de fide & operibus, cap. 16. & Gregorius libro 4. Dialog. cap. 39.

Hæc sententia non videtur ad mentem beati Pauli. PRIMO, quia Græcè est dies cum articulo, ἡ γὰρ ἡμέρα, ex quo apparet certum quendam & definitum diem significari, sicut i. Timoth. 4. *Quam reddet mihi Dominus in illa die.* & cap. i. 2. ad Timotheum: *Certus sum, quia potens est depositum meum seruare in illum diem.* & paulò infra: *Det ei Dominus inuenire misericordiam in illa die.*

SECUNDO, quia præsens tempus non dicitur in Scripturis dies Domini, sed dies nostra, sicut contra tempus alterius vitæ dicitur dies Domini, non nostra, vt Luc. 19. *Et quidem in hac die tua, quæ ad pacem tibi.* Luc. 22. *Hæc est hora & Æstra.* Gal. 6. *Dum tempus habemus, operemur bonum.* Psal. 74. *Cum acce-*

vero tempus, ego iustitias indicabo. Sophon. 1. Iuxta est dies Domini magnus. Ioël. 2. Veniet dies Domini, dies tenebrarum & caliginis.

TERTIO, tempore vitæ præsentis non declaratur opus vniuscuiusque quale sit. Tribulationes enim communes sunt bonis & malis, iustis & iniustis.

QUARTO, quia omnes Doctores intelligunt hanc diem esse diem iudicij, licet enim Augustinus & Gregorius docuerint posse diem illam referri ad hanc vitam, tamen in eisdem locis docent, etiam posse intelligi de tempore futuro post hanc vitam. Verùm cum dies iudicij sit duplex, vna dies iudicij particularis, altera dies iudicij vniuersalis, quidam, vt Caietan. & alij, volunt Apostolum loqui de die iudicij particularis. **PRIMO**, quoniam post hanc diem, de quo Apostolus loquitur, aliqui purgandi sunt per ignem; id verò fieri non potest post diem vltimi iudicij.

SECUNDO, quia si hæc dies, de qua Apostolus loquitur, esset dies vltimi iudicij, sequeretur nullum Sanctorum ingredi posse in cælum ante diem iudicij, qui est error damnatus in Concilio Florentino, sessione vltima. Consequentia probatur; Nam in hac die sunt examinanda omnia ædificia, & post examen aliqui statim coronandi, aliqui puniendi; præterea cum nihil inquinatum intret in regnum cælorum, si purgatio à venialibus non fieret, nisi in die vltimi iudicij, omnes qui cum venialibus hinc migrant, expectare debent eam diem, antequam in cælum intrare possent.

TERTIO, quia Græcus textus non habet reuelabitur, sed reuelatur: *ὅτι ἐν πυρὶ ἀποκαλύπτεται*: quoniam in igne reuelatur. Dies autem vltimi iudicij non reuelatur, ergo de die iudicij particularis loquitur, qui singulis diebus, modò vni, modò alteri reuelatur. Omnes tamen veteres videntur accepisse per illam diem, diem vltimi iudicij, vt Theodoretus, Theophylactus, Anselmus, & alij, quorum mihi videtur verissima sententia, quamuis neutra repugnet Purgatorio.

PRIMO, quia vbique in Scripturis dies Domini, significat diem vltimi iudicij.

SECUNDO, quia dicitur in illa die, quo designatur vna quædam certa dies, quo omnium hominum opera simul probantur;

bantur; At dies iudicij particularis nõ est vna, sed multiplex neque in ea probantur omnium hominum opera.

TERTIO, quia dicit Apostolus: *Dies Domini declarabit*, quasi dicat, tunc erunt omnia omnibus manifesta, vt capite sequenti dicit: *Donec Veniat Dominus, qui illuminabit abscondita tenebrarum, & manifestabit consilia cordium*; id autem non fiet, nisi in nouissimo iudicio.

QUARTO, quia sequitur: *Quia in igne reuelatur*. Dicitur enim dies iudicij reuelari in igne, quia vltimum signum, & omnium notissimum erit conflagratio totius mundi, & propterea semper ferè dies iudicij describitur per ignem, vt *Psalm. 96. Ignis ante ipsum procedet. Ioelis 2. Ante faciem eius ignis scourax. 2. Thessal. 1. In reuelatione Domini nostri Iesu Christi de celo, cum Angelis virtutis eius in flamma ignis. 2. Petri 3. Elementa ignis ardore tabescent. Quod si non placeat hinc per ignem accipere ignem materiale, sed ipsum iudicium Dei, vt alij exponunt, adhuc non potest intelligi per hanc diem, nisi dies vltimi iudicij; Nam tunc sensus est, quia in igne reuelatur, id est, quia illa dies erit notissima propter iudicium acerimum & maximum, quod in illa exercebitur, At dies iudicij particularis non est notissima propter iudicium, sed magis propter mortem; Nam ipsum iudicium particulare paucis est notum, nec me mouent argumenta in contrarium.*

Ad PRIMVM dico, post iudicium nouissimum non fore purgatorium, & ided illa verba: *saluus erit, sic tamen quasi per ignem*, non significant saluus erit, dummodò prius transeat per ignem, sed saluus erit, dummodò prius transeat per ignem; siue saluus erit, vt illi qui per ignem transierunt.

Ad SECVDVM dico, si hoc concluderet, sequeretur, etiam si Purgatorium non esset, neminem beatificari, vel damnari, ante diem iudicij; nam Scriptura passim tribuit distributionem præmiorum & pœnarum vltimo iudicio; immodò & examen operum, ac sententiam iudicis, vt patet *Matth. 25. & alibi*. Sicut ergo sententia fertur in morte vniuscuiusque, & tunc incipiunt aliqui puniri, aliqui præmiari; & tamen dicuntur hæc eadem fieri in nouissimo iudicio, quia tunc fient coram toto mundo manifestissime, & cum summo honore iustorum, & ignominia impiorum, ita, &c.

Ad TERTIUM dico, pro vno verbo quod hic habetur in præfenti in Græco, haberi tria in futuro, nimirum φανερόν γενίσεται, ἡμεῖς ἀκλώσει, & πῦρ δοκιμάσει. & valde credibile est etiā illud vnum ἀποκαλύπτεται, in textibus correctioribus fuisse in futuro ἀποκαλύπτεται, quando quidem noster interpres vertit, reuelabitur. Adde, quod frequentissimè tempus præsens non ponitur ad significandam actionem certi temporis, sed consuetudinem, opinionem, professionem, aut aliquid simile, vt: *Virum non cognosco*. Luc. 10. vt ait B. Virgo, & Sadducæi dicebant: *Mortui non surgunt*. Et Carthusiani dicunt: *Non desimur carnibus*. In hac difficultate dissentimus à Caluino & Martyre; nam illi intelligunt Paulum de iudicio particulari; sed nihil hoc facit ad quæstionem de Purgatorio.

QUARTA difficultas est, quis sit ignis, qui in die Domini vniuscuiusque opus probabit. Aliqui intelligunt tribulationes huius vitæ, vt Augustinus & Gregorius locis notatis, sed hoc iam reiecimus: alij intelligunt ignem æternum; verum id esse non potest; nam ille ignis non examinabit ædificium ex auro & argento, immò nec ædificium ex ligno & fœno, vt patet: alij videntur intelligere ignem conflagrationis mundi, qui iudicium vniuersale præcedet. Id quoque esse non potest, quia ille ignis non comburet nisi inimicos Dei. Psal. 96. *Ignis ante ipsum præcedet, & inflammabit in circuitu inimicos eius*. Iste autem, de quo Apostolus loquitur, omnes tanger, etiam eos, qui aurum & argentum superædificauerunt. Præterea iste ignis non potest probare opera, cum sit ignis materialis, & opera non sint nisi in mente, quia transferunt.

Alij intelligunt de pœnis Purgatorij, sed neque id rectè dici potest. PRIMò, quia ignis Purgatorij non probat opera eorum, qui ædificant aurum & argentum. At iste ignis de quo loquimur: *Vniuscuiusque opus quale sit probabit*. Secundo, Apostolus apertè distinguit inter opera & operantes, & de isto igne dicit, quòd comburet opera, non operantes. ait enim: *Si cuius opus manserit, &: Si cuius opus arserit*. At ignis Purgatorij, qui verus & realis est ignis, non potest opera comburere, quæ sunt actiones transientes, & iam transferunt.

Denique sequeretur, omnes homines etiam sanctissimos transire per ignem Purgatorij, & saluari per ignem; nam per hunc ignem, de quo loquimur, omnes transeunt. At omnes transire per ignem Purgatorij, & saluari per ignem, est aperte falsum; nam Apostolus hic aperte dicit solum eos, qui edificant ligna & scenum saluandos quasi per ignem; Ecclesia quoque perpetuo sensit sanctos Martyres & Infantes post Baptismum morientes, mox in cœlum recipi sine vilo transitu per ignem, vt Concilium Florent. docet, sess. vlt. Idem etiam sancti Patres docent. B. HIERONYMVS lib. 2. in Iouin. & B. AVGVSTINVS in Psal. 37. *Si edificarent, inquit, aurum, argentum, lapidos preciosos, de vtroque igne securi essent, non solum de illo aeterno, qui in aeternum cruciaturus est impios, sed etiam de illo qui emendabit eos, qui per ignem salui erunt.*

Superest igitur, vt dicamus hic Apostolum loqui de igne seueri & iustitiam Dei, qui non est ignis purgans vel affligens, sed probans & examinans. Ita exponit AMBROSIVS Psalmum 118. concio. 20. super illud; Vide humilitatē meam: Omnes nos, inquit, fornax probabit, ergo quia examinandi sumus, sic nos agamus vt iudicio probari mereamur diuino, teneamus hic positā humilitatem, vt cum vnusquisque nostrum venerit ad iudicium Dei, ad illos ignes, quos transire sumus, dicat, *Vide humilitatem meam, &c.* Idem SEDVLIVS in hunc locum: *Examinationem iudicij, inquit, igni voluit comparare secundum consuetudinem Scripturarum.* eodem modo exponunt Dionysius Carthusianus, Lyranus, Caietanus, & alij in hunc locum.

Quod hæc sententia verissima sit, probatur PRIMO, quia non aliter potest intelligi, quomodo ignis probet eos, qui aurum & argentum edificauerunt.

SECUNDO, quia hæc expositio optimè conuenit verbis Apostoli, cum ait: *Vnusquisque, opus quale sit, ignis probabit; si cuius opus manserit, mercedem accipiet, si cuius opus arserit, detrimentum patietur.* Licet enim opera transferint ab oculis hominum, & igne materiali examinari non possint, tamen non transferunt ab oculis Dei, sed, vt dicitur Eccles. vlt. *Cuncta que fiunt, adducet Deus in iudicium.* & ea examinabit, & si cuius opus manserit, id est, si cuius opus iudicium Dei sustinere potuerit, sicut aurum sustinet ignem, mercedem accipiet, probabitur, & coronabitur à Deo; si cuius opus arserit, id est,

ficinus opus iudicium Dei non sustinuerit, sicut fœnum & stipula non sustinent ignem, detrimentum patietur, repro-
babitur & reicietur.

TERTIO, quia iudicium Dei rectissimè vocatur ignis, cum sit purissimum, celerrimum, efficacissimum, & maximè penetratiuum. vnde Dan. 7. *Fluuus igneus egredietur de ore eius.* Et quoniam Deus totus est iustitia, totus iudicium, inde etiam in Scripturis vocatur ignis. Malach. 3. *ipse quasi ignis conflagrans.* Et Heb. 12. *Etenim Deus noster ignis consumens est.* Et in hoc non dissentimus à Caluino & Martyre. 10

QUINTA & vltima difficultas est, quid per ignem intelligatur, cum ait: *ipse autem saluus erit. sic tamen quasi per ignem.* Aliqui intelligunt tribulationes huius vitæ; At hoc non potest conuenienter dici, quia tunc etiam qui ædificant aurum & argentum, saluarentur quasi per ignem. Quo circa B. August. & Greg. qui sunt auctores huius sententiæ, cum in ea non acquiescerent, etiam aliam posuerunt, de qua infra dicemus. ALII intelligunt ignem æternum, vt Chrysost. & Theophyl. sed hoc iam refutauius. ALII ignem conflagrationis mundi. Id quoque dici non potest, propterrationes 10
antea positas; & præterea, quia sequeretur eos qui habent peccata venialia, non posse ad beatitudinem peruenire ante diem iudicij; nec enim intrabit in cœlum aliquid coinquinatum.

Caluinus & Martyr, Ochinus & Lutherus art. 37. intelligunt per hunc ignem iudicium Dei, quod doctrinam veram approbat, falsam confutat, sicut ignis perficit aurum, consumit fœnum. Dicunt autem hoc iudicium fieri, dum quis conuertitur, & præcipuè in hora mortis; tunc enim illustrantur multi, & sic intelligunt se deceptos, & iacturam fecisse doctrinæ suæ, & confunduntur etiam, & erubescunt, & sic per ignem salui fiunt. Addit Martyr se non dubitare, quin B. Bernardus, B. Franciscus, B. Dominicus, & alij Patres hoc modo salui facti sint, quia nimirum in morte à Deo illustrati intellexerunt, & damnauerunt errores suos de Monachatu, de Missa, &c.

At contra, PRIMO, vel istud iudicium fit solùm in morte, adhuc viuente homine, vel potest fieri etiam post mortem: si potest fieri etiam post mortem, ergo post mortem fiet aliqua remissio & purgatio peccati, saltem per illam confusionem,

& pœnitentiam, quod ipsi nullo modo admittunt; hoc enim est hoc iudicium, peto, quomodo agetur cum illis, qui superædificauerunt lignum, fœnum, stipulas, & moriuntur repente, ita vt non habuerint tempus pœnitentiæ? Isti enim non saluantur quasi per ignem, quia non habuerunt ignem istum iudicij, & refutationis suorum errorum, nec tamen possunt damnari ad Gehennam, quia habuerunt Christum in fundamento; & Paulus de omnibus talibus pronunciat, quod
 10 saluentur; nec possunt etiam saluari, quia cum decesserint in peccato cum suis stipulis & fœno, non possunt saluari nisi per ignem.

SECUNDO, ignis iste, de quo Paulus loquitur, afficiet pœna propriè & verè, præter iacturam ipsorum operum, & confusionem, quæ inde oritur, ergo illud iudicium confutans errores, non est ignis de quo hic agitur. Probatur antecedens primò ex illo verbo, *ipse detrimentum patietur*. Græcè *ἡμιῶθενται* mulctabitur, dabit pœnas. Nihil enim est apud Græcos frequētius quàm *ἡμιῶθεν θανάτω* morte
 20 mulctari; Item ex illo, *saluus erit quasi per ignem*, similitudo transeuntis per ignem significat pœna ac dolorem; qui enim transiret per ignem sine vlla læsione, non diceretur transire per ignem, quasi per ignem, sed quasi per flores, vt de sancto Tiburtio legimus.

TERCIO, quia Apostolus opponit hunc transitum per ignem mercedi; sicut enim dixerat: *Si cuius opus manserit, mercedem accipiet*, ita nunc dicit, *si cuius opus arserit, detrimentum patietur, & saluus erit quasi per ignem*. At illa merces significat aliquid præter ipsum bonum opus, & præter latitiam, quam
 30 ex se affert bonum opus. non enim diceret, mercedem accipiet, si nihil aliud esset merces, quàm id quod ex se habebat, qui edificauit aurum, &c. ergo etiam detrimentum, & transitus per ignem eius, qui superædificauit stipulam, est aliqua pœna præter iacturam operum, & præter confusionem, quæ ex se affert.

QUARTO, quia illud iudicium confutans errores, non affert detrimentum, sed lucrum; nam est illustratio quædam mentis, vt ipsi dicunt, & veritatis cognitio; & sicut qui habet auricalchum putans esse aurum, non existimat detrimentum, si quis ei auricalchum illud auferat, & aurum verum donet, ita, &c. At Paulus dicit, *detrimentum patietur*, ergo, &c.

QVINTO,

QVINTO, quia sequeretur, oēs qui saluantur, saluari quasi per ignem, contra Apostoli distinctionē; nam etsi Paulus hic solum agat de peccatis quæ cōmittuntur in docendo, tamen eadē est ratio omnium aliorū peccatorum. Sicut enim Deus iudicabit doctrinā, ita etiam opera omnia. At secundū Calviniū, & Lutheranos oēs, omnia opera nostra, quamuis iustificata videātur in oculis hominū, tamen peccata sunt in oculis Dei, nec ferre possunt iudiciū diuinum, sed arguentur eo modo planē, quo falsa doctrina; quare si ignis, de quo Paulus loquitur, est iudiciū Dei, oēs saluabuntur quasi per ignē. Nec valet responsio, quod iustorum opera nō sunt arguenda, quia sunt tecta per non imputationē, impiorū autem qui nō sunt per fidē iustificati, arguenda sint; nam Paulus cū dicit: *Saluus eris quasi per ignem*, loquitur de iustis, qui ædificauerunt stipulas, retento vero fundamento, id est, vera fide in Christum.

Quod autem Martyr ait de beatis, Bernardo, Dominico, & Francisco, impudentissimum est mendacium. Illi enim vsque ad vltimum spiritū commendauerunt suis persecutoriam in Monasterio, & obedientiā Rom. Ecclesiæ. De S. Francisco sic scribit D. BONAVENTURA, cap. 14. vitæ eius: *Hora*, inquit, *transitus sui propinquante, fecit fratres omnes existentes in loco ad se Vocari, & eos consolatorijs verbis pro sua morte demulcens, paterno affectu ad diuinum est hortatus amorem, de patientia, & paupertate, & sanctæ Romanæ Ecclesiæ fide seruandis sermonem protraxit, & insuper adiecit; Valetē filij omnes in timore Domini, & permanete in eo semper; & quoniam futura tentatio & tribulatio appropinquat, felices qui perseuerabunt in his, quæ ceperunt; ego vero ad Deum propero, cuius gratia vos omnes commendo.* Hæc est Palinodia scilicet, quam somniat Pseudomartyr Petrus.

Est igitur communis Theologorum sententia, nō in ignis hoc loco intelligi pœnā aliquam purgatoriam, & temporalem, ad quam post mortem adiudicantur, qui in iudicio particulari inueniuntur ædificasse lignum, fcenum, aut stipulam. Hæc expositio præterquam quod optimè conuenit textui, satis probatur ex communi consensu Patrum. Latini omnes hoc docent. CYPRIANVS libro 4. epist. 2. ad Antonianum: *Aliud est, inquit, ad Veniam stare, aliud ad gloriam peruenire; aliud missum in carcerem non exire, donec soluat nonissimum quadrantem; aliud statim fides, & virtutis*

accipere mercedem; aliud pro peccatū longo dolore cruciatum emendari, & purgari diu igne; aliud peccata omnia passione purgasse. Hic B. Cyprianus non meminit apertè huius loci beati Pauli, sed tamen cū nusquā in Scriptura fiat mentio ignis, vbi apertè de Purgatorio agitur, nihil dubiū est, quin B. Cyprianus ad hunc locum respexerit.

AMBROSIVS in hunc locum: Sed cum, inquit, Paulus dicit (sic tamen quasi per ignem) ostendat quidem illum saluum futurum, sed p̄nas ignis passurum, ut per ignem purgatus fiat saluus, & non sicut perfidi aeterno igne in perpetuum torqueantur. Idem habet serm. 20. in Psalmum 118.

HERONYMVS in quartum caput Amos, exponens illud: Facti estis sicut torris raptus de incendio: luxia illud, inquit, quod in Apostolo legimus, ipse autem saluus erit quasi per ignem; qui ergo saluatur per ignem, quasi torris de incendio raptus. Idem docuit in vltimis verbis vltimi libri super Isaiam, & lib. 2. in Iouinianum, vltra medium.

AUGVSTINVS in Psalmum 37. In hac Versa, inquit, purges me, & talem me reddas, cui iam emendatorio igne opus non sit. Et infra, explicans locum Apostoli: Dicitur, inquit, saluus erit quasi per ignem, & quia dicitur, saluus erit, contemnitur ille ignis, ita planè quamuis salui per ignem, grauior tamen est ille ignis, quàm quidquid potest homo pati in hac Versa.

GREGORIUS lib. 4. Dialog. cap. 39. Quamuis hoc (inquit, explicans hunc locum 1. Cor. 3.) de igne tribulationis in hac Versa nobis adhibita possit intelligi, tamen si quis hoc de igne futuræ purgationis accipiat, pensandum sollicitè est, quia illum per ignem dixit saluari, nō qui super hoc, ferrum, as, vel plumbum edificat, id est, peccata maiora, & idcirco duriora, atque tunc iam insolubilia, sed lignum, fenum, stipulam, id est, peccata minuta, atque leuissima, qua ignis facile consumit. ALGVINVS libro 3. de Trinitate. Rupertus in 3. caput Genes. exponens illud, quod ibi dicitur de gladio flammeo, & versatili. Magister in 4. d. 21. & cum eo B. Bonaventura, & alij Scholastici. Item B. Anselmus, Haymo, & B. Thomas in hunc locum. Denique Innocentius III. in Psalmum 37. & omnes Latini recentiores sic exponunt.

Ex Græcis habemus in primis ORIGENEM apertissimè hoc docentem, hom. 6. in Exod. & hom. 14. in Leuit. & hom. 12. in Hieremiam. Homilia 6. in Exod. sic ait: Sed & illuc cum

conuenitur, si quis multa opera bona, & parum aliquid iniquitatis attulerit, illud parum tanquam plumbum igne resoluitur & purgatur, &c. Præterea OECUMENIVM in hunc locum, qui etiam testatur Basilium hunc locum intellexisse de igne purgatorio; Adducit etiam B. THOMAS in opusculo primo contra Græcos, Theodoretum explicantem hunc locum his verbis: *Hunc credimus ignem purgatorium, quo purgantur anima, & aurum in conflatorio.* GAGNEIVS verd eandem Theodoretis sententiam ex Græcorum scholiis Græcis verbis ita citat: τὸ τὸ πῦρ πησένομεν καθαρίσειον ἐμῶν καὶ θανάτου καὶ ζωῆς, καὶ θάπερ χερσὶν οὐ ἐμ τῶν καλυπτηρίων.

At contra obiiciunt, primò, absurdum esse, quòd Apostolus in eadem sententia variè accipiat nomē ignis, semel pro iudicio, & semel pro vero igne purgatorio.

Respondeo PRIMÒ, nos cogi ab ipso textu ad æquiocationem non vnam, sed duas admittendas; nam cum dicit diem iudicij manifestari per ignem, videtur omnino loqui de igne conflagrationis; cum addit, cuiusque opus ignis probabit, nō potest loqui de igne materiali, qui non potest probare opera quæ transferunt; rursum cum secundò isto igne dicat Apostolus omnia opera examinanda; tertio verd, non opera, sed operarios, & eos non omnes, sed eos solū, qui edificant lignum, scenum, stipulam; necessariò diuersi ignes esse debent. Nec tamen propriè æquiocatio, sed elegans allusio mihi videtur esse in verbis Pauli. Hic enim est sensus totius huius loci; Dies Domini per ignem conflagrationis declarabitur, & sicut ipsa dies per ignem declarabitur, ita eadem dies manifestabit per ignem, nimirum iudicij, cuiusque opus, & sicut opera per ignem manifestabuntur, ita etiam operarij, qui purgatione egebunt, per quendam ignem purgabuntur.

SECUNDO dico, non esse insuetum B. Paulo in eadem sententia uti variè aliquo nomine; variè enim accipit vocem peccati, cum ait 2. Corinth. 5. *Eum qui non nouerat peccatum, pro nobis peccatum fecit.* Et Roman. 8. *De peccato damnauit peccatum.*

TERTIO dico, quod si quis omnino non vellet significationum varietatem admittere, sed vbiq; acciperet ignem

pro iudicio, adhuc non efficeret, quin ex hoc loco Purgatorium statueremus. Tunc enim hic esset sensus: *Si cuius opus arserit, detrimentum parietur, ipse autem saluus erit, sicut tamen quasi per ignem*; id est, si cuius opus iudicium Dei sustinere non poterit, opus quidem reprobabitur, ipse verò saluus erit, sed sic tamē quasi is, qui per ignem diuini iudicij transit, quod iudicium cum sit iustissimum, omnino aliqua pœna eum affecit.

Obiciunt SECUNDO, particulam, *quasi*, quæ non veritatem, sed similitudinem significare solet. RESPONDEO, particulam, *quasi*, similitudinem significare non ignis, quasi ignis ille non sit verus, sed phantasticus, sed transeuntis per ignem, ita vt sit sensus: Ad salutem perueniet, qui ædificauit fœnum, sed ad eum modum perueniet, quo peruenit ad alium quem locum is, qui transit per ignem, sicut dicitur Ioannis 1. *Vidimus gloriam eius, gloriam quasi vnigeniti à Patre*; id est, vidimus eum gloriosum ad eum modum, quo decet gloriosum esse Filium Patris vnigenitum.

TERTIVS locus est, 1. Corinth. 15. *Quid facient qui baptizantur pro mortuis, si mortui non resurgunt? Et quid baptizantur pro illis?* Hic locus apertè conuincit, quod volumus, si bene intelligatur, idē breuiter eum expendamus. Sex inuenio huius loci expositiones.

PRIMA est, quod Apostolus probet futuram resurrectionem, ex errore quorundam, qui Baptismū suscipiebant nomine alicuius amici sui defuncti sine Baptismo; existimabant enim, quod sicut orationes & ieiunia viuorum profunt defunctis, ita & Baptismus prodesset. Ita exponunt Tertullianus lib. 5. in Marcionem, & libro de resurrectione, Ambrosius, Anselmus, & Haymo. secundum quam expositionem colligitur oratio pro defunctis ex hoc loco, quia docent isti Patres, quod Apostolus, licet non probet errorem istorum, tamen probat intentionem, quam habebant iuuandi defunctos, & ex ea argumentatur; si igitur Apostolus probat intentionem iuuandi mortuos, certè reprobari non potest, nec debet ab vllō Christiano; tamen non puto veram hanc expositionem.

PRIMO, quia Apostolus debuisset saltem insinuare hunc esse errorem, ne daret occasionem errandi. SECUNDO, quia non solidè argumentaretur Apostolus; posset enim responderi,

deri, non benè probari resurrectionem ex eo, quod ita credant quidem errantes. Sicut enim errant in eo, quod baptizant unum pro alio, sic possunt errare in eo, quod credunt futuram resurrectionem. TERTIO, quia nullus veterum historicorum tradit hunc errorem tempore Apostolorum fuisse; tribuit enim Phylaster hunc errorem Montanistis, qui 100. annis post obitum S. Pauli exorti sunt, eundem tribuunt Chrysofomus & Theophylactus, vbi supra, Marcionistis, qui etiam post obitum Pauli LXXX. annis inceperunt; denique Epiphanius hæresi 28. hoc tribuit Cherintianis, quorum secta XX. annis post obitum Pauli orta est. ANDE quod Chrysofomus & Epiphanius, non ipsi Marcioni & Cherinto, sed posteritati eorum hunc errorem tribuunt, & meritò. Alioqui enim quomodo Irenæus & Tertullianus hunc errorem non refutassent, qui diligentissimè refutarunt omnes errores Cherinti, & Marcionis; dicit quidem Tertullianus, hunc errorem fuisse tempore Apostolorum, sed non haberi nisi hinc, itaque meritò Chrysof. & Epiphanius. & Theophyl. hanc expositionem vt falsam reiciunt.

ALTERA expositio est, quod Apostolus nomine mortuorum intelligat peccata, cum dicit, qui baptizantur pro mortuis, quasi dicat; Quid facient, qui baptizantur pro mortuis, id est, pro peccatis diluendis? ita Sedulius, & B. Thomas in hunc locum Apostoli.

At contra; PRIMO, quia Apostolus subdit: *Si mortui non resurgent, Et quid baptizantur pro illis?* nimirum hominibus mortuis, qui non resurgunt; itaque clarè docet, se non de peccatis, sed de hominibus agere. Non enim vult probare, quod peccata resurgant, sed quod homines resurgant. SECUNDO, quia tota vis argumenti perit, si dicatur, quid facient qui baptizantur pro peccatis diluendis, si mortui non resurgunt? posset enim responderi, multum prodesse diluere peccata, etiam si mortui non resurgant, quia bonum est in hac vita frui testimonio bonæ conscientia. TERTIO, quia peccata non dicuntur mortua, nisi quando sunt deleta, & extincta; non ergo Paulus nomine mortuorum intelligit peccata que adhuc delenda sunt.

TERTIA expositio est, baptizari pro mortuis, esse baptizari simpliciter Baptismo Christi, sed ided dicuntur baptizari pro mortuis, qui Baptismum suscipiunt, quia antequam

quam baptizentur, recitant symbolum, in quo est vnus articulus: *Carnis resurrectionem*, ita vt illud *pro mortuis*, significet pro spe resurrectionis, vel pro corporibus mortuis, id est, in eum finem, vt corpora nostra quæ moritura sunt, aliquando immortalia resurgant. ita Chrysostomus, Oecumenius, & Theophylactus; sed certè dura & violenta expositio est.

PRIMO, quia non diceret Apostolus: *Quid faciens qui baptizantur pro mortuis*, sed, quid facimus qui baptizamur pro mortuis? Non enim quidam, sed omnes sic baptizantur; **A**postolus autem de quibusdam tantum loquitur, vt patet tum ex forma verborum, tum ex eo quod sequitur, vt quid & nos periclitamur tota die? **S**ECUNDO, quia inauditum est, vt nomine mortuorum intelligatur spes resurrectionis, vel corpora mortua, cum in Græco sit *νεκρῶν*, in genere masculino, & corpora sint generis neutri *ὀνόματα*. **T**ERTIO, quia si ideò diceremur baptizari pro mortuis, quia recitamus articulum de mortuorum resurrectione, etiam possemus dici baptizari pro Deo Patre, & pro Christo, & pro Spiritu sancto, & pro Ecclesia, quia hæc omnia recitamus in Symbolo. **Q**UARTO, quia Apostolus videtur omnino nomine mortuorum, homines mortuos intelligere, & nihil aliud, cum enim ait: *Si mortui non resurgunt, et quid baptizantur pro illis?* quid possumus intelligere per vocem, *illis*, nisi illis mortuis, qui non resurgunt?

QUARTA expositio est, baptizari pro mortuis esse baptizari Baptismo Christi; dici autem Baptismum pro mortuis, quia dum baptizamur, agimus & repræsentamus personam mortui, dum mergimur in aquam; & resurgentis, dum surgimus ab aquis, & sic profiteremur resurrectionem, & ex hac professione Apostolus probat futuram resurrectionem. ita exponunt Theodoretus & Caietanus.

At contra; **P**RIMO, quia neq; Hebraicè, neq; Græcè, neq; Latine, agere pro aliquo, significat eum repræsentare, sed agere loco eius, vel in eius vtilitatem. **Q**uis vnquam dixit de agente in theatro personam Dauis, aut Pamphili, ille egit pro Dauo, aut pro Pamphilo.

SECUNDO, quia qui baptizantur, repræsentant mortem Christi, & simul mortem suam, vt patet ex Apostolo Rom. 6. *Quotquot baptizati sumus in Christo Iesu, in morte ipsius baptizati*

baptizati sumus, consepulti enim sumus cum illo per Baptismū, etc.
Itaq; baptizari pro mortuis, erit baptizari pro se, & pro Christo, quod absurdissimum est; nec in Scripturis vnquam reperitur baptizari pro Christo, sed solum baptizari in Christo, vel in eius nomine, vt patet Rom. 6. Gal. 3. Act. 10. & 19.

TERTIO, quia argumentum Apostoli nullum esset; nam ex eo quod qui baptizatur, agit personam mortui, non sequitur quod profiteatur resurrectionem. debuisset ergo Apostolus dicere, Quid facient qui baptizantur pro suscitatis, vel pro mortuis, & suscitatis? sed etiam si hoc dixisset, adhuc leue esset argumentum eius; quia posset responderi, in Baptismo representari resurrectionem, non carnis à morte, sed animæ à peccato. Id enim Apostolus significat Rom. 6. *Vt in nouitate vite ambulemus.* Et Col. 3. *Si conuressistis cum Christo, quæ sursum sunt querite.*

QUINTA expositio est Epiphaniij, hæc. 28. quam adfert Petrus Martyr, quod Paulus loquatur de Baptismo eorum, qui baptizabantur in lecto, cum essent in extremis, qui olim dicebantur Clinici, & quos Cyprianus festiuè opponit Peripateticis lib. 4. epist. 7. ad Magnum, quod nimirum Clinici non ambulent, sed hæreant lecto affixi; *κλινη* enim lectum significat. Volunt ergo quidam hunc esse Apostoli sensum; Quid facient qui baptizantur pro mortuis? id est, qui baptizantur, quando habentur magis pro mortuis, quam viuentibus, & quando certum est eos non baptizari pro vlllo comodo huius vitæ, cum pro mortuis habeantur.

Hæc expositio refellitur. PRIMO, ex illis verbis, vt quid baptizatur pro illis? nam dicere debuisset, vt quid baptizantur pro se, non pro illis. SECUNDO, quia illud, pro mortuo, non potest dici, nisi in iis actionibus, quæ fiunt circa mortuos. Verbi gratia, rectè dicimus, ille cecidit ex loco edito, & pro mortuo sublatu fuit, vel pro mortuo lotus, sepultusque fuit, etiam si viueret. At non rectè dicitur, ille ambulabat, vel comedebat, vel loquebatur pro mortuo. At baptizari est viuorum non mortuorum; non ergo rectè dicitur baptizari aliquem pro mortuo, etiam si agat in extremis, sed potius deberet dici baptizari pro viuo, etiam si ferè sit mortuus.

Est igitur SEXTA expositio vera & germana, quod Apostolus loquatur de Baptismo lacrymarum & penitentia, qui suscipitur orando, ieiunando, elemosynas faciendo, &c.

Et sensus sit: *Quid facient qui baptizantur pro mortuis, si mortui non resurgent?* id est, quid facient qui orant, ieiunant, gemunt, affligunt se pro mortuis, si mortui non resurgunt: ita exponunt Ephrem in suo Testamento, Petrus Cluniacensis in lib. contra Petrobrufianos, Dionysius, Hugo, Gagneus, & alij in hunc locum.

Hæc expositio verissima est. PRIMO, quia baptizari passim in Scriptura & Patribus accipitur pro affligi, vt Marcio. *Potestis bibere calicem quem ego bibiturus sum, & Baptismo quo ego baptizor baptizari?* Lucæ 12. *Baptismo habeo baptizari.* Patres passim vocant pœnitentiæ afflictionem Baptismum laboriosum, & secundam tabulam. Cyprianus in sermone de cœna Domini: *Lacrymis*, inquit, *se baptizat.* Et in Proemio lib. de exhortatione martyrij, mori pro Christo, frequenter vocat Baptisma; & Gregorius Nazianzenus orat. de Epiphania: *Scio*, inquit, *quartum Baptisma, quod per martyrium & sanguinem fit, scio & quintum, lacrymarum & pœnitentiæ.*

SECUNDO, quia ipsa pœna Purgatorij à Scriptura & Patribus vocatur Baptisma; nam quod legimus Matt. 3. *ipse vos baptizat in Spiritu sancto & igni.* B. Hieronymus exponit in Spiritu sancto, in hac vita, igne vero, in futura; sicut ante eum exposuerat B. Basilius libro de Spiritu sancto, cap. 15. & post eos Beda in cap. 3. Lucæ. Item Gregorius Nazianzenus in fine orationis de Epiphania, vocat ignem Purgatorij in alia vita, vltimum Baptisma. Itaq; elegantissimè Apostolus dixit, eos baptizari pro mortuis, qui affligentes se oratione & ieiunio, sumunt in se partem illius Baptismi ignei, quo animæ baptizantur in Purgatorio.

TERTIO, quia hæc expositio maximè quadrat cum sequentibus: *Vi quid & nos periclitamur tota die?* quasi dicat; Cur quidam se affligunt orando pro mortuis, & ego affligo me prædicando Euangelium, si mortuorum resurrectio non est?

QUARTO, quia ista sententia eadem est cum illa, 2. Machab. 12. si mortui non resurgunt, superfluum est & vanum orare pro mortuis.

At contra hanc expositionem duo argumenta obijciuntur. PRIMVM est, quia non debuisset Apostolus dicere, quid facient qui baptizantur pro mortuis, sed quid faciemus qui baptizamur pro mortuis? nam omnes Christiani orant pro mortuis.

mortuis. **R**ESPONDEO, Apostolus argumentari voluit non à consuetudine Christianorum, quæ tanquam noua reiici potuisset ab incredulis, sed à consuetudine Iudæorum, qui more veteri, & secundum Scripturarum exempla orabant, & ieiunabant pro mortuis, quasi dicat, Quid facient illi qui imitantes antiquos Patres ieiunant, & orant, ac se affligunt pro mortuis, si mortui non resurgunt?

SECVNDVM argumentum est, quia non videtur bene probari mortuorum resurrectio, ex eo, quod oratur pro mortuis, quia oratur non vt resurgant, sed vt à pœnis illis liberentur, atq; ad requiem transeant. **R**ESPONDEO, quæstionem de resurrectione & de immortalitate animorum ita fuisse coniunctas tempore Apostolorum, vt pro vna haberentur, vt supra ostendimus, cum testimonium ex libris Machabæorum exponeremus. Siue igitur hæc expositionem sequamur, quæ nobis verissima videtur, siue primam, quæ melior est ceteris tribus, apertè colligitur oratio pro defunctis.

QUARTVS locus est, Matth. 5. & Luca 12. *Esto consensus aduersario tuo citò dum es cum eo in Via, ne forte tradat te aduersarius iudici, & iudex tortori, & mittaris in carcerem. Amen dico tibi, non exies inde donec reddas nouissimum quadrantem.* Exponendum est quid sit via, quid aduersarius, quid iudex, quid tortor, quid carcer, quid quadrans.

De **P**RIMO Chrysostrmus in c. 5. Matth. docet, viam hinc accipi propriè pro vera via, qua itur ad iudicem in hoc mundo; Chrysostrmus enim existimat nullà hinc esse parabolam, sed Dominum ad literam terrere diffidentes comminatione humani periculi, ita vt etiam iudex intelligatur homo, tortor homo, carcer materialis huius vitæ, & quadrans verus nummus græcus. quo etiam modo contendit Ochinus esse hunc locum exponendum, de qua explicatione duo dico.

PRIMO, eam simpliciter non esse probabilem; tum quod repugnent omnes alij expositores, Origenes, Cyprianus, Hilarius, Ambrosius, Hieronymus, Augustinus, Beda, Anselmus. & recentiores, Abulensis, Lyranus, Caietanus, Iansenius, & alij, qui omnes docent, hinc viam significare vitam præsentem, vt cum dicitur: *Beati immaculati in Via*, Psal. 118. & magna ex parte hunc sermonem esse metaphoricum: tum etiam quod nõ soleat Dominus tam seridè docere & infructu re humanam prudentiam, cum ipse sæpe testatus sit, filius huius

huius seculi prudentiores esse filios lucis. Adde, quod non tam assertiuè Dominus diceret: *Amen dico tibi, non exies inde donec reddas nouissimum quadrantem.* si loqueretur de humano iudicio, cum sæpe videamus contrarium accidere, vt rei liberentur fauore alicuius, vel per se fugiant & nihil soluant.

Dico SECUNDO, si Chrysofomi sententia recipi debeat, vt probabilis, solum recipi posse pro iis verbis quæ habentur Matth. 5. quæ ipse exponit. pro iis autem quæ habentur Luc. 12. nullo modo recipi posse; vt enim Ambrosius rectè notauit, bis Dominus hæc verba loquutus est, diuersis que oblationis occasionibus; nam Matth. 5. dixit hæc verba, cum loqueretur de amore inimicorum, & de iniuriis condonandis, & ideo tolerari vt eunq; expositio Chrysofomi potest. at Lucæ 12. Dominus loquitur de iudicio futuro; dicit enim: *Sint lumbriculi vestri præcincti.* Et postea: *Vigilate quia quæ hora non putatis Dominus veniet.* Et in fine concludit: *Cum ergo vadis cum aduersario tuo ad Principem.* Vbi apertè ostendit se loqui de futuro iudicio, quod erit post hanc vitam; quod etiam confirmatur ex verbis immediatè præcedentibus, ait enim: *Quid autem est ad vobis istis non iudicatis quod iustum est? Cum enim vadis cum aduersario, &c.* Vult enim eos admonere, parabolam hanc sumptam ex iis quæ homines facere solent; vt enim debitores dant omnem operam liberandi se à creditore antequam ad iudicium veniatur, ita, &c. Quocirca Theophylactus, & Euthymius qui in cap. 5. Matthæi sequuntur Chrysofomum, tamen in cap. 12. Lucæ dicunt rectè intelligi per viam, vitam; periudicem, Deum, &c.

De SECUNDO, & si parum refert, quod attinet ad nostrum propositum de Purgatorio, quis sit aduersarius, quia tamen res est dignissima cognitione, explicemus breuiter; quidam per aduersarium intelligunt Diabolum, vt Origenes hom. 35. in Lucam; Ambrosius, Euthymius, & Theophylactus in cap. 12. Lucæ, & Hieronymus in epist. 8. ad Demetriadem. neque Hieronymus hanc sententiam reprehendit in commen. Matth. 5. cum ait: *Quidam coactius disserunt, &c.* Nam illud, *Coactius*, est error impressorum, & debet legi, *Cautius*.

Si petas quomodo debemus esse consentientes Diabolo, cum è contrario iubeamur illi resistere? Respondet Hieronymus

ronymus, debere nos consentire illi, quatenus tenemur stare pactis cum ipso in Baptismo; tunc enim renunciauimus Diabolo, & pompis eius; si enim rursum appetamus & inuadamus pompas eius, quibus renunciauimus, meritò nos coram Domino accusabit. Hæc opinio non est multum probabilis, & ab Augustino refellitur lib. 1. de serm. in monte, cap. 22. nam Græca vox est *εὐνοῦν*, id est, beneuolus, & concors, at Diabolo non possumus esse beneuoli, deinde cum ipse cupiat ut concupiscamus pompas eius, & ad hoc nos tenter, tunc essemus consentientes illi, si appeteremus eius pompas, & Deum offenderemus.

Alij exponunt per aduersarium, carnem, sed refelluntur meritò ab Augustino, cum non possit iuberi spiritui ut consentiat carni, cum hoc peccatum sit. ALII intelligunt spiritum per aduersarium, cui caro iubetur consentire. Refellit hoc Hieronymus, quia non est credibile spiritum traditum iudici suam carnem; neq; ibit in carcerem caro sine spiritu, sed vel solus spiritus, vel spiritus, & caro. ALII per aduersarium, saltem apud Lucam, intelligunt peccatum, quia Lucas dicit: *Da operam liberari ab eo.* Ita Ambrosius, sed non est probabile; nam liberari ab aduersario non est ab illo fugere, vel illum extinguere, sed componere cum illo, ut patet tum ex Matthæo, tum ex verbo *ἀγτί διν*, id est, litigator, siue actor. ALII intelligunt per aduersarium, alterum hominem, qui nimirum nos læsit, aut nos illum. ita Hilarius, Anselmus, & Hieronymus in cap. Matth. 5. Quæ sententia etsi probabilis est, quantum ad locum Matthæi, tamen eam refellit Augustinus loco citato. PRIMO, quia uidetur hic Dominus loqui de aduersario qui semper nobiscum est in uia, & cum quo semper possumus concordare, dum uiuimus; at aduersarius homo sæpe moritur ante suum aduersarium, & illum deserit in uia. Nec tamen dicendum est, non posse istum, qui est in uia, per pœnitentiam saluari, licet non possit cum aduersario consentire.

SECUNDO, quia non propriè vnus homo tradet alterum Deo iudici; vel saltem multa sunt alia, quæ magis propriè dicantur tradere, ut dicemus, præsertim quia vox Græca est *ἀγτί διν*, quæ non significat aduersarium ratione iniuriæ, sed ratione litis, id est, actorem, siue accusatorem.

EST ergo verissima expositio, aduersarium esse Dei legem, siue Deum ipsum, quatenus præcipit contraria carni, siue conscientiam, quæ Dei legem semper obicit peccantibus hæc enim ferè in idem coincidunt. ita exponunt Ambrosius, Beda, & Bonauentura in caput 12. Lucae. Item Anselmus, & Augustinus in cap. 5. Matt. necnon idem Augustinus hom. 1. de verbis Domini, homil. 5. in lib. 50. homiliarum, & in libro de decem chordis, cap. 3. Gregorius homil. 39. & Bernardus serm. 85. in Cantica. Nam lex Dei & conscientia nostra semper sunt nobiscum in via, semper aduersantur prauis desiderijs, iisque utilissimum est citò consentire, & ab eorum inimicitia liberari; denique accusatores & testes erunt contra nos in iudicio.

VNUM solum obstare videtur huic expositioni, quod Matth. 5. immediatè ante hanc parabolam Dominus loquebatur de reconciliatione aduersarij hominis. RESPONDEO, Dominum posteaquam docuit debere hominem homini reconciliari, monere voluisse hac parabola, vt etiam recorderentur reconciliari cum Deo, siue cum eius lege. Præterea, etiamsi probabile sit propter eam rationem, Matth. 5. per aduersarium intelligi hominem, tamen Lucae 12. non possumus intelligere nisi legem Dei, aut conscientiam; vnde Caietanus qui Matth. 5. exposuit de homine, Lucae 12. exposuit de conscientia.

DE TERTIO, conueniunt omnes, iudicem esse Christum; nam Scripturæ passim hoc docent, & præcipuè Ioan. 5. *Pater omne iudicium dedit filio.*

DE QUARTO, Ambrosius in cap. 12. Lucae, & Augustinus lib. 1. de sermone in monte, cap. 21. intelligunt per ministros, Angelos bonos. Gregorius hom. 39. & Theophylactus in 12. Lucae, intelligunt Dæmones; vtrumque est probabile.

DE QUINTO, conueniunt similiter omnes carcerem esse infernum, in quo tamen multæ sunt mansiones, aliæ pro damnatis, aliæ pro his, qui purgantur; existit olim absurdisima hæresis Carpocratis, vt refert Irenæus lib. 1. cap. 24. qui dicebat debere vnumquemque exerceri in omni genere flagitiorum, & idè animas à corpore, quasi à carcere abeuntes examinari à iudice, & nisi omnia flagitia patrasent, rursus remitti in aliud corpus tanquam in carcerem, & rotas id fieri, donec per omnia omnino flagitia transissent, & hoc voluisse

vultisse Dominum dicere, cum ait: *Non exies inde donec reddas nouissimum quadrantem*, sed absurdior est sententia, quam vitrefutari debeat.

De SEXTO, conueniunt etiam ferè omnes, per nouissimum quadrantem intelligi minuta peccata, quadrans enim est minima moneta; quod enim Augustinus dicit, vltimum quadrantem significare peccata terrena, quia terra est vltimum elementum, nimis durum, & coactum videtur, quia tamen nõ vult dicere Dominus, solum quadrantem soluendum, sed totum debitum vsq; ad vltimum quadrantem, dubium manet, an hæc solutio fiat in Gehenna, an in Purgatorio? Augustinus putat hęc agi de pœnis æternis Gehennæ, & ided dicit, illud: *Donec reddas*, non significare certum tempus, sed æternitatem, sicut cum dicitur Matth. I. *Non cognouit eam donec pareret filium suum*. Et Psal. 109. *Sede à dextris meis, donec ponam inimicos tuos scabellum pedum tuorum*. Et 1. Cor. 15. *Oportet illum cælum suscipere, donec omnia subiciantur pedibus eius*. Non enim licet colligere; ergo postquam Maria peperit, cognouit eam Ioseph, &c.

Alij, vt Albertus & Caietanus, exponunt de Gehenna, 20 & Purgatorio simul, vt sensus sit; si debitum erit insolubile, nunquam exabis, si erit solubile, exabis, cum totum exactè solueris; alij intelligunt de solo Purgatorio, nempè ij, quos statim citabimus. Ex quibus

TERTIA hæc sententia est omnium verissima. Probatur PRIMO, quia hoc modo hunc locum intellexerunt vetustissimi Patres. TERTULLIANVS libro de anima, cap. 17. *Ille te in carcerem*, inquit, *mandet infernum, & inde non dimittaris, nisi modico quoq; delicto mora resurrectionis expensò*. Vbi nota, solum esse manendum in carcere Purgatorii ad summum, vsq; ad resurrectionem.

CYPRIANVS li. 4. epist. 2. *Aliud est ad Veniam stare, aliud ad gloriam peruenire; aliud missum in carcerem non exire inde donec soluat nouissimum quadrantem; aliud statim fidei & virtutis accipere mercedem; aliud pro peccatis longo tempore cruciarum emendari, & purgari disingere; aliud peccata omnia passione purgasse.*

ORIGENES homilia 35. in Lucam: *Quod si magnam pecuniam debuerimus, sicut ille, qui scribitur decem millia talenta debuisse, quanto tempore claudamur in carcerem, non possumus manifestè pronunciare; si enim qui parum debet, non egreditur nisi exsoluus*

exsoluat minutum quadrantem; Virique qui tanto debito fuerit obnoxius, infinita ei ad reddendum secula numerabuntur. Et in epistola ad Rom. Quamuis, inquit, promittatur exeundem esse quandoq; de carcere, tamen designatur non inde exiri posse, nisi reddat quisq; nouissimum quadrantem.

EVSEBIUS Emyssenus hom. 3. de Epiphania: Hi Verò, inquit, qui temporalibus pœnis digna gesserunt, ad quos sermo Dei dirigitur, quod non exeunt inde, donec reddant nouissimum quadrantem, per fluium igneum transibunt, &c.

10 AMBROSIVS in cap. 12. Lucae, exponens hunc locum: Quadrantem, inquit, in balneis dare solere reminiscimur, cuius oblatione, si illic unusquisq; lauandi accepit facultatem, ita hic accipit eluendi, qui a vnusquisq; peccatum supra scripte generis conditionis eluitur, cum tametsi exercetur noxius pœnis, sic commisit supplicia erroris expendat.

HIERONYMVS in cap. 5. Matth. Hoc est, inquit, quod dicit, non egredieris de carcere, donec etiam minuta peccata persoluas. BERNARDVS sermon. de obitu Huberti: Illud, inquit, 20 que fuerint hic neglecta, redduntur, & sique ad nouissimum quadrantem.

Probatur SECUNDO, quia illud: Donec soluas vltimum quadrantem, non videtur rectè posse dici, nisi aliquando sit futurus finis solutionis. neq; exempla B. Augustini satisfaciunt; nam cum dicitur: Non cognoscebat eam donec pareret, non licet quidem inferre, ergo postea cognouit eam, sed bene inferre licet, ergo illa aliquando partura erat; similiter cum dicitur: Sede à dextris meis, donec ponam, &c. rectè inferitur, ergo aliquando ponentur omnes inimici Christi sub pedibus eius; alioqui illud: Donec, ineptè diceretur; ita ergo cum dicitur: Non exies donec soluas vltimum quadrantem, inferimus rectè, ergo aliquando soluet vltimum quadrantem, & consequenter exhibit inde.

TERTIO probatur ex fundamento & scopo ipsius parabola; nam similitudo non est sumpta ab homicida, vel adultero, vel proditore, qui damnantur ad mortem, vel ad perpetuos carceres, vel triremes, sed à debitore, qui non propter crimen, sed propter debitum pecuniarium conicitur in carcerem donec soluat. solent autem huiusmodi homines ordinariè egredi post aliquod tempus, vt patet; itaq; scopus parabola

bolæ est, vt in hac vita componamus cum Deo, quando faciliè impetramus remissionem pœnæ, peccatis nostris debita; nec expectemus seculum futurum, in quo seuerissimè agetur, &c. Atq; hæc de isto loco.

QVINTVS est Matth. 5. *Qui irascitur fratri suo, reus erit iudicio; qui dixerit fratri suo racha, reus erit Concilio; qui dixerit fatue, reus erit Gehenna ignis.* NOTA, hîc certum esse agi de pœna iniungenda in foro Dei, vt patet ex illo: *Reus erit Gehenna ignis.* Vnde Augustinus lib. 1. de sermone in monte, cap. 19. exponit omnia tria de pœnis animarum post hanc vitam. NOTA SECUNDO, certum etiam esse hîc distingui tria genera peccatorum, & pœnarum, vt ibidem Augustinus exponit, & damnationem æternam solùm tribui tertio generi peccatorum, id est, criminibus: Aliis autem, vt potè leuioribus peccatis, pœnas leuiiores, ac proinde temporales; ex quibus infertur, animas aliquas post hanc vitam puniri temporalibus pœnis.

DICES, at Christus dixerat; *Qui occiderit, reus erit iudicio:* ergo reum esse iudicio est damnari ad Gehennam; nam homicidium crimen lætale est. RESPONDEO, cùm ait Dominus: *Dictum est antiquis; qui occiderit, reus erit iudicio,* loquitur de iudicio humano, & temporali, quo homicidia mulctantur morte temporalis; nec enim lex vetus aliam mortem comminabatur homicidis, vt patet Exodi 21. Vult ergo Dominus dicere homicidium puniri morte in hoc mundo, at in alia vita commotionem iræ internam, etiam si peccatum sit veniale, puniri pœna quadam, temporali quidem, sed quæ æquetur morti temporalis; iram autem exterius prodeuntem puniri adhuc grauius; at verbum contumeliosum, & multò magis homicidia puniri morte æterna.

DICES rursus, esto, hoc loco loquatur Dominus de pœnis infligendis iudicio Dei, non tamen sequitur in alia vita esse pœnas temporales; nam Deus in hac vita potest infligere huiusmodi pœnas.

Respondeo PRIMO, ab Augustino aliisque Patribus hunc locum intelligi de pœnis post hanc vitam. SECUNDO dico, saltem ex hoc loco posse deduci pœnas aliquas post hanc vitam purgatorias esse; nam hinc habemus quædam peccata non mereri nisi pœnam temporalem; sed potest fieri, vt quis moriatur cum talibus peccatis, quia potest mori repentè,

vel dormiens, ita vt nullum habeat spatium pœnitentiæ, ergo in alia vita purgabitur, alioqui vel ibit in cœlum aliquid coinquatum, vel iniuste damnabitur ad pœnas æternas, qui non merebatur nisi temporales.

SEXTVS locus est Luc. 16. *Facite vobis amicos de mammona iniquitatis, et cum defeceritis, recipiant vos in æterna tabernacula.* Per (*deficere*) intelligunt omnes mori, per (*amicos*) intelligunt sanctos, qui cum Christo regnant, ex quibus sequitur homines post mortem iuari precibus Sanctorum.

- 10 Sed quia posset aliquis dicere hic agi de virtute eleemosynæ, & sensum esse, eos qui eleemosynas fecerunt, cum moriuntur saluari propter opera illa bona quæ fecerunt; obseruandum est, non hoc solum velle Dominum, sed etiam velle post mortem iuari animas precibus Sanctorum; nam PRIMO ad id cogunt verba illa; *Facite amicos, qui recipiant.* Nam eleemosyna quæ datur malis hominibus, bona tamen intentione, meritoria est; & tamen non facit amicos, qui possint recipere in æterna tabernacula; vnde Hieronymus lib. contra Vigilantium in fine dicit, hic Dominum hortari vt detur
20 eleemosyna potius bonis quam malis, vt bonorum inter celsione saluentur qui eleemosynas faciunt; similiter Ambrosius in hunc locum, & Augustinus lib. 21. de ciuitate Dei, cap. 27. dicunt, hic per amicos intelligi sanctos cum Christo regnantes, qui suis precibus nos iuuat, & iuuabunt cum mortui fuerimus.

SECUNDO, ad id nos cogit ipsa similitudo; nam parabola sumpta est a quodam œconomo, qui depositus ab officio, & egenus factus opem implorabat amicorum suorum: quod autem in applicatione parabolæ deponi ab officio sit mortis
30 Dominus ipse explicat.

Adde TERTIO, quod Augustinus li. 21. de ciuit. Dei, c. 27. ex hoc loco Purgatorium demonstrat. dicit enim esse quosdam tam sanctos, qui recta ad cœlum euolant post mortem, & qui non solum ipsi saluantur, sed etiam alios iuuare possunt, rursus quosdam alios tam malos, qui nec se ipsos iuuare possunt, nec ab aliis iuari, sed ad pœnas æternas sine remedio descendunt. Deniq; esse quosdam medios, qui ita moriuntur, vt nec digni sint morte æterna, nec tamen sufficienter eis propria merita ad salutem, nimirum statim recipiendam, & illi sunt, inquit, qui recipiuntur in æterna tabernacula precibus
Ad
amicorum.

Ad hunc locum nihil respondet Petrus Martyr, sed obiicit sibi nomine Catholicorum ea quæ sequuntur post hanc parabolam; aitq; nos asserere Epulonem fuisse in Purgatorio, cum ab Abrahamo auxilium petiit, & hoc argumentum, quasi noster esset Achilles, operose soluit, & simul inde deducit non posse animas iuvari à uiuentibus; quandoquidem nec Abraham, nec Lazarus Epulonem iuare potuerunt, & per iocum miratur, cur Epulo non petierit anniuersaria & Missas pro se fieri; sed Catholici ferè omnes Epulonem in Gehenna esse dicunt, proinde Petrus Martyr in ventum pugnat.

SEPTIMVS locus est Luc. 23. *Memento mei dum Veneris in regnum tuum.* Nunquam hoc diceret bonus ille vir à Spiritu sancto edoctus, nisi crederet post hanc vitam posse remitti peccata, & auxilio animas indigere, & iuuari posse. Certè Augustinus lib. 6. in Julian. cap. 5. hinc probat aliqua peccata remitti post mortem.

OCTAVVS est Act. 2. *Quem Deus suscitauit solutis doloribus inferni, iuxta quod impossibile erat teneri eum ab illis.* Hunc locum ita intelligit B. Augustinus epist. 99. ad Euodium, & lib. 12. Genes. cap. 33. vt sensus sit, Christum cum descendit ad inferos, multos liberasse à cruciatibus inferni, quod cum nō possit intelligi de damnatis, necessariò videtur accipiendum de iis, qui purgabantur; quod etiã affirmat Epiphanius in hæresi Tatiani, quæ est vltima primi libri; dicit enim Christum, cum descendit ad inferos, liberasse eos, qui per ignorantiam peccauerunt, nec tamen à Dei fide recesserunt. & præter horum Patrum auctoritatem, probatur ex ipsis verbis Scripturæ; nam illud: *solutis doloribus inferni*, non potest intelligi de doloribus ipsius Christi; dolores enim Christi in cruce finiti sunt, vt patet ex illis verbis Luc. 23. *Hodie mecum eris in Paradiso.* Nec de doloribus damnatorum, vt patet, quia illi æternis ignibus addicti sunt; nec de doloribus sanctorum Patrum; illi enim nullos patiebantur dolores, vt Augustinus docet locis citatis, & Gregorius hom. 22. Relinquitur igitur vt de doloribus animarum Purgatorij hoc loco agatur.

DICAS; Græci non legunt solutis doloribus inferni, sed solutis doloribus mortis τὸ λύα τὸ non τὸ ἀδύ. RESPONDEO, nobis

nobiscum facere PRIMO, vulgatam antiquam editionem Latinam. SECUNDO, Syriacam, quæ similiter legit: *Deus, inquit, excitauit illum, et soluit funes inferni*. TERTIO, antiquissimos Patres Græcos & Latinos; nam B. Polycarpus initio epistolæ suæ, citans hunc locum, scribit, *solatis doloribus inferni*. Item CYPRIANVS sermone de cœna Domini initio ad hunc locum respiciens ait: *Sed volebat, inquit, pius Magister ostendere, impossibile esse suam animam ab inferno detineri*. Epiphanius quoque & Augustinus sine dubio ita legunt. DENTQUE probatur ex verbis sequentibus; nam probat Petrus id quod dixerat ex Psalm. 15. *Non derelinques animam meam in inferno, nec dabis sanctum tuum videre corruptionem*.

NONVS locus est Philipp. 2. *Ut in nomine IESU omne genua flectatur, caelestium, terrestrium, et infernorum*. Vtitur hoc loco B. Augustinus lib. 12. de Genes. cap. 33. quanquam per illud in infernorum non improbabiler accipiuntur Dæmones. similis huic est locus Apocal. 5. *Quis dignus est aperire librum, et soluere septem signacula eius? et nemo inuentus est neque in celo, neque in terra, neque subtus terram*. Per eos qui sunt in celo intelliguntur Angeli, per eos qui in terra homines iusti, per eos qui sub terra non possunt intelligi nisi anime Purgatorij, nec enim id damnatis tribueretur, Patres autem qui fuerant in limbo, iam liberati erant.

Vtuntur nostri hoc loco, sed tamen non videtur multum vrgere; nam probabile est intelligi per eos, qui sunt infra terra, Patres, qui erant in limbo, etsi enim quando Ioannes hæc scripsit Patres exierant ex limbo, non tamen exierant eo tempore de quo loquitur; loquitur enim de tempore, quod præcessit Christi mortem, ideo enim subiungitur: *Vicit Leo de tribu Iuda radix David aperire librum, &c.* Christus enim morte sua aperuit mysteria libri vsque ad illam diem clausa; similiter quod afferitur ex hoc eodem capite 5. Apocal. vbi dicuntur creaturæ quæ sunt in celo, & quæ in terra, & quæ subtus terram dedisse laudem Deo, non conuincit; nam possunt hæc per creaturas intelligi res inanimæ, vt: *ignis, grando, &c.* Quæ in Psalm. 148. ad Deum laudandum inuitantur, præsertim cum Ioannes addat etiam ea quæ sunt in mari.

CAPVT QVINTVM.

Afferitur Purgatorium testimonis Conciliorum.

SECVNDVM argumentum sumitur ex Conciliis, & Ecclesie consuetudine; nam in primis quid Ecclesia Africana senserit, patet ex Concilio III. Carthagenensi, cap. 29. *Et Sacramenta altaris, inquit, non nisi ieiunio hominibus celebrentur, si autem aliquorum pomeridiano tempore defunctorum commendatio facienda est, solo orationibus fiat,* similia habes in Concilio IV. Carthagenensi, cap. 79.

Idem sensit Ecclesia Hispanica, ut patet ex Concilio Bracarenensi I. cap. 34. ubi iubet non orari pro illis, qui seipso interimunt, & cap. 39. ubi iubet diuidi inter Clericos oblationes factas, ut oraretur pro defunctis.

Idem Ecclesia Gallica, ut patet ex Concilio Cabilonensi, & habetur de consecr. dist. I. can. Visum est: *Visum est, inquit, praeterea, et in omnibus Missarum solennibus pro spiritibus defunctorum loco competentis in Ecclesia ad Dominum deprecetur.* 20
Vide etiam Concilium Aurelianense II. cap. 14.

Idem sensit Ecclesia Germanica, ut patet ex Concilio Vormatiensi, cap. 10. ubi definitur, etiam pro suspensis in patibulo esse orandum, & sacrificandum.

Idem Ecclesia Italica, ut patet ex Concilio VI. sub Symmacho, ubi dicitur sacrilegium, fraudare animas defunctorum orationibus, &c.

Item Ecclesia Graeca, ut patet ex Graecorum Synodis à Martino Bracarensi Episcopo collectis, cap. 69. Immo videtur aliqui Graeci etiam nimium voluisse iuuare animas defunctorum; nam in Concilio VI. can. 83. reprehenduntur illi qui iis, qui sine communione sacra obierant, sacram Eucharistiam in os ingerere conabantur.

Accedant Concilia totius Ecclesiae generalia, Lateranense sub Innocentio III. cap. 66. Florentinum sess. vltima in decreto de Purgatorio, & Tridentin. sess. 25. in initio, & omnes liturgiae, Iacobi, Basilij, Chrysostomi, Ambrosij, &c. Nam in omnibus fit oratio pro defunctis.

Respondet Petrus Martyr tripliciter loco notato. PRIMO: *Solet, inquit, nobis obisci, Ecclesiam semper pro defunctis orasse,*

orasse, quod equidem non inficior, sed assero, istius facti neque Verbi Dei, neque exempli, quod desumitur ex sacris literis, auctoritatem habere. Facile mouentur homines naturali quadam caritate impulsī, & amore in defunctos, ut illis bene cupiant, & in aliquas preces pro eis erumpant, sed affectio hac vehementior. Videndum est, ne fidei, & iustæ pietati aduersetur. His verbis arguit totam Ecclesiam Martyr, quod sine testimonio Scripturæ oret pro defunctis, & quod id faciat ex vehementiore affectu erga mortuos; quæ affectio fidei, & pietati repugnat.

PRIMÆ parti accusationis satisfacit A VG V S T I N U S libro de cura pro mortuis, cap. I. Adiungit, inquit, Sacare non posse quod vniuersa pro defunctis Ecclesia supplicare consueuerit. Et infra, approbans hanc sententiam B. Paulini, ad quem scribit: In Machabaorum, inquit, libris legitur oblatum pro mortuis sacrificium, sed & si nusquam in Scripturis veteribus omnino legeretur, non parua est vniuersa Ecclesia, quæ in hac consuetudine clares, auctoritas; sibi in precibus sacerdotis, quæ Deo ad eius altare funduntur, locum suum habet etiam commendat.

SECUNDÆ parti accusationis facile respondetur; Nam quod ex naturali affectu prorumpatur in preces pro caris defunctis, etiam si quis putet nihil eis prodesse, potest contingere in precibus priuatis, & quæ ex tempore recitantur; at in solennibus precibus Ecclesiæ, quæ leguntur ex libro, & maturo iudicio compositæ sunt, & à Concilio Episcoporum approbatæ, quomodo potest id fieri?

TERTIÆ parti satisfacit B. Paulus, cum dicit: Ecclesiam esse columnam & firmamentum Veritatis, 1. Timoth. 3. nec non Augustinus qui epist. 118. dicit insolentissimæ infantiæ esse disputare contra id quod vniuersa Ecclesia facit. Denique ipsa ratio; nam si vniuersa Ecclesia potest verè fidei & iustæ pietati aduersari, ut Martyr dicit, potest ergo tota Ecclesia ruere contra Christi prædicationem, Matth. 16. Porta inferi non preualcunt aduersus eam. Vtrum autem credibilius sit, Ecclesiam vniuersam posse ruere, & Christum, ac Paulum mentiri, an Petrum Martyrem insolentissima infania laborare; cuiuslibet hominis, modò sani, appello iudicium.

SECUNDA solutio Martyris est, quod Ecclesia non oret pro defunctis, ut eos liberet à Purgatorio, sed ut memoriam eorum

eorum se habere testetur, & conferuet etiam quàm diutissimè potest: *Et alia causa*, inquit, *citra Purgatorium esse potest, ut pro defunctis in Ecclesia preces fierent. Noluerunt enim defunctorum nomen, & memoriam facile interire.* At AVGVSTINVS libro de cura pro mortuis, cap. I. tractat questionem; An profinit animabus defunctorum preces Ecclesia, & dicit prodesse illis, qui in hac vita non fuerunt valde mali, & qui meruerunt, ut sibi prodesse; non autem illis, qui fuerunt valde mali, & proinde nihil tale meruerunt: Proinde commentitia Petri Martyris solutio est.

TERTIA solutio est, Ecclesiam fungi munere suo erga mortuos ac si adhuc viuerent, & ideo precari illis id quod putariam eos consequutos, quomodo Christus orauit pro Lazari excitatione, etiam si sciret, iam se accepisse quod petebat; & Ambrosius in oratione de obitu Theodosij gratulatur illi quòd iam cum Christo regnaret, & tamen ibidem orat pro illo, ut optatam requiem Deus illi concedat; & Epiphanius hæresi 75. dicit orari etiam pro SS. Patriarchis, Prophetis, Apostolis, & Martyribus.

RESPONDEO, si ita esset, Ecclesia oraret pro omnibus, & qualiter, etiam pro Martyribus; At non ita facit; nam ut Augustinus dicit tract. 84. in Ioan. *Ideo ad ipsam mensam non sic Martyres commemoramus, quemadmodum alios defunctos, qui in pace requiescunt, ut etiam pro eis oremus, sed magis, ut orent ipsi pro nobis.*

Neque videtur vllò modo conuenire, ut quis petat quod iam habet; & Christus cum orauit pro Lazaro, nondum acceperat quod petebat, neque enim Lazarus adhuc resurrexerat. Aliud autem est petere id quod scimus nos accepturos, aliud petere id quod iam accepimus. Porro AMBROSIVS sperabat Theodosium iam esse in cælo, & ideo gratulabatur ei; & simul quia non certò sciebat, an ita esset, pro illo orabat, EPIPHANIUS verò nusquam dicit in Ecclesia orari pro sanctis, sed dicit memoriam fieri in Ecclesia omnium defunctorum fidelium tam peccatorum, quàm iustorum. & addit: *Peccatorum* quidem, ut illis à Deo misericordiam imploremus: *iustorum* autem, ut eos à Christo separemus.

Separamus autem sanctos à Christo, non ut Martyr dicit, quia pro sanctis oramus, non pro Christo, sed quia pro san-

Etis offerimus sacrificium gratiarum actionis; Pro Christo autem non offerimus, sed ipsi potius Christo cum Patre, & Spiritu sancto offerimus. quod intelligi potest ex liturgia Græcorum, de qua Epiphanius loquitur, & quæ exstat in 5. tomo Chrysostomi, ibi enim fit commemoratio omnium Sanctorum, & dicitur: *Offerimus tibi, Domine, sacrificium pro Patriarchis, Apostolis, Prophetis, Martyribus, & præcipue pro beatissima Deipara*; quod autem hoc sacrificium non offeratur pro peccatis, sed pro gloria eorum, patet; Nam statim ¹⁰ subiungit liturgia: *Quorum supplicationibus respice nos Deus*; & deinde oratio subiungitur pro aliis defunctis: *Et memento, inquit, omnium fidelium defunctorum, qui dormierunt in spe resurrectionis, & quiescere eos facito, Sibi videtur lumen cultus tui*. Idem potest cognosci ex Augustino tract. 84. in Ioan. & ex Cyrillo catechesi 5. Mytagogica, & ex nostra liturgia, quæ omnino talis est, qualem Cyrillus, Epiphanius, & Augustinus describunt.

CAPVT SEXTVM.

20

*Asseritur Purgatorium testimoniis Patrum
Græcorum & Latinorum.*

RIMVS ex Patribus. CLEMENS lib. 8. constitut. cap. 47. longam orationem describit pro defunctis fieri solitam. DIONYSIVS de Eccles. hierar. cap. 7. parte 3. *Accedens, inquit, deinde venerandus Antistes, precem sacram super mortuum per agit, precat ut oratio illa diuinam clementiam, ut cuncta dimittat per infirmitatem humanam admissa peccata defuncto, eumque in luce statuat, & regione viuorum.* ATHANASIVS quæst. 34. ad Antiochum, quærit, num animæ sentiant vtilitatem ex orationibus viuorum. Respondet, sentire omnino. BASILIUS in liturgia instituit orationem pro mortuis.

Gregorius NAZIANZENSIS in orat. in Cæsarium circa finem: *Ipsi Deo, inquit, & nostras, & eorum, qui quasi in via purgationis prius ad hospitium peruenierunt, animas commendemus*; Ibidem orat. pro anima eiusdem Cæsarij. EPHREM in suo Test. *Asidue, inquit, in vestris orationibus mei memoriam faciat; etenim in Vanitate, & iniquitate vitam peregi meam.*

CYRIL

CYRILLVS catechesi 5. Myltagogica: *Denique pro omnibus oramus, qui inter nos sic a functi sunt, maximum credentes esse animarum iuuamen, pro quibus offertur OBSECratio sancti illius, & tremendi sacrificij.* EVSEBIVS lib. 4. de vita Constantini, dicit eum voluisse sepeliri in celebri templo, vt fieret particeps multarum orationum. EPIPHANIVS in fine operis contra hæreses, numerat inter dogmata Ecclesiæ orationem pro defunctis, & hæresi 75. Aërium hæreticum facit, quia hoc negabat.

CHRYSOSTOMVS hom. 41. in priorem ad Corinthios: *Inuetur, inquit, mortuus non lacrymis, sed precibus, supplicationibus, elemosynis.* Et infra: *Ne fatigemur mortuis auxilium ferre, preces pro illis offerentes.* Hom. 69. ad Popu. *Non temerè ab Apostolis hac sancita fuerunt, Et in tremendis mysteriis, defunctorum agatur commemoratio; seruit enim inde multum illis contingere lucrum, & utilitatem multam.* Idem hom. 32. in Matt. & 84. in Ioan. hom. 3. in epist. ad Philipp. & 21. in Act. Apostolorum, & alibi. THEODORETVS, lib. 5. hist. cap. 26. scribit Theodosium iuniorem procubuisse ad reliquias S. Ioannis Chrysoctomi, & orasse pro animabus parentum suorum Arcadij, & Eudoxiæ iam defunctorum.

THEOPHYLACTVS in cap. 12. Luca: *Hoc autem dico, inquit, propter oblationes & distributiones, quæ fiunt pro defunctis, quæ non parum conducunt etiam iis, qui in grauibus delictis mortui sunt.* DAMASCENVS in lib. de iis, qui in fide migrarunt, probat hanc veritatem testimoniis multis Dionysij, Athanasij, Gregorij Nazianzeni, Greg. Nissenij, & aliorum. videt etiam Palladium in historia Lausiaca, cap. 41.

Veniamus ad Latinos. TERTULLIANVS in li. de corona militis, inter traditiones Apostolicas numerat suffragia pro defunctis, & lib. de Monogamia vltra medium: *Pro anima, inquit, eius, coniugis defuncti, oras, & refrigerium interim adpostulet eis, & in prima resurrectione cõsortium, & offerat annuis diebus dormitionis eius; nam hac nisi fecerit, verè repudiavit quantum in ipsa est.* Idem lib. de exhortatione castitatis procul a medio.

B. CYPRIANVS lib. I. epist. 9. *Episcopi, inquit, antecessores nostri censuerant, ne quis frater excedens ad tutelam vel curam clericum nominaret, ac si quis hoc fecisset, non offerretur pro eo, nec sacrificium pro dormitione eius celebraretur.* Et infra: Et

ideo Victor cum contra formam nuper in Concil. à sacerdotibus datam Geminium Faustinum Presbyterum ausus sit actorem consistuere, non est quo pro dormitione eius apud Vos fiat oblatio, aut deprecatio aliqua.

B. AMBROSIVS lib. 2. epist. 8. ad Faustinum de obitu sororis: Itaq; inquit, non tam deploradam, quam prosequendam orationibus reor, nec maestificandam lacrymis tuis, sed magis oblationibus animam eius Deo commendandam. Vide etiam orationes de obitu Theodosij, de obitu Valentiniani, & de obitu Satyri, in quibus omnibus pro animabus prædictorum Deo supplicat, & sacrificia se oblatorum pollicetur.

B. HIERONYMVS in epist. ad Pammachium de obitu Paulinæ vxoris ante medium: Ceteri mariti, inquit, super tumulos coningum spargunt violas, rosas, lilia, floresq; purpureos, Pammachius noster sanctam familiam, ossaq; veneranda elemosyna balsamis rigat, his pigmentis, atq; odoribus foetet cineres quiescentes, sciens scriptum; sicut aqua extinguit ignem, ita elemosyna peccatum.

B. PAVLINVS Nolanus in epist. ad eundem Pammachium laudat eum quod & corpori, & animæ vxoris defunctæ satisfecerit, corpori lacrymis, animæ elemosynis. Idem in epist. 5. ad Delphinum Episcopum commendans illi animam fratris sui: Fac, inquit, vt orationibus tuis condonetur tibi, & illius animam de minimo sanctitatis tue digito destillans refrigerij gutta respergat. Et in epist. sequenti, quæ est prima ad Amandū, similia dicit commendans eandem animam Amando Episcopo.

B. AVGVSTINVS de cura pro mortuis, cap. 1. In Macharbaorum, inquit, libro legimus oblatum pro mortuis sacrificium, sed & si nusquam in Scripturis veteribus legeretur, non parua est vniuersa Ecclesia, quæ in hac consuetudine claret, auctoritas: Sibi in precibus sacerdotis, quæ Domino Deo ad eius altare funduntur, locum suum habet etiam commendatio mortuorum. Et cap. 4. Cum itaq; recolit animus Sibi sepulchrum sit charissimi corpus, & occurrit locus nomine Martyris venerabilis, eidem Martyri animam dilectam commendat recordantis & precantis affectus; quæ cum defunctis à fidelibus exhibetur, eum prodesse non dubium est. Et infra: Non sunt prætermittenda supplicationes pro spiritibus mortuorum, quas faciendas pro omnibus in Christiana, & Catholica societate defunctis, etiam tacitis nominibus quorumq;

sub generali commemoratione suscepit Ecclesia, et quibus ad ista defuncti parentes, aut filij, aut quiscumq. cognati, vel amici, ab una eis exhibeatur pia matre communi. Vide eundem in Enchirid. cap. 110. lib. 9. Confess. cap. 13. serm. de verbis Apostoli 17. & 34. lib. 21. ciuit. cap. 24. tract. 84. in Ioan. q. 2. ad Dulcitium, ac demum libro de hæresibus, cap. 53. vbi propterea hereticum facit Aërium.

B. GREGORIUS lib. 4. Dial. cap. 55. *Multum, inquit, solet animas etiam post mortem sacra oblatio hostia salutaris adiuvare, ita et hanc nonnunquam ipsa defunctorum anima expetere.* 10
Videantur. Et cap. 50. Quos grauis, inquit, peccata non deprimunt, hoc prodest mortuis, si in Ecclesia sepeliantur, quod eorum proximi, quoties ad eadem sacra loca conueniunt, suorum, quorum sepulchra conspiciunt, recordantur, et pro eis Domino preces fundunt.

ISIDORUS lib. 1. de officiis, cap. 18. *Nisi Catholica Ecclesia crederet fidelibus defunctis dimitti peccata, non pro eorum spiritibus, se elemosynam faceret, vel Deo sacrificium offerret.* VICTOR lib. 2. de perseq. Vandal. *Qui nos solennibus orationibus sepulturi sunt morientes?* 20

Denique B. BERNARDUS serm. 66. in Cantica, & Petrus Cluniacensis in lib. contra Petrobrusianos, directè in hunc errorem scripserunt. Malachias apud Bern. *Nec parum spes mihi repositum, inquit, in illa die, qua defunctis tanta à suis beneficia impenduntur.*

Sed opere pretium est audire quid ad hæc Calvinus, & Petrus Martyr respondeant. P. PETRUS Martyr respondet, ferè omnes Patres in aliqua re errasse, & enumerat eorum errores. At errarunt in priuatis opinionibus, quas alij refutarunt, at simul omnes in vno errore conuenire non possunt, quin Ecclesia vniuersa erret, & pereat. 30

CALVINUS autem quatuor dicit lib. 3. Instit. cap. 5. §. 10. PRIMO sic ait: *Ante mille, & CCC. annos vsu receptum fuit, et preces fierent pro defunctis. Et aliquot interpositis: Sed ammes, fateor, in errorem abrepti fuerunt. Certè ista confessio sufficit ad Calvinum damuandum. Quomodo enim credibile est, Ecclesiam per annos mille trecentos in tam crasso errore versatam, & nullum fuisse ex antiquis, qui resisteret, excepto Aërio, quem & nos, & Calvinistæ pro hæretico habemus?*

SECUNDO dicit, veteres orasse pro mortuis, non vt eos iuarent, sed vt ostenderent erga eos pium affectum, & vt se ipsos consolarentur. At hoc mendacium est; apertè enim Patres citati dicunt iuari animas, & distinguunt solatia viuorum ab auxiliis mortuorum, ac præsertim Augustinus in Eucharid. cap. 110. & lib. de cura pro mortuis passim.

10 TERTIO dicit, vulgus Christianorum cœpisse orare pro mortuis ex imitatione Gentilium, Patres autem accommodasse se opinioni vulgari, vt patet ex Augustino, qui in libro de cura pro mortuis, vbi præcipuè de hac re agit: *Ita dubie, haestanter, & frigide disputat, vt suo frigore, et lum extinguere possit pugnantium pro Purgatorio; Quod autem orauit pro matre, id fecit, inquit Caluinus, quia anile votum matris non examinauit ad Scripturas, & priuato quodam affectu omnibus probari soluit.*

At hoc etiam mendacium est; nam in primis nunquam fuerunt Patres diligentiores in Ethnicorum ritibus prohibendis, quàm quando multi Ethnici conuertebantur. Certè Tertullianus & Cyprianus seuerissimi fuerunt castigatores
10 omnis Ethnicæ superstitionis, adeo vt Tertullianus acerrimè reprehenderit Christianos milites, qui coronam gestarent more militum Ethnicorum; & tamen isti ipsi ad orationem pro defunctis hortantur. PRAETER EA Patres non solum non reprehendunt hunc vsus, sed etiam statuunt in suis Conciliis sic esse faciendum, hortantur vt sic fiat, ipsi exemplo suo præcedunt, ac demum multi eorum dicunt, hanc esse Apostolicam traditionem, & inter hæreticos numerant Aërium contrarium sentientem; quid amplius dicere poterant? B. A VG V S T I N V S autem in lib. de cura pro mortuis, ca.
30 4. disertè dicit, non dubium esse, quin iuuentur animæ; & in toto lib. non est vna syllaba, quæ dubium vel insinuet, de quo Caluinus loquitur; quod verò vocat anile votum S. Monica, & B. Augustinum arguit quod illud implere curauerit, non est mirum; est enim familiare Caluino reprehendere, & ridere sanctos.

QUARTO dicit, de Purgatorio autem adeo nihil asseruisse Patres, vt illud pro re incerta haberent: At hæc etiam est intoleranda impudentia, vel imperitia; nam in primis, etiam si nusquam nominassent Purgatorium, tamen satis intelligi poterat quid Patres de eo sentirent ex eo, quòd tam perspicuè

ficuè docent, animas quorundam fidelium egere refrige-
rio, & iuari orationibus uiuentium.

Deinde sunt apertissima loca in Patribus, ubi afferunt Pur-
gatorium, quorum pauca quædam afferam. Gregorius Nys-
sENVS in oratione pro mortuis procul à medio: *Vel, inquit,*
in presenti & ira precibus sapientiæq; studio purgatus, & post obi-
tum per expurgantis ignis fornacem expiatus, ad pristinam & fel-
iter redire felicitatem. Et infra: *Non poterit, inquit, a corpore*
egressus diuinitatis particeps fieri, nisi maculas animo immixtas
purgatorius ignis abstulerit. Et infra: *Alii, inquit, post hanc vi-*
tam purgatorio igne materia labes abstergentibus, &c.

AMBROSIVS in illud Psal. 36. *Gladium euaginauerunt*
peccatores: Et si saluos faciet, inquit, Dominus seruos suos, saluus
erimus per fidem, sic tamen salui quasi per ignem. Et si non exure-
mur, tamen & remur, quomodo tamen alij remaneant in igne, alij
pertranseant, alio loco nos doceat Scriptura diuina, nempe in ma-
re rubrum demersus populus est Aegyptiorum, transiit autem
populus Hebræorum, Moyses pertransiit, præcipitatus est Pha-
rao, quoniam grauius eum peccata meruerunt, eo modo præcipita-
buntur sacrilegi in lacum ignis ardentis, &c. Vide etiam eun-
dem serm. 20. in Psal. 118.

B. AVGVSTINVS lib. 21. ciuit. Dei, cap. 16. loquens de in-
fantibus baptizatis morientibus: *Non tantum pænis, inquit,*
non preparatur æternis, sed nec ulla post mortem purgatoria tor-
mentum patitur. Et cap. 24. loquens de adultis fidelibus, qui ta-
men cum leuibus peccatis decedunt: *Tales, inquit, constat an-*
te iudicij diem per pænas temporales, quas eorum spiritus pati-
untur, purgatos, æterni ignis supplicio non tradendos. Idem hom.
16. ex lib. 50. homiliarum: *Qui temporalibus pænis, inquit, di-*
gna gesserunt, per ignem quandam purgatorum transibunt, de-
quo apostolus, inquit, saluus erit, sic tamen quasi per ignem. Et
lib. 2. de Genes. contra Manich. cap. 20. *Qui forte agri non*
coluerit, & spinis eum opprimi permiserit, habet in hac vita ma-
ledictionem terra sua in omnibus operibus suis, & post hanc vi-
tam habebit & lignem purgationis, & pænam æternam. Deni-
que in Psal. 37. *Quia dicitur, inquit, saluus erit, ille ignis con-*
temnitur, ita planè quamuis saluum per ignem, grauior tamen
erit ille ignis, quam quidquid potest homo pati in hac vita.

Quare cum D. Augustinus lib. 21. ciuit. Dei, cap. 26. & in
Enchirid. cap. 69. dicit posse dubitari, & quæri, an post hanc
vitam

vitam animæ torqueantur purgatorio igne: non dubitat de pœna animarum, sed de modo & qualitate; nam in priore loco solum dubitat, an ignis purgatorius sit idem in substantia cum igne Gehenna; de quo dicitur Matth. 25. *Ite in ignem æternum.* In posteriore autem dubitat, an post hanc vitam vrentur animæ igne illo doloris de amissione temporalium, quo hic vti solent, cum rebus valde dilectis carere coguntur.

B. HIERONYMVS in fine commentarij in Isaiam: *Sicut* 10 *inquit, Diaboli, & omnium negatorum, atque impiorum, qui illerunt in corde suo, non est Deus, credimus æterna tormenta, sic peccatorum atque impiorum, & tamen Christianorum, quorum opera in igne probanda sunt, atque purganda, moderatam atque tramur & mixtam clementia sententiam iudicis.*

B. GREGORIUS lib. 4. Dialogorum, cap. 39. *De quibusdam,* inquit, *leuibus culpis esse ante iudicium, purgatorius ignis credendus est.* Et in Psal. tertium penitentialem in ipso initio: *Scio,* inquit, *futurum esse, ut post huius vitæ exitum, alij flammis expientur purgatoris, alij sententiam æternæ subeant dam-* 20 *nationis.*

ORIGENES hom. 6. in Exodum: *Qui saluus fit,* inquit, *per ignem saluus fit, ut si quid fortè de specie plumbi habuerit admixtum, id ignis decoquat, & resoluat, ut efficiantur omnes aurum purum.*

Gregorius NAZIANZENSIS oratione in sancta luminis circa finem: *In altero suo,* inquit, *igni baptizabuntur, qui postremus est Baptismus, nec solum acerbior, sed & diuturnior, qui crassam materiam instar ferri depascitur, utiq; omnis leuitas eam absumit.*

BASILIVS in cap. 9. Isaiæ: *Si igitur per confessionem,* inquit, *detexerimus peccatum, iam succrescens gramen arefecimus, dignum planè quod depascatur ac deuoret purgatorius ignis. Et infra: Non omnimodam,* inquit, *internecionem, & exterminium comminatur, sed innuit expurgationem, iuxta Apostoli sententiam, ipse autem saluus erit quasi per ignem.*

EVSEBIUS Emissenus hom. 3. de Epiphania: *Hæc pœna,* inquit, *infernalis illos manebit, qui amisso, & non seruato Baptismo in æternum peribunt; hi verò qui temporalibus penis digni gesserunt, per fluuium igneum, per cada feruentibus globis horrenda transibunt.*

THEODORSTVS in scholiis Græcis in I. Cor. 3. Hunc ipsum ignem purgatorium credimus, in quo anima defunctorum probantur, & repurgantur, sicut aurum in constatorio. OECY-
MENIVS in eundem locum: Saluabitur & ipse quoque, non ta-
men citra dolorem, & par est eum qui transit per ignem, & acon-
cretis leuioribus maculis expiatur. TERTVLLIANVS lib. de a-
nima, cap. 17. In carcerem te mander infernum, & de non dimitt-
raris, nisi modico quoque delicto morare resurrectionis expensio. CY-
PRIANVS li. 4. epist. 2. Aliud est pro peccatis longo tempore cru-
ciatum purgari, & emendari diu igne, aliud peccata omnia pas-
sione purgasse.

HERONYMVS lib. I. contra Pelagianos ultra medium: Si autem Origenes omnes rationabiles creaturas dicit non esse per-
dendas, & Diabolo tribuit penitentiam; quid ad nos qui Diabo-
lum, & satellites eius, omnesque impios & prauaricatores dicimus
perire perpetuo, & Christianos si in peccato præuenti fuerint,
saluandos esse post pœnas?

PAVLINVS epist. I. ad Amandum: Ob hoc impensè rogamus,
ut quasi frater orandi labore conspires, & misericors Deus refrige-
ret animam eius stillicidiis misericordiam suam per orationes & 20
stras, &c. BOETIVS lib. 4. Psalm. 4. Nulla ne supplicia animarum
post defunctum morte corpus relinquit? & magna quidem, quo-
rum alia pœnali acerbitate, alia purgatoria clementia exerceri
puto. ISIDORVS lib. I. de diuinis officiis, cap. 18. Nam & cum
Dominus dicit, Qui peccauerit in Spiritum sanctum, non remit-
tetur ei neque in hoc seculo, neque in futuro, demonstrat quibus-
dam illis dimittenda esse peccata, & quodam purgatorio igne
purganda.

BEDA in Psalm. 37. Quidam, inquit, committunt quedam
peccata venialia grauiora & leuiora, & ideo necesse est ut hi ta-
les in ira corripiantur, id est, in purgatorio igne nunc interim an-
te diem iudicij ponantur, & qui in eis immunda sunt, per illum
exurantur, & sic tandem idonei esse cum his, qui in dextra coro-
nandi sunt, inueniantur. Ibidem dicit hunc ignem grauior-
rem esse pœnis latronum, martyrum, &c.

Petrus DAMIANVS in ferm. 2. de S. Andrea: Non tibi blan-
diaris si grauius peccanti leuior penitentia a mansueto, & el
disimulante dicatur, cum in purgatoris ignibus persciendura
sit quidquid hic minus feceris, quia dignos penitentiam fructus
quærit altissimi.

ANSELMVS INI. Cor. 3. Nam de quibusdam leuibus culpis esse ante corporum resurrectionem, purgatorius ignis credendus est. Et Ibidem asserit esse grauissimam poenam.

BERNARDVS serm. de obitu Humbetti: *Volat fratres ir-reuocabile tempus, & dum creditis vos cauere istam poenam minimam, incurritis ampliozem; illud enim scitote, qui a post hanc vitam in purgatoris locus centupliciter, quae fuerint hic neglectae, redduntur & ad nouissimum quadrantem. scio ego quam duru sit homini dissoluto apprehendere disciplinam, serbo so silentium pati, sagari solito stabilem permanere, sed durius, & multo durius erit futuris illas molestias tolerare.*

LACTANTIUS lib. 7. cap. 21. *Quorum peccata pondere aut numero praeualuerint, perstringentur igne atque amburentur, &c.*

HILARIUS in Psal. 118, in illud; *Concupiuit anima desiderare iudicia iustitiae tuae: Nobis, inquit, est ille indefessus ignis obandus, in quo subeunda sunt graua illa expianda à peccatis anima supplicia.*

20

CAPVT SEPTIMVM.

Idem asseritur ratione.



ARGUMENTVM QVARTVM ex rationibus. PRIMA ratio; Quaedam peccata sunt venialia, solaque temporali poena digna. At fieri potest, vt cum for-
lis talibus homo decedat ex hac vita, igitur necesse est in alia vita posse purgari.

Esse autem quaedam peccata venialia probatur ex Iacobo, quific ait Iacobi. *Vnusquisque tentatur à concupiscentia sua, concupiscentia, cum conceperit, parit peccatum; peccatum, cum consummatum fuerit, generat mortem.* Hic describitur peccatum veniale ex imperfectione actus. Neque locum hic habet distinctio haereticorum de imputatione; nam Iacobus explicat processum peccati secundum se, ac docet, post tentationem concupiscentiae, quae sine peccato esse potest, continud sequi peccatum, si quis non caueat; nam ex concupiscentia oritur delectatio in parte inferiori, quae nonnullum peccatum est, non tamen mortiferum, si non adfit consensus mentis deliberatus; ided enim subiungit: *Peccatum vero si consummatum fuerit, accedente nimirum pleno consensu, generat mortem.*

Prae-

Præterea 1. Cor. 3. *Qui supera discat ligna, fœnum, stipulas, saluus erit quasi per ignem.* Hic describitur veniale ex leuitate materię, & quomodocunque intelligamus verba Apostoli siue de hac vita, siue de alia, siue de doctrina, siue de omnibus operibus, necessariò cogimur exponere per ligna, fœnum, stipulas, peccata venialia, quando quidem qui ista habet, saluatur quasi per ignem. A VGVS TINVS lib. 83. q. 26. *Alia, inquit, sunt peccata infirmitatis, alia imperitia, alia malitia; infirmitas contraria est virtuti, imperitia sapientiæ, malitia bonitati; quisquis igitur nouit quid sit virtus, & sapientiæ Dei, potest existimare quæ sint venialia peccata; & quisquis nouit quid sit bonitas Dei, potest existimare quibus peccatis certa pœna debeatur, & hic, & in futuro seculo, quibus benè tractatis, probabiliter indicari potest, qui non sine cogendi ad penitentiam luctuosam & lamentabilem, quamuis peccata fateantur, & quibus nulla omnino speranda sit salus, nisi sacrificium obtulerint Deo, spiritum contribulatum per penitentiam.*

Probatur VERTIMO ratione; nam intelligibile non est, quomodo verbum ociosum ex natura sua dignum sit perpetuo odio Dei, & sempiternis flammis; hic enim in terris stultissimus haberetur, qui ob leuissimam offensionem amici, nec malo animo factam, nollet amplius esse amicus, immò vsque ad mortem persequeretur eum, quem amicum paulò antea habuerat; maneat igitur, quædam esse peccata venialia, ac sola pœna temporaria digna. Quod autem cum eiusmodi peccatis aliqui interdum de hac vita migrent, ac proinde in alia vita purgatione temporali egeant, probatur hoc modo. Potest quis, dum moritur, habere voluntatem permanendi in peccato veniali, igitur tale peccatum delerit in morte non potest; præterea cum *septies in die cadat inustus*, vt dicitur Proverb. 24. & multi moriantur repente, quomodo credibile est non mori aliquos cum peccato veniali? Hæc est igitur prima ratio.

SECUNDA ratio; Cùm reconciliantur Deo peccatores, non dimittitur semper cum peccato tota pœna temporalis; at potest fieri, & sæpe fit, vt in tota vita aliquis non satisfecerit plenè pro temporali illa pœna; ergo necessariò statui debet Purgatorium. probatur maior propositio breuiter; nam alibi ex professo probabitur, 2. Reg. 12. cùm Dauid dixisset: *Peccanti Domino, ait Propheta: Deus quoque transiulit à te iniquitatem,*

quitatem, sed quia blasphemare fecisti inimicos nomen Domini, filius qui natus est tibi morse morietur. Num. 12. Cum Maria murmurasset contra Dominum, punita est morbo lepræ: orante autem pro ea Moysè, dimissa est ei culpa, & tamen peccatam voluit Deus ut illa lueret per vnam hebdomadam.

Ad hæc & similia responderet Calvinus lib. 3. Instit. cap. 4. §. 31. duo esse genera flagellorum Dei, quædam enim sunt proprie pœnæ, & infliguntur à Deo ut iudice in vindictam peccatorum præteritorum, ut iustitiæ satis fiat; quædam autem sunt castigationes, quæ infliguntur à Deo ut patre, non in vindictam peccatorum præteritorum, sed ad futurorum remedium, nimirum ut homo admoneatur flagello, ne iterum facilis sit ad peccandum. Primum genus, inquit Calvinus, ad solos inimicos pertinere, secundum ad solos amicos; & proinde cum non sint istæ pœnæ ex iustitia luende, non esse opus ut maneat earum debitum post mortem, quando nõ est periculum recidendi in peccatum.

At frustra laborat Calvinus; nam etsi fatendum est, flagella iustorum esse etiã paternas castigationes, & remedia contra peccata futura, tamen simul est agnoscenda vera pœna & satisfactio debita culpæ præteritæ ex iustitia. quod sic probatur; nam in primis 2. Reg. 12. exprimitur causa cur puniretur Dauid, & non dicitur ne iterum pecces, sed: *Qui a blasphemare fecisti nomen Domini.*

Deinde mors est vera pœna peccati originalis, & eam luunt homines iusti, non ut abstineant à peccato, sed ut satisfacciant iustitiæ diuinæ: quod patet, quia non est inflicta à Deo post peccatum, ut sunt castigationes paternæ, sed est lege statuta ante peccatum tanquam pœna peccati, & eadem perferuerat post peccatum & peccati remissionem, ut patet Gen. 4. *Quacumq; die comederis, morte morieris.* Et Rom. 5. *Per unum hominem peccatum in hunc mundum intravit, & per peccatum mors, in quo omnes peccauerunt.* Et Rom. 6. *Stipendium peccati mors.* Et Calvinus ipse lib. 2. Instit. ca. 1. §. 8. aperte confitetur, mortem veram esse peccati pœnam; deniq; quomodo potest esse mors flagellum paternum ad peccatum cauendum institutum? Qui enim moritur, non potest amplius emendari.

Præter mortem istam communem, quæ est pœna peccati originalis, habemus alia exempla in Scriptura eorum, qui puniti sunt morte violenta, cum eis remissum esset peccatum,

tum, cum tamen mors non possit esse paterna castigatio in remedium peccati futuri; nam Exod. 32. Deus pepercit populo orante Moysē, & tamen Moyses in vindictam peccati iussit occidi multa millia de populo sine vilo defectu. & similiter Num. 14. Cum populus murmurasset, & Deus placatus à Moysē fuisset, plurimi tamen in deserto perierunt. Incredibile est autem ex tot millibus nullum fuisse quem delicti poenituerit. 3. Reg. 17. Propheta Domini quia inobediens fuit voci Domini, à leone extinguitur, iuxta quod et ab altero Propheta prædictum fuerat, & tamen vt intelligeremus ei culpam antea remissam fuisse, & sanctè illum obuisse, neque eius cadauer, neque iumentum, quo vectus fuerat, leo tetigit, sed vtrumque potius custodiuit, donec venerunt, qui eum sepelirent; denique. Cor. 11. dicitur: *Ideo inter vos multi imbecilles, & dormiunt multi.* vbi, vt exponunt Ambrosius & alij, Apostolus indicat in primitiua Ecclesia multos eorum qui indignè communicabant morte à Deo punitos fuisse, quibus tamè culpam antea remissam patet ex eo quod Apostolus subiungit: *A Domino corripiamur, ne cum hoc mundo damnemur.*

His accedant duo clarissima B. AVGVSTINI testimonia. Primum est tract. 124. in Ioan. *Cogitur homo tolerare etiam remissis peccatis, quamuis vt in eam veniet miseriam primum fuerit causa peccatum; productior est enim pena quam culpa, ne parua peccata et in culpa si cum illa finiretur & pena: ac per hoc vel ad demonstrationem debita miseria, vel ad emendationem labilis vita, vel ad exercitationem necessaria patientia, temporalitè & hominem detinet pena etiam quem iam ad damnationem se nupiternam reum non detinet culpa.* Secundum est in Psal. 50. *Veritatem, inquit, dilexisti, hoc est, impunita peccata eorum etiam quibus ignoscis non dimisisti, sic prarogasti misericordiam vt seruares & veritatem, ignoscis confitenti, ignoscis, sed serpsam puni-enti, sic seruat misericordia, & veritas.*

Probatur iam assumptio huius argumenti; nam multi qui plurima peccata commiserunt, in articulo mortis conuertuntur, quando nullam possunt agere poenitentiam; ex quo certè illud sequitur, vt post hanc vitam satisfacere debeant. Respondent in morte deleri omnia. CONTRA; nam mors est poena peccati originalis, & ideo communis omnibus etiam infantibus, ergo pro actualibus debet inueniri

alia pœna. Præterea Deus iniuste ageret, nec videretur habere prouidentiam rerum nostrarum, si vna & eadem pœna, id est, naturali morte puniret peccata magna, & parua, multa, & pauca.

TERTIA ratio sumitur à communi opinione omnium Gentium: id enim confitentur Hebræi, Mahumetani, Gentiles, ii que tam Philosophi, quàm Poëtæ. De HEBRÆIS patet ex lib. 2. Machabæorum, cap. 12. nam saltem fides adhibenda est ei libro quæ adhibetur Liiuo; præterea Iosephus filius Gorionis in lib. de bello Iudaico, cap. 91. indicat Iudæos confuuisse orare pro mortuis, non tamen pro illis qui se interimunt.

De MAHUMETANIS patet de Alcorano, vbi Purgatorium disertè confitentur. De ETHNICIS patet ex Platone in Gorgia. & in Phædone; ex Cicerone in somnio Scipionis in fine, & Virg. 6. Æneid. Ergo exercentur pœnis, Veterumq; malorum supplicia expendunt. & ex Claudiano lib. 2. in Rufinum circa finem:

Quos sibi per varios amnes, per mille figuras
Egit Lethæo purgatos flumine, &c.

Neque dicat aliquis hoc potius argumentum esse erroris, & fabularum, quando quidem id sentiunt Ethnici, & Mahumetani; nam illa in quibus omnes ferè nationes conueniunt, vix possunt aliunde prouenire, quàm à naturali lumine omnibus hominibus communi. quæ enim sunt excogitata & conficta ab hominibus, varia sunt, & diuersa pro Gentium varietate. sicut ergo Deum esse, in quo omnes nationes conueniunt, dicimus verissimum esse, nec tamen recipimus in particulari Deos varios & multiplices, quos sibi quælibet natio fabricauit; & sicut post hanc vitam esse pœnas, & præmia, in quo etiam conueniunt omnes, recipimus veterum, nec tamen recipimus varias fabulas, quibus hoc explicant (nam esse pœnas, & præmia post hanc vitam docuit omnes homines cognitio diuinæ prouidentia, fabulas autem ex se sinxerunt) ita etiam Purgatorij confessionem, in qua omnes ferè Gentes conueniunt, oportet dicere esse confessionem luminis naturalis; eiusdem enim prouidentia diuinæ cognitio docuit Purgatorium, quæ docuit infernum, & paradysum, saltem generali & confuso quodam modo, quia nimirum videmus pœnas, & præmia ita distribui in hac vita, vt

plura bona habeant mali, & plura mala boni vt plurimum; inde indicamus diuinam prouidentiam in aliam vitam distulisse iudicium, & veram distributionem præmiorum, & pœnarum.

Rursum videmus ex iis, qui migrant ex hac vita, alios esse valde bonos, alios valde malos, alios mediocriter bonos, & mediocriter malos; quocirca iudicamus naturali lumine esse post hanc vitam pœnas æternas pro valde malis, præmia æterna pro valde bonis, ac pœnas temporarias, & per eas transfutum ad præmia pro iis qui sunt mediocriter mali, vel boni. hanc rationem sequutus est Plato, & alij, qui solo lumine naturali præditi Purgatorium esse confessi sunt.

QUARTA ratio sumitur ab apparitionibus animarum, quæ se in Purgatorio esse renunciauerunt, atque opem à viuis implorauerunt, quas apparitiones cum viri grauissimi reuerent, non immeritò veras fuisse credimus, rideant licet Lutherus, & Magdeburgenses. S. GREGORIUS lib. 4. Dialog. cap. 40. scribit de anima Paschasij, quæ in Thermis Puteolanis apparuit S. Germano Episcopo, & eius precibus liberata est. & cap. 55. scribit aliud simile exemplum; & præterea de quodam Monacho suo, pro quo triginta Missas ipsemet Gregorius dici iussit, & ex eius apparitione didicit liberatum.

Gregorius TIRONICVS lib. de gloria Confess. ca. 5. scribit, B. Martino S. virginem quandam nomine Vitalinam iam defunctam significasse se adhuc in Purgatorio degere ob leue quoddam peccatum, ac paulò post precibus eiusdem S. Martini liberatam.

Petrus DAMIANI in epist. ad Desiderium scribit, B. Scytherinum Coloniensem Episcopum apparuisse cuidam Presbytero eiusdem Ecclesiæ, & eique significasse se in Purgatorio grauiter torqueri, quòd horas canonicas non distinctis temporibus perfoluisset, sed mane omnes horas simul coaceruasset, vt tota die negotiis Imperialibus liberiùs vacare posset.

BEDA lib. 3. hist. Anglorum, cap. 19. scribit, beatum Furseum à mortuis resurgentem narraisse multa quæ vidit de purgatorijs pœnis, & lib. 5. cap. 13. refert mirabilem visionem cuiusdam Diethelmi, qui similiter mortuus, & postea reuiu-

seens mira narravit de inferno, purgatorio, & paradiso, & vita eius sequens, ac fructus spiritualis, quem in aliis multis operatus est, testabatur veram fuisse visionem.

D. BERNARDYS in vita B. Malachia refert, B. Malachiam sororem eius defunctam non semel apparuisse cum adhuc in purgatoriiis pœnis degeret, & tandem, frequenti Eucharistia ad Deum oblatione liberatam. Et lib. 1. vita B. Bernardi, cap. 10. refert Gulielmus Abbas, qui vitam S. Bernardi scripsit, ipso adhuc vivente, apparuisse aliquando B. Bernardo vnum ex defunctis Monachis, in Purgatorio laborantem, & precibus, ac sacrificiis viri sancti paulò pòst liberatum. quod exemplum ipsum B. Bernardum narrare solitum scribit auctor eius vitæ.

Libro primo vitæ B. Anselmi similiter legimus, beatum Anselmum annum integrum institisse sacrificiis quotidianis, & tandem apparente sibi amico defuncto, pro quo tamdiu orauerat, didicisse eum de Purgatorio liberatum. plura similia legi possunt apud Vincentium lib. 23. speculi historialis, in reuelationibus S. Brigittæ, & in vita Christina mirabilis: sed quæ attulimus sunt magis authentica.

Respondent Magdeburgenses, esse fabulas. At nec est credibile, tam sanctos viros decipere voluisse, neque etiam ipsos deceptos fuisse, cum haberent spiritum discretionis, & essent amici Dei singularissimi.

ULTIMA ratio esse potest, quia ista opinio, quæ tollit Purgatorium, non solum est falsa, sed etiam perniciosa: sic quidem homines socordes facit in peccatis cauendis, & bonis operibus faciendis. Qui enim cogitat nullum esse Purgatorium, sed omnia peccata per mortem aboleri in iis qui moriuntur cum fide, facile dicit apud se, Quorsum ego laboro in ieiuniis, precibus, cōtinentia, elemosynis? Cur fraudor meum deliciis & voluptatibus? quando quidem in morte sue pauca, siue multa peccata habuero, omnia delebuntur. At qui cogitat remanere præter Gehennam, ignem acerrimum Purgatorij, & quidquid hîc deletum non fuerit per debitæ pœnitentiæ opera ibi diluendum, certè diligentior, cautiorque euadit.

CAPVT OCTAVVM.

Soluntur argumenta ex Scripturis.

VPEREST argumenta aduersariorū soluere, quæ partim ex Scriptura, partim ex Patribus, partim ex naturali ratione sumuntur.

PRIMA obiectio, Psal. 126. *Cum dederit dilectis suis somnum, ecce hæreditas Domini:* non igitur Purgatorium intercedit inter mortem fidelium, & cælestis hæreditatis ¹⁰ consequentem.

RESPONDEO, tractat Psalmus de generali resurrectione, ut S. Augustinus rectè exponit: & hic est sensus eorum verborum; Cum dederit dilectis suis somnū, id est, cum dormierint per corporalem mortem omnes electi, ecce hæreditas Domini, id est, continuò tunc apparebit hæreditas Christi, resurgentibus in gloria omnibus eius electis, quæ hæreditas est etiam merces eiusdem Christi, qui passione & morte sua nos acquisiuit. Itaq; idem est hæreditas, & merces, idem filij, & fructus ventris; filij enim Dei per adoptionem sunt hæreditas Domini; & iidem filij, qui & fructus ventris appellantur, sunt eiusdem Domini merces. Adde quod in textu Hebraico, quem aduersarij Latino præferunt, non habetur, cum dederit, sed sic dabit. **¶** **¶**. proinde ruit vis tota argumenti, non enim exprimitur quando adueniet hæreditas Domini.

SECUNDA obiectio, Ecclesiastæ 9. *Quodcumq; facere potest manus tua instanter operare, quia nec opus, nec ratio, nec sapientia, nec scientia erunt apud inferos, quò tu properas.* Videtur enim sapiens his verbis significare voluisse, nullum esse remedium in alio seculo. ³⁰

RESPONDENT aliqui, hæc dici à Salomone in persona impiorum, qui non modò Purgatorium, sed etiam Gehennam tollunt, & nihil omnino esse credunt præter hanc vitam. Alij docent, Salomonem ad eos loqui, qui otiosè & flagitiosè viuunt, & ad Gehennam rectà proficiscuntur: quo in loco verissimum est, nullum esse remedium vel solatium, vtramquè expositionem attingit S. Hieronymus in commentario. At S. Gregorius lib. 4. Dialog. ca. 39. accommodat hæc omnia satis aptè ad eos etiã, qui ad Purgatoriū deducuntur, nam soli illi purgari possunt, & precibus viuentium iuari,

qui dum hinc viuerent, id meruerunt bonis suis operibus, vt in alia vita iuari possent; quare omnes debent in hac vita quidquid possunt boni peragere, quia in alia vita non iuuantur, nisi per ea quae hinc gesserunt meruerint, vt iuari possent.

TERTIA obiectio Ecclesiastæ II. *Si ceciderit lignum ad austrum, aut ad aquilonem, in quocunq; loco ceciderit, ibi erit.* Non igitur, inquit, datur tertius locus, id est, Purgatorij, vnde aliquando exeundum sit.

IO RESPONDEO, ad litteram Sapientem loqui de morte corporali, ac velle dicere, ita homines necessariò morituros, & cum mortui fuerint, per se nunquam surrecturos, quemadmodum lignum tandem aliquando cadit, & ibi manet, ac putrescit, vbi cecidit. si tamen velimus, hæc ad statum animæ accommodare, tum dicendum erit, eos qui ad Purgatorium pertinent, ad austrum cecidisse, id est, ad statum salutis æternæ, & in eo statu salutis perpetuò permansuros: vel certe dici poterit per austrum gloriam cœlestem, per aquilonem Gehennam intelligi; sed non omnes cadere ad austrum, aut ad aquilonem. PORRO, hunc locum nihil officere assertioni Purgatorij, ex eo etiam intelligi potest, quod si Purgatorij assertioni officeret, officeret etiam assertioni eius loci, ad quem sancti Patres ante Christi aduentum descendebant, siue is locus sinus Abrahæ, siue limbus Patrum, siue infernus nominetur; constat enim Patres in eo loco non mansisse perpetuò. Vide Hieronymum in commentario, & Bernardum serm. 49. ex paruis.

QUARTA obiectio, Ezechielis 18. *Cum auersus fuerit impius ab impietate sua, omnium iniquitatum eius nõ recordabor.* At quomodo, inquit Petrus Martyr, non recorderetur Deus iniquitatum amicorum suorum, si eas tam seuerè in Purgatorio punit?

RESPONDEO dupliciter. PRIMO, non recordari iniquitatum, nihil aliud esse, quàm non seruare inimicitiam cum eo qui peccauit; nam si recordari iniquitatum, esset punire mala merita, recordari iustitiarum esset remunerare bona merita. At non concedunt aduersarij, recordari iustitiarum, esse remunerare bona merita, ne videlicet merita iustorum admittere cogantur, igitur neque debent concedere, recordari iniquitatum esse punire iniquitates; nam

nam Ezechiel eodem modo de iustitia & de iniquitate loquitur.

SECUNDO, responderi potest, recordari iniquitatum esse quidem punire, sed punire in æternum; nam cum ibidem legimus, si iustus auerterit se à iustitia, omnes iustitiæ eius non recordabuntur: cogimur ita exponere, ut dicantur iustitiæ tradi obliuioni, non quod non remunerentur temporali aliquo præmio, sed quod non liberent hominem à Gehenna, nec remunerentur præmio sempiterno; nam alioqui opera bona impiorum non fraudari temporali mercede, docent Patres, Chrysostomus hom. 67. ad populum Antiochenum, Hieronymus in cap. 29. Ezechielis, Augustinus lib. 5. de ciuitate Dei, cap. 15. & Gregorius hom. 40. in Euangelia, & colligitur ex illis verbis Luc. 16. *Recepisti bona in Vita tua.* 10

QUINTA obiectio, Matth. 25. Duo solum ordines hominum inueniuntur, aliis enim dicitur: *Venite benedicti.* Aliis: *Item maledicti.* Item Marci ultimo: *Qui crediderit, & baptizatus fuerit, saluus erit, qui uero non crediderit, condemnabitur.* Denique; Ioan. 3. *Qui credit, non iudicatur, qui non credit, iam iudicatus est: Non igitur, inquit Brentius, locus illius remanet Purgatorio, cum duo solum sint loca post hanc uitam.* 20

RESPONDEO, in extremo iudicio, de quo agitur Matth. 25. rectè duos tantum fieri ordines, quia tunc Purgatorium finem accipiet, ac deinceps duo tantum loca remanebunt, Paradisus, & Gehenna. Porro, qui credit, saluus erit, & non iudicatur, id est, non condemnatur, modò etiam addat cetera quæ requiruntur; fides enim ex se iustificat, & saluat, si aliunde non sit impedimentum. quemadmodum dicere solemus, ex hoc semine nascetur arbor, si uidelicet non desint calor solis, humor aquarum, & si qua alia requiruntur; neque; 30
continuo qui saluus erit per fidem, sine Purgatorio saluus erit; multi enim saluantur, sic tamen quasi per ignem, ut supra ex Apostolo demonsttrauimus.

SEXTA obiectio, Lucæ 23. Latroni in extrema hora conuerso dicitur à Christo: *Hodie mecum eris in Paradiso.* Non ergo, inquiunt Petrus Martyr, & Bernardinus Ochinus, remanet Purgatorium pro iis, qui in hac uita non egerunt penitentiam. RESPONDEO, mortem illam durissimam patientissimo animo toleratam, & confessionem tam admittendam eo tempore, quo Christum Apostoli ipsi negabant,

potuisse iustè in plenam satisfactionē reputari. Adde, quòd priuilegia paucorum legem non faciunt.

SEPTIMA obiectio, Rom. 8. Nihil damnationis est iis, qui sunt in Christo IESU.

RESPONDEO, Paulum eo loco disputare de concupiscentia, ac velle dicere, iis qui sunt in Christo IESU, & eius gratia muniti, non consentiunt motibus carnis suæ, nihil peccati contrahere ex eiusmodi motibus. Itaque hic locus non Purgatorium oppugnat, sed hæresim aduersariorum, **10** qui vera peccata esse volunt eos etiam motus, quos interdum iustus sentit, licet eis non consentiat.

OCTAVA obiectio, 1. Cor. 5. *Si domus terrena nostra habitationis dissoluitur, habemus domum non manufactam, æternam in cælis*; recta igitur post mortem sine ullo Purgatorio pij homines transferuntur in cælum.

RESPONDEO, B. Paulum id solùm asserere, patere domum cœlestem post mortem, non patere ante mortem; quod autem continuò omnes pij transferantur ad cælum post mortem, ipsum non dicere, sed contrarium potius indicare, cum ait: *Sicut tamen vestiti & non nudi inueniamur*. Significat enim his verbis eos, qui meritis & virtutibus vestiti sunt, ac proinde perfectam penitentiam in hac vita egerunt, mox in domum cœlestem deduci; alios autem saluari quidem, sed sicut tamen, quasi per ignem, vt ipse idem ait, 1. ad Corinth. 3.

NONA obiectio, 2. Corinth. 5. *Omnes astabimus ante tribunal Christi, & referat unusquisque prout gessit in corpore, siue bonum, siue malum*. At si post hanc vitam peccata remitterentur, & locus esset purgationi, certè non reciperet unusquisque prout gessit in corpore.

30 RESPONDEO, verissimam esse B. Pauli sententiam; nam etiam illi, qui remissionis & purgationis locum inueniunt in futuro seculo, nihil recipiunt, nisi quod gesserunt in corpore; id enim meruerunt perseuerando in fide & caritate vsque ad mortem, vt etiam post mortem purgari & iuuari possent; qua ratione etiam sancti viri post mortem, etsi nihil proprie mereantur, tamen impetrant à Domino quidquid postulant, quoniam id meruerunt in hac vita rectè viuendo, vt etiam post hanc vitam à Domino exaudirentur. Vide hoc ipsum quod nos docemus, apud Dionysium libro de Ecclesiastica

Castica hierarch. cap. vlt. parte 3. apud Augustinum libro En-
chiridij, cap. 110. & libro de cura pro mortuis, cap. 1. & apud
Gregorium li. 4. Dialogorum, cap. 39. Atque ad eundem mo-
dum intelligenda sunt illa: *Reddet vnicuique secundum opera
sua*, Rom. 2. Et illa: *Vnusquisque onus suum portabit*. Et: *Qua
seminauerit homo, hæc & metet*, Galat. 6.

DECIMA obiectio, Apocal. 14. *Beati mortui, qui in Domi-
no moriuntur, amodo iam dicit spiritus, Si requiescant à labori-
bus suis, opera enim illorum sequuntur illos*. At pij omnes in
Domino moriuntur, omnes igitur pij post mortem requie-
scent, neq; vllus est qui in Purgatorio torqueatur.

RESPONDEO cum S. Anselmo, in commentario huius
loci, illud, *amodo*, non significare à morte vniuscuiusque, sed
ab extremo iudicio, de quo in toto eo capite S. Ioannes lo-
quitur. Itaque hic erit sensus; Beati morui, qui in Domino
moriuntur; amodo enim, id est, à fine huius iudicij, de quo
nunc loquor, in æternum requiescent à laboribus suis; vel si
id minus alicui probetur, respondere possumus cum Richar-
do de S. Viatore, & Haymone in hunc locum, loqui B. Ioan-
nem de viris perfectis, ac præsertim de sanctis Martyribus,
(eos enim eo loco consolari volebat) qui simpliciter moriun-
tur in Domino, neque aliquid purgandum secum ferunt;
nam qui decedunt cum peccatis venialibus, aut cum debito
penæ alicuius temporalis, ij, non simpliciter moriuntur in
Domino, sed partim in Domino ratione caritatis, quam se-
cum ferunt, partim non in Domino ratione peccatorum,
quæ nihilominus secum ferunt. Neque miram videbitur,
quod aliquos dicamus mori partim in Domino, partim non
in Domino, si legatur S. Augustinus lib. 3. contra duas epi-
stolas Pelagianorum, cap. 3. vbi eosdem homines in hac
vita partim esse dicit filios Dei, partim filios
huius seculi. Atque hæc de

Scripturis.



CAPVT NONVM.

Soluuntur obiectiones ex Patribus.

EX PATRIBVS profert Brentius primò Cyprianum, qui tract. i. contra Demetrianum, ait in fine: *Quando isthinc excessum fuerit, nullus iam penitentia locus est, nullus satisfactionis effectus.*

RESPONDEO, loqui eum de satisfactione pro culpa, que
 10 præcedit iustificationem; Patres enim disertè duplicem ponunt satisfactionem. VNAM ante iustificationem, qua Deus placatur de congruo, & inclinatur ad culpæ remissionem; de qua Daniel 4. *Peccata tua elemosynis redime.* ALTERAM post iustificationem, qua Deo ex condigno satis fit pro peccata. Quod hic CYPRIANVS de priore loquatur, patet ex præcedentibus, vbi ait: *Hortamur, inquit, dum adhuc aliquid de seculo superest, Deo satisfacere, & ad veræ religionis candidam lucem de profundo tenebræ superstitionis emergere.* Item ex sequentibus; nam post verba citata à Brentio, immediatè
 20 sequitur: *Hic Vita aut amittitur, aut tenetur.*

SECUNDO, profert Chrylostomum homil. 2. de Lazaro, vbi sic dicitur: *Cum hinc discesserimus, non est in nobis strum penitere, neq; commissa diluere.* Et rursum: *Neq; enim qui in præsentia peccata non abluerunt, postea consolationem aliquam inuenturi sunt.*

RESPONDEO, loqui eum de remissione mortalium; nam exemplo Epulonis, qui in Gehenna cruciabatur, monet, ne differamus conuersionem in aliam vitam. Nemo autem Catholicorum docet, culpas letales remitti in Purgatorio.
 30 rio.

TERTIO, proferunt Ambrosium libro de bono mortis, cap. 2. *Qui enim, inquit, hic non accepit remissionem peccatorum, illic non erit, nimirum in patria beatorum.*

RESPONDEO, loqui Ambrosium de remissione mortalium; nam subiungit explicans: *Non erit autem, quia ad vitam æternam non potuerit peruenire, quia Vita æterna remissio peccatorum est;* vbi vitam æternam vocat gratiam iustificationis, quæ est vita quædam æterna inchoata; nisi enim hinc vitam æternam inchoemus, nunquam ad gloriam beatorum veniemus.

QUARTO, obiicit Petrus Martyr eundem Ambrosium, qui in caput 23. Lucæ, & serm. 46. ait: *Lacrymas Petri lego, satisfactionem non lego.*

RESPONDEO, appellari satisfactionem eo loco excusationem. solemus enim vulgò dicere; Ego satisfaciam illi, id est, purgabo verbis crimen obiectum, & ostendam me iniuste accusari. laudat igitur ibi Ambrosius Petrum, quod non excusauerit peccatum suum, quomodo Adam fecit, sed lacrymis potius confessus fuerit, & accusauerit. sic enim subiungit: *Rectè planè Petrus fleuit, & tacuit, quia quod desleri solet, non solet excusari, & quod defendi non potest, abliis potest.* Et supra dixerat: *Inuenio quod fleuerit, non inuenio quid dixerit, quia mirum nihil Petrus dixerat in sui purgationem.*

QUINTO, obiicit Caluinus Augustinum tractatu 49. in Ioan. *Habent, inquit, omnes animæ, cum de seculo exierint, aduersas receptiones suas, habent gaudium boni, & mali tormentum, sed cum facta fuerit resurrectio, & bonorum gaudium amplius erit, & malorum tormentum grauiora, quando cum corpore torquentur.* Et infra de gaudio bonorum loquens: *Requiem, inquit, qua continuo post mortem datur, se a dignus est, tunc accipit quisque cum moritur.*

RESPONDEO, gaudium & requiem dari statim à morte omnibus, qui in caritate decedunt; nam mox omnes certi fiunt suæ æternæ salutis, quod ingens gaudium affert; tamen non eodem modo datur istud gaudium, sed diuersimodè, pro meritorum diuersitate; quibusdam enim datur sine admixtione doloris, quibusdam non sine temporalium admixtione pœnarum, vt idem B. Augustinus læpissimè doctet.

SEXTO, obiiciunt Augustinum lib. 5. Hypognostici vltra medium: *Primum, inquit, locum fides Catholicorum diuina auctoritate credit, regnum esse cœlorum; secundum, Gehennam, ubi omni apostata, vel à fide Christi alienus, æterna supplicia experietur; tertium penitus ignoramus, immò nec esse in Scriptura sanctis inuenimus.* Idem habet serm. 14. de verbis Apostoli, & lib. 1. cap. 28. de peccatorum meritis & remissione.

RESPONDEO, loquitur de locis æternis. Scribit enim contra Pelagium, qui inuenerat tertium locum pro parulis non baptizatis, quos volebat fore beatos quadam naturali beatitudine extra infernum, & extra regnum cœlorum.

Quod

Quod autem non negauerit Augustinus, aut quicumque fuit auctor Hypognoftici, tertium locum temporarium post hanc vitam; ex eo potest intelligi, quod fides Catholica docet præter cælum & infernum fuisse ante Christi passionem finium Abrahamæ, vbi degebant animæ sanctorum Patrum, Luca 16. inepte igitur Erasmus ponit in margine ad illa verba, tertium penitus ignoramus, PURGATORIUM, quasi dicat, Purgatorium est locus tertius, quem ignorat fides Catholica.

10 SEPTIMO, Petrus Martyr obiicit eundem Augustinum, exponentem illud Psal. 31. Beati quorum tecta sunt peccata, vbi sic ait: *Si tecti peccata, noluit aduertere; si noluit aduertere, noluit anim aduertere; si noluit anim aduertere, noluit punire; noluit agnoscere, maluit ignorare.* RESPONDEO, loqui eum de pœna æterna; nam de temporali, quod eam requirit Deus, patet ex locis supra citatis ex eodem Augustino, tract. 124. in Ioan. & in Psal. 50.

OCTAVO, proferunt Augustinum in epist. 54. ad Macedonium, vbi dicit, post hanc vitam non esse locum mortuum corrigendorum. RESPONDEO, nihil hoc facit ad rem; nam et si non erit post hanc vitam locus, vbi flagitiosi conuertantur, & mores suos corrigant; erit tamen, vbi peccata leuia iustorum, quæ flagitia dici non possunt, purgantur, & pro criminibus iam dimissis pœna temporalis sui possit.

NONO, obiiciunt eundem Augustinum in epistol. 80. ad Hefichium: *In quo, inquit, quemque inuenerit suis nouissimus dies, in hoc eum comprehendet mundi nouissimus dies, quousque qualis in die isto quisq; moritur, talis in die illo iudicabitur.* RESPONDEO, significat Augustinus post hanc vitam non crederi scire merita vel demerita, & ideo iudicandos omnes ad gloriam, vel ad Gehennam, & ad maiora vel minora præmia vel tormenta, prout erunt opera facta ante mortem.

Obiiciunt DECIMO Theophylactum, qui in cap. 8. Matthæi, sic ait: *Anima egressa, in mundo non errat, iustorum enim anima in manu Dei sunt, peccatorum vero & ipse hinc adducuntur, & anima disiciis.* RESPONDEO, indicat Theophylactus, non vagari liberè animas per mundum, vt dæmones faciunt, sed clausas esse in suis receptaculis, & quanquam non meminit nisi duorum locorum, tamen non excludit alia. Possumus autem animas, quæ ad Purgatorium deducuntur, reuo-

reuocare ad quodlibet eorum duorum, quæ ipse ponit; nam
 pia iuxta sunt, rectè possunt dici esse in manu Dei, licet non
 sint in regno; & similiter dici possunt esse in inferno, quia
 Purgatorium pars est inferni, vel certè locus vicinus.

VNDÈ CI MO, Hieronymum obiiciunt, qui sic in caput 9.
 Amos loquitur: *Quando anima Vinculis laxata corporeis, Solu-
 landi quò Velit, siue quò ire compellitur, habuerit libertatem, aut
 ad inferna ducetur, de quibus scriptum est; In inferno quis con-
 sultabitur tibi; aut certè ad caelestia subleuabitur.*

RESPONDEO, non loqui Hieronymum de morte natu- 10
 rali, sed de solutione animæ à corpore per speculationem;
 nam disputat eo loco de anima impia, quæ quocunq; se ver-
 terit cogitatione, ibi Deum vltorem inueniet. Itaque cum
 dixisset: *Aut certè ad caelestia subleuabitur,* subiungit: *Vbi sunt
 spiritalia nequitia in caelestibus, & si sibi Verè circumcissionis
 scientiam Soluerit Vendicare, & humilitate concepta habitare
 in montibus, & ibi scrutantem manum Dei euadere non valebit;
 quod si desperans salutem oculos Domini vitare tentauerit, & in-
 soluitur salforum fluctuum terminos peruenire, etiam ibi man-
 dabit Dominus serpenti toruoso, & antiquo, qui est inimicus, & 20
 Sitor, & mordebit eam. Capta quoque vitis atque peccatis gla-
 dio Domini percutietur, & per cruciatum, atque supplicia ad Do-
 minum reuertatur.*

CAPVT DECIMVM.

Soluuntur obiectiones ex ratione depromptæ.

VLTIMO, argumenta sumunt à rationibus. PRI-
 MA ratio; Post remissam culpam nulla remanet
 pœna; nam remissio culpæ fit per meritum pas- 30
 sionis Christi, quod est infinitum & sufficientis-
 simum ad tollendum omnem culpam & pœnam; nihil igitur
 purgandum superest post iustificationem.

RESPONDEO, primùm retorquendo argumentum; nam
 si Christus satisfecit pro omni culpa, & pœna nostra, cur post
 remissam culpam adhuc tam multa patimur, & tandem
 etiam morimur? & ne dicant esse paternas castigationes in
 remedium futuri peccati, cur infantes baptizati agrotant,
 qui non sunt capaces peccati actualis? Dico igitur
 Christi meritum sufficere ad omnem culpam, & pœnam 40
 tollentem.

tollendam, sed debere applicari, vt sit efficax, alioqui omnes homines saluarentur.

Porrò applicatio fit per actus nostros & Sacramenta. Voluit autem Deus, vt post Baptismum per contritionem & confessionem, cum absolutione Sacerdotis, applicetur meritum Christi ad tollendam culpam; per opera autem satisfactoria applicetur ad tollendam pœnam temporalem; nam pœna æterna commutatur in temporalem, quando remittitur culpa; quia cum remittitur culpa, redditur amicitia, & datur consequenter ius ad gloriam, ac proinde non debet puniri in æternum, quia eo modo nunquam ad gloriam perueniret, & tamen iustitia exigit, vt peccatum puniatur aliquo modo, idèd mutatur pœna æterna in temporalem; de qua re dictum est aliquid supra, & plura dicentur in disputatione, de satisfactione.

SECUNDA ratio; In Baptismo remittitur omnis culpa & pœna, sed Pœnitentia est quædam Baptismi commemoratio, immò est Baptismus quidam; nihil igitur post pœnitentiam remanet purgandum.

RESPONDEO; si Sacramentum Pœnitentiæ accipiatur Catholicè & integrè, vt comprehendit contritionem, confessionem, & satisfactionem, potest admitti totum argumentum; si autem accipiatur pro sola absolutione, in qua præcipuè Sacramentum consistit, negatur consequentia: Nam maximum discrimen est inter Sacramentum abluitionis, & Sacramentum absolutionis, cuius ignoratio causa est omnium errorum de satisfactione, de clauibus, de indulgentiis, de Purgatorio.

Dicimus ergo, in Sacramento Baptismi, Deum liberalissimè agere, & applicare Christi meritum per vnâ illam actionem abluitionis, ad tollendam omnem culpam, & pœnam futuri sæculi, id est, tam Gehennæ, quàm Purgatorij; nam pœnas temporales huius vitæ, ne Baptismus quidem aufert, vt patet in pueris baptizatis ægrotantibus, & morientibus. At in Sacramento absolutionis Deum contrahere non nihil manum, & applicare Christi meritum ad tollendam culpam, & pœnam æternam; tamen adhuc requirere opera pœnitentiæ, quibus redimamus temporales pœnas. id quod patet ex cap. 6. ad Hebræos, vbi dicit Apostolus: *Impossibile esse eos, qui semel sunt illuminati, id est, baptizati, iterum*

verum renouari ad penitentiam, nimirum baptismalem; quia Deus semel tantum vitur ea liberalitate. Et cap. 10. *Voluntarie peccantibus nobis post acceptam notitiam Veritatis*, id est, post illuminationem Baptismi, non relinquitur hostia pro peccato, id est, non relinquitur alius Christus patiens, & moriens, cui possimus rursus commori per Baptismum; Sic enim exponunt hæc duo loca omnes veteres Græci, & Latini.

Ex quo habetur argumentum insigne pro Purgatorio; Nam statim ponitur aduersatiua particula; sed *terribilis exspectatio iudicij, & ignis amulatio, quæ consumptura est aduersarios*. Si enim iste ignis significaret solum ignem Gehennæ, sequeretur; omnes qui peccant post Baptismum necessarîo damnandos, vel certè Paulum ineptè loqui. Nec enim rectè dicimus, peccanti post Baptismum, nō relinquitur alius Baptismus, sed Gehenna, si præter Baptismum sunt alia remedia, vt reuera sunt.

Oportet ergo dicere, beatum Paulum per ignem intelligere ignem in genere, siue Gehennæ, siue Purgatorij, ita vt hic sit sensus; Peccanti post Baptismum, non relinquitur alius Baptismus, neque aliquod remedium æquiualens, id est, æquè facile, quod mox liberet ab omni pœna; sed relinquitur ignis necessarîo, aut perpetuus, si homo non conuertatur, aut temporalis, si conuertatur, qui tamen ignis temporalis Purgatorij erit in alio seculo, nisi afflictionis ignis voluntariè assumptus purgauerit hominem in hac vita, & hæc est quam vocamus satisfactionem. **Idem** patet ex Patribus, qui propterea Baptismum aquæ vocant Baptismum facilem, & comparant naui, qua facile traiciuntur flumina; At penitentiam vocant Baptismum laboriosum, lacrymarum, ignis, & secundam tabulam post naufragium. **De** **ter** **ti** **o** **q** **u** **e** **r** **at** **io** idem suadet; nam post primam recōciliationem qui peccat, tantò grauius peccat, quantò est magis ingratus, & maius lumen, & auxilium habuit. Vide Gregorium Nazianzenum oratione in sancta lumina, & Theodoretum in Epitome diuinorum decretorum, capite penultimo, & Damascenum lib. 4. cap. 10.

T **e** **r** **t** **i** **a** **r** **a** **t** **i** **o**; Christi honor debet illibatus manere, ipse enim solus est liberator, & redemptor noster. At si nos satisfacimus, iam diuidimus cum Christo honorem; sumus

enim & nos ex parte aliqua redemptores nostri, nec totam salutem nostram, sed solum partem Christo debemus.

RESPONDEO, si de verbis agitur, Scriptura aperte dicit, Dan. 4. *Peccata tua elemosinis redime.* Et Philipp. 2. *Cum in meo tremore salutem vestram operemini.* ubi homo sui ipsius redemptor & saluator appellatur; nec propterea vlla sit Christo iniuria, si quidem tota virtus operum & satisfactio- nis nostrae à Christi sanguine pendet, & si redimus peccata, vel operamur salutem, id facimus per eius spiritum no-
 10 bis donatum, vel potius ipse Christi spiritus in nobis ista operatur. sicut nihil detrahitur Deo, quod per secundas causas operetur; immò potius additur ad gloriam eius, quia hinc apparet magis potentia & efficacia Dei, cum non solum operari possit, sed etiam dare aliis rebus vim operandi.

QUARTA ratio; Si applicatur nobis per nostra opera Christi satisfactio, vel sunt duae satisfactiones simul iunctae, vna Christi, altera nostra, vel vna tantum; si duae, ergo bis punitur eadem culpa, & duae poenae respondent vni culpae; si
 20 vna tantum, vel illa est Christi, & tunc nos non satisfacimus, vel nostra, & tunc excluditur Christus, aut verè diuidemus cum Christo honorem; nam ille soluet pro culpa, nos pro poena.

RESPONDEO, tres esse modos dicendi. PRIMVS quorundam est, qui asserunt esse vnã tantum, & illam Christi esse, ac nos propriè non satisfacere, sed solum facere alienum, quod est dicere, nostra opera non esse nisi conditiones, sine quibus non applicaretur nobis Christi satisfactio,
 30 vel ad summum, esse dispositiones. Ita Michaël Baius libro de Indulgentiis, capite vltimo, quae sententia erronea mihi videtur; nam Scriptura & Patres passim vocant nostra opera satisfactiones, & peccatorum redemptiones. Deinde si potest homo iustus suis operibus mereri de condigno vitam æternam, cur non satisfacere pro poena temporali, quod est minus?

SECUNDVS est aliorum, quod sint duae, sed vna ab altera pendens, qui modus non videtur mihi improbabilis; nam etiam si vna sufficeret, tamen ad maiorem gloriam Dei, cui satisfactio fit, & maiorem honorem hominis satisfaciens, placuit Christo

Christo coniungere nostram suæ. quomodo vna gutta sanguinis Christi sufficiebat redimere mundum, & tamen voluit totum sanguinem effundere, vt esset copiosissima redemptio; quomodo etiam homo iustus ad ultus, duplici titulo ius habet ad eandem gloriam, vno ex meritis Christi sibi communicatis per gratiam, altero ex meritis propriis.

TERTIUS tamen modus videtur probabilior, quod vna tantum sit actualis satisfactio, & ea sit nostra; neque hinc excluditur Christus, vel satisfactio eius; nam per eius satisfactionem habemus gratiam, vnde satisfacimus, & hoc modo dicitur applicari nobis Christi satisfactio, non quod immediate ipsa eius satisfactio tollat pœnam temporalem nobis debitam, sed quod mediare eam tollat, quatenus videlicet ab ea gratiam habemus, sine qua nihil valeret nostra satisfactio.

Præter has hæreticorum obiectiones discutimus etiam duas alias obiectiones, quas Theologi proponere solent, vt rei veritas clarius elucescat. Sit igitur

QVINTA ratio; In Purgatorio non est meritum, ergo nec satisfactio, nam idem requiritur ad merendum, & satisfaciendum, & omnis satisfactio est meritoria.

RESPONDEO, negandum esse consequentiam; nam requiruntur quidem communia quædam ad meritum, & satisfactionem, sed etiam quædam propria, ex quorum defectu ali quod est meritum sine satisfactione, & è contrario. Requiritur ad vtrumq; gratia inhabitans, sed hoc non sufficit. Nam ad satisfactionem requiritur, vt opus, quod fit, sit pœnale, quod non requiritur ad meritum. Ad meritum requiritur libertas, quam sequitur laus; id quod non requiritur ad satisfactionem; qui enim à iudice cogitur solvere debitum, vere satisfacit, etiam si coactus; requiritur præterea ad merendum status viæ. Deus enim Agonotheta noster stadij tempus, præsentem vitam esse voluit; hinc igitur animæ, quæ degunt in Purgatorio, quia medicæ sunt, quoad statum inter viatores & beatos, vel damnatos; nam sunt confirmatæ in bono, & tamen adhuc retardantur à consequitione summiboni; ideo possunt satisfacere, non mereri, cum nos vtrumque possimus, beati & damnati neutrum.

SIXTA ratio; Purgatorium constituitur partim ad remissionem culpæ venialis, partim ad satisfaciendum pro pœna,

sed neutrum habet locum post hanc vitam; nam eius est culpa resurgere, cuius est in culpam incidere, sed post hanc vitam non possunt animæ committere venialia peccata. Preterea peccata omnia remittuntur per pœnitentiam, sed post hanc vitam non est pœnitentia; nam idem est hominibus mors, quod Angelis casus, vt Damascenus dicit lib. 2. cap. 4. Sed Angeli per casum facti sunt immobiles in malo. Denique in hac vita, sicut potest homo iustus mereri gratiæ augmentum, ita etiam remissionem venialium offensarum. At post hanc vitam nullum est meritum. De pœna autem probatur sic: Pœna est propter culpam, & crescente culpa, crescit pœna; decrescendo culpa, decrescit pœna: ergo remota culpa, remouetur pœna.

RESPONDEO, non desuerunt, qui propter hæc argumenta negarent peccatum veniale post hanc vitam posse remitti, vt B. Thomas refert in 4. d. 21. q. 1. art. 2. Sed dicebant remitti omnia venialia in ipsa morte per gratiam finalem. At errabant, quia Scripturæ & Patres disertè docent, post hanc vitam remitti peccata leuia, neque fundamentum cor-
 20 rum est solidum; nam gratia finalis nō potest remittere peccatum, quod actu placet, immò quod non displicet aliquo modo; At potest quis mori in complacentia peccati venialis vel certè sine vllò actu, vt si moriatur repente, vel phreneticus, vel dormiens.

ALII, vt Scotus in 4. d. 21. q. 1. dicunt, peccatum relinquere solum in homine, postquam actus transit, reatum pœnæ & ided peccatum veniale dici remitti in Purgatorio, quia totaliter ibi punitur; mortale autem non dici remitti post hanc vitam, quia non punitur vnquam ibi totaliter; nisi e-
 30 nim in hoc mundo mutetur reatus pœnæ æternæ, in reatum pœnæ temporalis, & sic incipiat hęc remissio; non poterit ibi purgari. Hæc sententia falsa est, tum quia sine vllò dubio peccatum relinquit in homine præter reatum pœnæ, etiam maculam, aut aliquid simile, per quod dicatur homo formaliter peccator, & dignus pœna, tum etiam, quia hoc modo reuera peccata venialia non possent dici remitti in Purgatorio, non enim remittitur, quod totaliter punitur, remissio enim sonat condonationem.

ALIA est opinio eiusdem Scoti ibidem, peccata venialia remitti in primo instanti separationis animæ à corpore, re-
 mitti

mitti autem per merita præcedentia. Dicit enim ipse, omne opus bonum quod magis placet Deo, quam displiceat veniale peccatum, remittere venialia peccata; ceterum dum homo vivit, non remitti omnia venialia per huiusmodi opera bona, quia est impedimentum ipsius complacentiæ peccati, quo impedimento sublato, quod fit in primo iussanti post mortem, mox remitti peccatum. NON placet, quia non est probabile per omne opus bonum remitti venialia, nisi adsit displicentia saltem virtualis illorum peccatorum. DEINDE, quia sequeretur post hanc vitam nunquam remitti nisi unum peccatum, nimirum illud, cuius actus continuatur usque ad mortem, id quod ipse admittit, sed est contra Scripturas & Patres, ut ex dictis patet. TERTIO, quia non esset opus orare pro defunctis, ut à culpis venialibus solverentur, ut Ecclesia orat, ut patet apud Dionysium, cap. ult. Eccles. hierarch. & ex orationibus Ecclesiæ, quibus petimus, ut dimittantur eis, quæ humana fragilitate contraxerunt.

Est ergo opinio vera B. Thomæ in 4. d. 21. q. 1. art. 2. dimitti in Purgatorio culpas veniales, per actum dilectionis & patientiæ; illa enim acceptatio pœnæ à Deo inflictæ, cum ex caritate prodeat, dici potest virtualis quædam pœnitentia, & licet non sit propriè meritoria, quia non meretur gloria vel gratiæ augmentum, tamen est remissoria peccati.

Ad PRIMVM negatur maior univèrsaliter; nam habet locum solum in mortalibus peccatis; quod enim ad venialia attinet, potest in Purgatorio anima liberari à veniali, quia habet media convenientia, id est, actum dilectionis peccato contrarium, non tamen potest cadere in peccatum veniale, quia caret sòmite, & præterea quia est in bono confirmata.

Ad SECUNDVM dico, post hanc vitam non esse pœnitentiam de mortalibus, quia damnati sunt obfirmati in malo, & hoc sibi vult Damascenus, tamen in animabus Purgatorij bene potest esse displicentia peccati, eaq; ex caritate, & proinde utilis.

Ad TERTIVM dico, animas Purgatorij non esse omnino in via, & propterea non posse mereri augmentum gratiæ; tamen neque esse omnino in termino, & ideo posse aliquid facere, quod pertineat ad peccati venialis remissionem.

Ad alteram partem argumenti respondeo, pœnam pendere à culpa in fieri, nō in esse, & ideo illud (decreſcente culpa, decreſcit pœna) ſi intelligatur quòd quò minor eſt culpa, eò minorem generat pœnam, verum eſt, alioqui eſt falſum; nam etiam ob culpam præteritam debetur pœna.

CAPVT XI.

10 Purgatorij confeſſionem ad fidem Catholice
cam pertinere.



VPEREST NUNC, vt Petri Martyris ſententiam diſcutiamus, qui in commentario, cap. 3. prioris ad Corinth. contendit, Purgatorium eſſe, non poſſe ad dogma fidei vllò modo pertinere; quæ fuit prima Lutheri opinio, ſiue prius eius error. Rationes eius ſunt quinque.

PRIMA, quia Scriptura tacuit Purgatorium in iis locis, vbi maxima fuit occaſio de eo loquendi. Nam in Geneſi, ca. 4. deſcribuntur funera Abraham, Iſaac, Iacob, Saræ, Rachelis, diligentiffimè, & tamen ne verbum quidem de Purgatorio. Item in Leuitico inſtituuntur ſacrificia plurimorum generum pro variis rebus, & nullum ibi inſtituitur pro defunctis. Denique, Paulus in priori epiſt. ad Theſſal. ca. 4. cùm expoſſeſſo de mortuis agat, nihil dicit de Purgatorio, ſed ſolum aſſerit eos reſurrecturos, & concludit: *Conſolamini inuicem in verbis iſtis.*

SECUNDA ratio eſt, quia Eccleſia Græca, quæ eſt altera pars Eccleſiæ, diu reſtitit huic dogmati in Concilio Florentino, ergo ſi vſque ad noſtra ferè tempora media pars Eccleſiæ non credidit Purgatorium, quomodo eſt articulus fidei?

TERTIA ratio eſt, quia Dionyſius, capite vltimo Eccleſiaſtica hierarchiæ, quæſtionem proponit, Cur Antifites in ſepultura fidelium oret pro defunctis, & Purgatorij non meminit, ſed anxie laborat, vt quæſtionem ſoluat. At ſi Purgatorium eſſet dogma fidei, potuiſſet ſtatim facillimè reſpondere, orate pro defunctis, vt à Purgatorio liberentur.

QUARTA ratio eſt, quia beatus Auguſtinus diſertis verbis aſſerit, ſe habere opinione tantùm incerta, non certa fide Pur-

Purgatorium esse, in Enchiridio, cap. 69. Tale, inquit, aliquid etiam post hanc vitam fieri incredibile non est, & verum ut sit, queri potest, & aut inueniri, aut latere nonnullos fideles, per quem quendam purgatorium, quanto magis, minusve bona perueniens dilexerunt, tanto tardius citiusue saluari. In lib. de octo questionibus Dulcitij, quæst. 1. Sive ergo, inquit, in hac vita tantum homines ista patiuntur, sine etiam post hanc vitam talia quadam iudicia subsequuntur, non abhorret quantum arbitror ratione veritatis iste intellectus huius sententia. Idem habet libro de fide & operibus, cap. 16. Denique, lib. 21. de ciuitate Dei, cap. 26. ait: Post istius sanæ corporis mortem, donec ad illum venturatur, qui post resurrectionem corporum futurus est damnationis, & remunerationis vltimus dies, si hoc temporis intervallo spiritus defunctorum eiusmodi ignem dicuntur perpeti, quem non sentiant illi, qui non habuerunt tales mores, & amores in huius corporis vita, ut eorum ligna, fenum, & stipula consumantur: alij vero sentiant, qui eiusmodi secum adificia portauerunt, siue ibi tantum, siue hic, & ibi, siue ideo hic, ut non ibi, secularia, quamuis à damnatione ventura, concremantem ignem transitoria tribulationis inueniant, non redarguo, quia forsitan verum est.

QUINTA ratio est, quia Scriptura apertè repugnat, Ioan. 5. Luc. 23. Apoc. 14. ut supra attulimus, & refutauimus.

Hæc sunt ipsius firmamenta, quæ adeo nos nihil mouent, ut constanter iterum asseramus, dogma esse fidei Purgatorium, adeo, ut qui non credit Purgatorium esse, ad illud nunquam sit peruenurus, sed in Gehenna sempiterno incendio cruciandus. Nam dogmata fidei quatuor modis probari solent.

PRIMO, ex testimonio expresso Scripturae cum Ecclesiarum declaratione, quomodo probamus, Christum esse opus totius Patri, ex illo Ioannis decimo: Ego & Pater vnum sumus, addita Nicæni Concilij declaratione; nam alioqui nunquam licet cum Ariani finiri poruisset, cum eum locum, & omnia alia, quæ afferri solent, ipsi aliter exponerent.

SECUNDO, per euidentem deductionem ex iis, quæ habentur expressè in Scriptura; quomodo probamus, Christum habere duas voluntates, diuinam & humanam, quia secundum Scripturas Deus & homo est, addita Concilij sexti declaratione.

TERTIO, ex verbo Dei per Apostolos non scripto, sed tradito, quomodo probamus Euangelia & epistolas Pauli esse diuinas Scripturas.

QUARTO, per euidentem deductionem ex verbo Dei tradito; quomodo beatus Augustinus passim probat, peccatum originale esse in pueris necessariò credendum, etiam si in Scripturis non haberetur, quia deducitur euidenter ex traditione Apostolica de Baptismo paruulorum. Sufficiens enim horum quatuor modorum inde patet, quia id solum est
 10 de fide, quod est à Deo reuelatum mediatè, vel immediatè; reuelationes autem diuinæ partim scriptæ sunt, partim non scriptæ. Itaque decreta Conciliorum, & Pontificum, & Doctorum consensus, & alia omnia ad ista quatuor deducuntur; tunc enim solum faciunt rem de fide, cum explicant verbum Dei, aut inde aliquid deducunt.

Iam verò his omnibus modis probatur Purgatorium. Nam de PRIMO modo patet ex viginti locis Scripturæ, quæ
 20 artulimus, quorum aliqua à tota Ecclesia exponuntur de Purgatorio, vt patet ex Conciliis & Patribus, quos citauimus.

De SECUNDO modo patet ex duabus primis rationibus, quas fecimus.

De TERTIO modo perspicuum est ex eo, quòd non inuenimus initium huius dogmatis, sed omnes veteres Græci & Latini ab ipso tempore Apostolorum constanter docuerunt Purgatorium esse. Talia enim ad Apostolicam traditionem referenda esse, B. Augustinus affirmat li. 4. de Baptismo contra Donatistas, cap. 24.

De QUARTO modo patet ex Clemente, Tertulliano,
 30 Epiphano, & Chrysostomo supra citatis, qui asserunt, orationem pro defunctis esse Apostolicam traditionem, & nullumquam veterum contrarium dixerunt. Hinc enim euidenter colligitur Purgatorium esse. Nam si traditio est Apostolica, orandum esse pro defunctis, quis non aduertat, continuò inde sequi, vt animæ post hanc vitam egeant auxilio, & proinde sint in pœnis non sempiternis, sed temporalibus. Neque argumenta Petri Martyris difficulter solui possunt.

Ad PRIMVM ergo respondeo, primò non esse necesse, vt Scriptura vbique omnia dicat.

Dico

Dico SECUNDO ad illud de Genesi, in Genesi non fuisse occasionem ponendi doctrinam de Purgatorio. Nam Genesis non est liber dogmatum, sed historia quædam Patriarcharum. Porro doctrina eo tempore non Scriptura, sed traditione conseruabatur. Nam alioqui dicemus, ante Abraham tempora neminem fuisse iustificatum, quia Scriptura non tradit, quomodo iustificarentur homines tempore Adæ, Henoch, Noë.

Dico VLTIMO, implicitè saltem contineri in Genesi mentionem Purgatorij; quando enim dicitur Genes. 23. *Et surrexit Abraham ab officio funeris.* Quis prohibet per illud, *Officiu* ¹⁰ *cium*, intelligere non solùm lacrymas, sed etiam orationem & ieiunium? Et cur, quæso, Iacob & Ioseph in Ægypto morientes, cupierunt ossa sua deferri in terram promissionis, nisi quia ibi solùm sacrificia pro defunctis facienda esse nouerant?

Ad illud de Leuitico, nego non fuisse in Leuitico instituta sacrificia pro defunctis, quando quidem illa, quæ instituta sunt pro peccatis, intelligebantur pro peccatis tam uiuorum, quàm mortuorum, vt patet ex lib. 2. Machab. cap. 12. ²⁰

Ad illud ex Paulo, dico, Paulum in eo loco solùm voluisse dicere, non esse mortuos immoderatè defendos, quomodo Ethnici faciebant. Ad hoc autem propositum non solùm non proderat, sed etiam oberat mentio Purgatorij. Dicere enim, animas propinquorum grauissimè torqueri in Purgatorio, non est adferre materiam consolationis, sed maioris luctus; Paulus autem consolari volebat eos, vt patet, & ideo meminit resurrectionis & gloriæ; & concludit: *Itaq; consolamini inuicem in verbis istis.* In aliis autem locis, vt in 1. epist. ad Corinth. cap. 3. & 15. & ad Hebr. 10. disertè Paulus ponit ignem Purgatorij, & Baptismum laboriosum pro mortuis susceptum. ³⁰

Ad SECUNDVM dico, Ecclesiam Græcam nunquam dubitasse de Purgatorio, vt patet ex Patribus citatis; Dionysio Arcopagita, Origene, Athanasio, Basilio, Gregorio Nazianzeno, Gregorio Nissenso, Ephræm, Chrysofomo, Cyrillo, Epiphanio, Theodoro, Oecumenio, Theophylacto, Damasceno, & ex ipso Concilio Florentino. Nam quod Petrus Martyr dicit, in eo Concilio Patres Græcos diu restitisse, mendacium est; siquidem in prima sessione, & rursus in vlti-

ma, affirmant, se perpetuò Purgatorium credidisse, & orationem pro defunctis, sed solàm ambigere de qualitate pœnæ; An sit videlicet ignis, an aliquid aliud. Quod ergo de Græcis iactatur, quòd Purgatorium negent, de particularibus hominibus intelligendum est.

In TERTIO argumento miror Petrum Martyrem; nam etsi Dionysius non nominat Purgatorium, tamen expressè dicit, orari pro defunctis, ut à peccatis liberentur. Sic enim ait cap. 7. part. 3. *Precibus, inquit, à diuina benignitate contemdit, & omnia peccata, qua humana fragilitate commisit, qui excessus è vita, remittat.* Deinde quaerit, cur oretur pro defunctis, ut eis peccata remittantur, cùm scriptum sit omnes accepturos, prout in corpore gesserint? Et responder, ideò orari, quia illi per merita huius vitæ digni facti sunt, quibus preces viuentium prodesse. Nisi ergo S. Dionysius secum ipse pugnauerit, non potuit Purgatorium ignorare, aut negare, cùm tam aperte orationem asserat pro defunctorum peccatis.

Ad QUARTVM, opponimus alia loca S. Augustini. Nam in eodem Enchiridio cap. 110. asserit, orationes & sacrificia prodesse animabus, & similiter quæ st. 2. ad Dulcimum, & lib. 2. de ciuitate Dei, cap. 24. dicit, constare, animas purgari post hanc vitam. & cap. 1. de cura pro mortuis agenda, dicit: *Non dubium est, prodesse orationem defunctis.*


RESPONDET Petrus Martyr, debere hæc loca exponi per illa, in quibus dubitat. At quomodo, quæ so, exponemus; constar, & non dubium est, per illa; Incredibile non est, & Forsan verum est? Necesse est igitur dicere, Augustinum aliter quid de Purgatorio certa fide tenuisse, & de aliqua re dubitasse, quid sit de quo dubitauit, nos facildè exponemus. At non ita poterit ille exponere, quid sit, de quo non dubitauit; nihil enim minus dari potest, quàm eum non dubitasse de Purgatorio in genere, id est, quòd sit aliquod Purgatorium post hanc vitam. Cum qua fide certa, potest consistere dubitatio de qualitate pœnæ, quæ infligitur; de qualitate peccati, quod punitur; de loco, tempore, &c. At cum dubitatione de Purgatorio in genere, non potest consistere vlla certa fides circa Purgatorium, quàm tamen Augustinus habere se dicit:

Dico

Dico igitur, Augustinum in illis quatuor locis dubitare solum de genere peccati, quod punitur; An videlicet, sicut in hac vita immoderatus amor erga temporalia, purgatur a Deo variis afflictionibus, ut mortibus vxoris, liberorum, &c. Ita etiam credibile sit, post hanc vitam adhuc remanere in anima separata aliquas reliquias talium affectionum actualium, quæ purgari debeant tribulationibus, & molestiis. Et si enim animæ corpore vacantes, non videntur posse tangi eiusmodi affectionibus corporalibus, tamē cum sint formæ corporum, & in corpore diu fuerint, & rursus appetant coniungi corpori, non est incredibile, eas recordari adhuc voluptatum, quas per instrumenta corporea perceperunt, & earum desiderio aliquo teneri. Quia verò res ista difficillima est, ideo rectè Augustinus dicit, posse quærri, & nunquam fortè inueniri, &c.

Ad QUINTVM suprâ responsum est,





LIBER SECVN-
DVS DE CIRCVMSTAN-
tiis Purgatorij.

CAPVT PRIMVM

De personis quibus Purgatorium conuenit.

DEMONSTRAVIMVS HACTENVS PVRGATORIVM esse; nunc de circvmsstantiis Purgatorij, id est, de personis, loco, tempore, pœnis, suffragiis, aliisque id genus differendum est.

PRIMA igitur illa quæstio occurrit: *Quibus personis purgatio post hanc vitam conueniat?* Multi autem extiterunt errores de eiusmodi personis.

PRIMVS fuit, purgari debere post hanc vitam tam bonos, quam malos, vno Christo excepto. Hæc sententia solet tribui Aleuino, sed videtur esse non eius solùm, sed multorum Patrum. **ORIGENES** enim homil. 14. in Lucam: *Ego, inquit, puto, quia & post resurrectionem ex mortuis indigeamus Sacramento eluente nos atq; purgante; nemo enim absque sordibus resurgere poterit; nec illam posse animam reperiri, que vniuersis partibus vitæ careat.* Et in Psal. 36. *Omnes nos venire necesse est ad illum ignem, etiamsi Paulus sit aliquis, vel Petrus.*

AMBROSIVS in Psal. 36. *igne ergo, inquit, purgabuntur filij Leni, igne Ezechiel, igne Damsel.* Et in Psal. 118. serm. 20. adducens illud Genes. 4. *Posuit ante paradysum flammæum gladium, dicit, illum gladium igneum, esse ignem purgatorium, per quem necessariò tranhit, quicumque in paradysum intrat: Omnes, inquit, oportet transire per flammam, siue ille Ioannes sit, siue Petrus, etc.* Et infra: *Vnus ignem illum sentire non potuit, qui est iustitia Dei Christi.*

Idem

Idem videtur sensisse HILARIUS in illa verba Psal. 118. *Concupiuit anima mea desiderare iudicia iustitia tua.* Vbi insinuat etiam B. MARIAM transire debuisse per illum ignem. Idem LACTANTIUS li. 7. cap. 21. diuinarum institutionum, & Hieronymus in caput 7. Amos in illa verba: *Ecce Vocabit ignem ad iudicium.* Denique Rupertus lib. 3. in Genes. cap. 32. explicans flammeum gladium.

Hæc sententia accepta, vt sonat, manifestum errorem continet. Nam in Concilio Florentino scilicet. vlt. definitum est, aliquas animas in infernum, aliquas in purgatorium, aliquas in cælum mox recipi; deinde Ecclesia semper credit eos, qui mox à Baptismo moriuntur, nullam Purgatorij pœnam sentire posse, vt constanter Augustinus docet lib. 21. de ciuitate Dei, cap. 16. & similiter eos, qui baptizantur in sanguine suo, vt Cyprianus lib. 4. epist. 2. dicit; omnia enim peccata passione purgati affirmat, & ideo Martyres statim ad præmium peruenire.

Adde, quod Patres adducti (Origene excepto, cuius verba in hom. 14. in Lucam, non patiuntur commodam expositionem) videntur sano modo intelligi posse: Nam aliqui eorum per ignem non intelligunt ignem purgatorium, sed ignem diuini iudicij, quomodo loquitur Paulus in 1. epist. ad Corinth. cap. 3. cum ait: *Vniuscuiusque opus quale sit, ignis probabit.* Et hoc modo fatendum est, omnes Sanctos, Christo excepto, per ignem transire. ita videntur de igne loqui Hilarius & Hieronymus, & in loco posteriore Ambrosius.

Aliqui verò videntur intelligere per ignem verum ignem Purgatorij, per quem tamen dicunt transire Sanctos sine vlla læsione, ita vt transeant per Purgatorium materialiter, non formaliter. Ita videntur loqui Lactantius, Ambrosius, & Rupertus. LACTANTIUS enim sic ait: *Sed et iustos cum iudicauerit Deus, etiam igne eos examinabit: tum quorum peccata vel pondere, vel numero prauauerint, perstringentur igni atque amburentur: quos autem plena iustitia et maturitas virtutis decorerit, ignem illum non sentient, habent enim aliquid in se Dei, quod vim flamma repellat.* Sic etiam Ambrosius in Psal. 36. vbi dixerat, omnes transituros per ignem, subiungit, quosdam mansuros in illo igne perpetuo, quosdam vrendos, non tamen exurendos, quibusdam, id est, Sanctis instar roris futurum, vt quondam tribus pueris in Babylonis fornace.

Confor.

Conformis est huic sententiæ visio B. Fursi, quam describit Beda lib. 3. hist. cap. 19. Ille enim vidit in via ad cælum maximos ignes, per quos necessariò transeundum erat, sed vidit simul eos, qui nihil haberent combustibile, id est, nullum culpæ aut pœnæ reatum, illæfos transire, alios verò magis minusue exuri, prout plus minusue materiæ combustibilis afferebant. Sanè hanc sententiam, quæ docet omnes transituros per ignem, licet non omnes lædendi sint ab igne, nec audeam pro vera asserere, nec vt errorem improbare.

20 SECVNDVS error est, omnes malos, tam Demones, quam homines tandem inferno penitus euacuato saluandos, & proinde omnes pœnas post hanc vitam esse purgatorias. Hic error Origenis fuit, vt referunt & refellunt Epiphanius epistola ad Ioannem Hierosolymitanum, Augustinus lib. 21. de ciuitate Dei, cap. 17. & 23. Hieronymus in cap. 3. Ione, & Gregorius lib. 9. moral. cap. 45. & 46. & lib. 34. cap. 12. & 13. Nam Matth. 25. dicitur: *Ite maledicti in ignem æternum, qui parati estis Diabolo & angelis eius.* Et ne fortè responderent, ignem esse æternum, sed non mansionem in igne, concludit Dominus: *Eti sunt hi in supplicium æternum, iusti autem in vitam æternam.* Et Apocal. 20. *Diabolus, qui seducebat eos, missus est in stagnum ignis & sulphuris, sibi bestia & Pseudopropheta cruciabuntur die ac nocte in secula seculorum.*

Errorem eundem tribuit S. Hieronymo Rufinus lib. 16. inuectiuarum in Hieronymum, sed iniuria; nam B. Hieronymus huius erroris hostis acerrimus fuit, vt præter locum citatum patet ex Apologia 2. contra Rufiniam, ex lib. 1. contra Pelagianos, ex epistola ad Pammachium de erroribus Ioannis Hierosolymitani, & ex commentario in vltima versu balisaiæ. Quòd autem citat pro hoc errore Rufinus ex commentariis Hieronymi in epistolam ad Ephesios, sunt dicta in persona Origenis, vt idem Hieronymus docet de similibus erroribus, in Apologia 1. contra Rufinum. Dicitur existare liber cuiusdam Stanisai Anabaptistæ pro hoc errore Origenis, qui inscribitur de diuina philanthropia; sed eum librum nondum videre potui.

TERTIVS error est eorum, qui non quidem Diaboli, sed tamen omnium hominum peccatorum pœnas, post hanc vitam dicebant esse temporales & purgatorias, vt Augustinus refert & refellit lib. 21. de ciuitate Dei, cap. 18. & 24.

QUARTVS error est eorum, qui id sentiebant solum de omnibus Christianis, siue hæretici, siue Catholici essent; referat Augustinus ibidem, cap. 19. & 25.

QUINTVS eorum, qui id sentiebant de solis & omnibus illis, qui aliquando fuissent Catholici. Augustinus ibidem referat cap. 20. & 25; Hi errores refelluntur, tum ex Matth. 25. *Ignem æternum.* Et Apocal. 20. *Cruciantur in secula seculorum;* tum etiam ex Isaia ult. *Ignis eorum non extinguetur.* Et Galat. 5. *Qui talia agunt, regnum Dei non possidebunt.* Nam in his locis non soli Dæmones, nec soli homines Ethnici, aut hæretici, sed etiam flagitiosi Catholici puniendi esse dicuntur sine villo sine.

Fundamenta errorum istorum erant quatuor. PRIMVM, quia Psal. 76. dicitur: *Nunquid obliuiscetur misereri Deus, aut continebit in ira sua misericordias suas?* SECVDVM, quia Rom. 11. dicitur: *Conclusit Deus omnes in infidelitate, & omnium miseretur.* TERTIVM, quia si Sancti orabant pro inimicis, & exaudiebantur in hoc mundo, multò magis orabunt & exaudientur in die iudicij. QVARTVM, quia videmus in Scriptura supplicia à Deo absolute intentari, & tamen postea non inferri, ut patet Ionæ 3. *Adhuc quadraginta dies & Ninive subuertetur.* Vnde intelligimus, inquit, cum Deus minatur supplicia, non significari ea reuera inferenda, sed tantum eos, quibus intentantur, dignos esse, qui ita punirentur.

Sed ad PRIMVM respondet Augustinus lib. 21. de ciuitate Dei, cap. 24. intelligi illa verba solum respectu bonorum, vel si extendantur ad damnatos, sensum esse; Damnatos puniendos quidem in æternum, sed tamen citra condignum. Posset etiam dici, intelligi illa verba, in hac vita, de qua dicitur: *Ecce nunc tempus acceptabile,* nam de iudicio futuro dicitur Iacobi 2. *Iudicium sine misericordia ei, qui non fecit misericordiam.*

Ad SECVDVM respondet Augustinus ibidem, illud: *Vt omnium miseretur,* non significare omnium hominum, sed omnium nationum, id est, tam Gentilium, quam Iudæorum, ita ut aliqui ex Gentibus, aliqui ex Iudæis saluentur. sicur illud: *Conclusit omnes in infidelitate,* significat tam Gentes, quam Iudæos, id est, aliquos ex Gentibus, aliquos ex Iudæis; Deus enim ante Christi aduentum permisit Gentes ingredi vias suas in infidelitate & idololatria, ut postea confusi medi-

medicum requirerent, & inuenerint, vt factum est. Deinde Gentibus conuersis permisit infidelitatem rueri Iudæos, vt & ipsi circa finem mundi confusi & humiliati, similiter conuertantur.

Ad TERTIVM responder, Sanctos in hoc mundo orasse, quia sciebant in hac vita tempus esse fructuosæ pœnitentiæ, at in iudicio non oraturos pro damnatis, sicut nec nunc oramus pro Diabolo, aliisque damnatis.

Ad QVARTVM responder Augustinus, Niniuem verè
 10 fuisse euersam, vt prædictum fuerat; nam omnes de malis facti sunt boni, quæ est euersio optima, & Deo gratissima. Potest etiam responderi, supplicia à Deo intentata in hac vita, esse comminatoria, quia intelliguntur sub conditione, nisi quis egerit pœnitentiam, at post hanc vitam non est pœnitentia, saltem fructuosa; nam Ioannis cap. 9. dicitur: *Operamini dum dies est, venit nox, in qua nemo potest operari.* Et Eccl. 9. *Apud inferos non est opus, nec ratio, &c.*

SEXTVS error est aliorum, qui volebant, omnes, & solos
 20 Catholicos in fide perseverantes ad Purgatorium descendere, quamuis alioqui pessimè vixissent. refert & refellit hunc errorem Augustinus lib. 21. de ciuitate Dei, cap. 25. & 26. Enchirid. cap. 68. de fide & operibus, cap. 14. 15. & 16. & quæst. 1. ad Dulcitium. Nam Matth. 3. de fidelibus malis dicitur: *Pales autem comburent igni inextinguibili.* Et Matth. 25. fidelibus immiseri cordibus dicitur: *Ite in ignem æternum.* Et 1. Cor. 6. scribitur fidelibus à Paulo: *Neg, ebriosi, neg, auari, neg, adulteri, neg, molles, neg, maledisci regnum Dei possidebunt.* Et similia habentur ad Galat. 5. & Ephes. 5.

Fundamentum huius erroris erat locus ille 1. Corinth. 3.
 30 *Ipsè autem saluus erit quasi per ignem.* Putabant enim illi per fundamentum intelligi fidem Catholicam, per argentum & aurum omnia opera bona, per ligna, fœnum, & stipulas, omnia peccata; sed hoc supra sufficienter refutatum est.

Est autem obseruandum, esse aliquos, qui arbitrentur B. HIERONYMVm in hoc errore fuisse, quia in vltima verba Isaiæ dicit: *Sicut Diaboli & omnium negatorum atq; impiorum, qui dixerunt in corde suo; Non est Deus, credimus æterna tormenta sic peccatorum atq; impiorum, & tamen Christianorum, quorum opera in igne probanda sunt, atq; purganda, moderatè arbitramur, & mixtam clementiæ sententiam iudicis.* Item li. 1. contra

contra Pelagianos: *Si Origenes, inquit, omnes rationabiles creaturas dicit non esse perdendas, quid ad nos: qui & Diabolum & satellites eius, omnesq; impios dicimus perire perpetuo; Christianos vero si in peccato praeventi fuerint, salvandos esse post peccata.*

Videtur tamen Hieronymus in hoc errore non fuisse, quandoquidem in caput 25. Matth. ubi manifestè agitur de damnatione aeterna fidelium peccatorum, ita scribit: *Prudens lector attende, quod & supplicia aeterna sint, & ista perpetua metum deinceps non habeat ruinarum.* Et cap. 5. ad Galatas: *Putamus, inquit, nos regnum Dei consequi, si à fornicatione, idoloraria, & beneficiis immunes simus? Ecce immiscitia, cōtentio, irarixa, dissensio, ebrietas quoq; & cetera, quae parva arbitramur, excludunt nos à regno Dei.*

In locis ergo citatis in contrarium, non vult B. Hieronymus dicere, omnes Christianos salvandos post peccata, sed nullos salvandos post peccata, nisi Christianos. Unde in prior loco dicit quidem Christianos impios salvandos, sed addit conditionem restringentem, cum dicit: *Quorum opera in igne probanda, & purganda sunt;* id est, illi soli Christiani impii salvabuntur, quorū opera mala iam purgata, quoad culpam, purganda erunt quoad reatum peccati. In posteriore loco opponit impiis Christianos, qui in peccato praeventiuntur morte, ut indicet se loqui solum de piis Christianis.

SEPTIMVS error eorum est, qui existimabant, omnes illos salvandos per ignem Purgatorij, qui eleemosynas fecissent, etiam si alioqui in sceleribus perseverassent usque ad mortem.

Refellit hunc errorem S. Augustinus in Enchiridio, cap. 75. & 76. & lib. 21. de civit. Dei, cap. 22. & 27. nam Scriptura manifestissimis verbis multa requirit ad iustificationem impii praeter eleemosynam. Lucae 13. *Si paenitentiam non habueritis, omnes similiter peribitis.* 1. Corinth. 13. *Si distribuero in cibos pauperum omnes facultates meas, caritatem autem non habuero, nihil mihi prodest.* Qualem autem, quae solo caritatem habet, qui Deum offendere non timet, aut postquam eum offendit, non quaerit reconciliationem?

At, inquiunt, in die iudicij examen fieri videmus solum de eleemosyna, Matth. 25. qui enim fecerunt eleemosynam,

mittuntur in regnum, qui non fecerunt, mittuntur in Gehennam.

RESPONDEO, Dominum minora posuisse, vt inde colligeremus maiora; qui enim minatur Gehennam iis, qui non dederunt sua, multò magis puniet eos, qui rapuerunt aliena; & qui promisit regnum iis, qui fecerunt eleemosynam ex pecuniis suis, multò magis coronabit eos, qui vitam pro fide ponunt. Vide, si placet, plura in disputatione nostra de eleemosyna.

10 His ergo erroribus confutatis, manet vltima sententia vera, & Catholica: Purgatorium pro iis tantum esse, qui cum venialibus culpis moriuntur, de quibus agitur 1. ad Corinth. cap. 3. Illi enim sunt, qui ædificant super fundamentum ligna & stipulas, & salui erunt quasi per ignem. Et rursus pro illis, qui decedunt cum reatu pœnæ, culpis iam remissis, de quibus agitur Lucæ 12. *Non exies inde, donec reddas novissimum quadrantem.* & aliis locis supra citatis.

CAPVT SECVNDVM.

20

In Purgatorio non posse animas mereri vel peccare.



EQVITVR altera quæstio: *An in Purgatorio sit locus merito, & peccatis.* LUTHERVS enim quando Purgatorium confitebatur, ita confitebatur, vt illud partim cum huius vitæ statu, partim cum inferno confunderet. Dicebat animas Purgatorij posse mereri, quod est vitæ huius, & rursus eas peccare continuò, ac
30 desperare salutem, quæ sunt propria damnatorum. Radix horum fuit, quia existimauit eas animas ad Purgatorij meritum, quæ non sunt perfectæ in caritate; quæ enim nullam habent caritatem mittuntur in Gehennam, quæ habent perfectam ascendunt in cœlum. Quia verò imperfecta caritas debet augeri, & non potest augeri sine nouis meritis, ideo merendi statum posuit in Purgatorio; rursus quia perfecta caritas foras mittit timorem, & proinde imperfecta habet admixtum timorem, seruilem scilicet, & hunc timorem Lutherus peccatum esse existimat, inde deduxit animas peccare continuò, quia continuò timent, horrent, ac refugunt pœnas, quæ
runt

ant quæ sua sunt, &c. Vide librum Lutheri de Purgatorio, quem Ioannes Eckius refellit.

Et quidem hanc Lutheri sententiam manifestè hæreticam esse, probatur testimoniis Scripturarum, & Patrum. PRIMVS locus, Ecclesiastæ 9. *Mortui nihil nouerunt amplius, nec habent ultra mercedem.* HIERONYMVS in hunc locum: *Donec uiuant,* inquit, *homines possunt fieri iusti, post mortem uerò nulla datur boni operis occasio.* Et infra: *Viuentes metu mortis possunt bona opera perpetrare, mortui uerò nihil scilicet ad id aduocare, quod semel secum tulere de uita.* Et infra: *Nec iuste quisque possunt agere, nec peccare, nec uirtutes aduocare, nec uitia.*

SECUNDVS ibidem, ait Scriptura: *Quodcumque potest agere manus tua, instanter operare, quia nec opus, nec ratio, nec sapientia, nec scientia est apud inferos, quò tu properas.* Non possumus dicere in alia uita nihil agi, aut sciri, cum Luc. 16, de Epulone legamus, eum & uidisse Lazarum in sinu Abraham, & primum pro se, deinde pro fratribus opem Abraham implorauisse; quare loquitur de opere meritorio, ut exponit Hieronymus. Neque loquitur de inferno inferiore, sed de inferno in genere, ut complectitur omnia loca, ad quæ descendebant omnes homines ante Christi resurrectionem, ut idem Hieronymus exponit.

TERTVS locus est, Eccles. 11. *Si ceciderit lignum sine ad austrum, sine ad aquilonem, & bicung, ceciderit, ibi erit.* Hieronymus in hunc locum, & Bernardus serm. 49. ex paruis, exponunt de immutabilitate animæ post hanc uitam, quæ non potest de bona fieri mala, nec bona de mala.

QUARTVS est, Eccles. 14. *Ante obitum tuum operare iustitiam, quia non est apud inferos inuenire cibum.*

QUINTVS est, Eccles. 18. *Ne ueteris & ad mortem iustificari.* Quare uique ad mortem, nisi quia post mortem non erit amplius tempus?

SEXTVS, Ioan. 9. *Uenit nox, in qua nemo potest operari.* Origenes in Psal. 36. Chrysostomus, Augustinus, Euthymius, & Theophylactus in hunc locum, Hieronymus in cap. 9. Eccles. & Gregorius li. 4. Dialog. cap. 39. exponunt summo consensu per noctem, tempus alterius uitæ, per operari, facere opera meritoria, significari.

SEPTIMVS est, 2. Cor. 5. *Omnes nos manifestari oportet ante tribunal Christi, & referat unusquisque propria corporis, sicut gessit,*

gestit, sive bonum, sive malum. Quem locum exponens Augustinus in libro de prædest. Sanctorum, cap. 12. monet propria corporis non vocari opera corporalia, quasi spiritualia iudicanda non sint, sed vocari omnia opera, quæ fiunt dum sumus in corpore, quia post hanc vitam non superest tempus operandi, sed præmium, aut pœnas recipiendi.

OCTAVVS est, Gal. 6. *Qua seminauerit homo, hæc et metet. Et infra: Bonum autem facientes non deficiamus, tempore enim suo metemus non deficientes; ergo dum tempus habemus, operemur bonum.* Hieronymus in hunc locum docet, tempus sementis non extendi ultra hanc vitam, serere autem esse bene operari.

NONVS est, Luc. 16. *Redde rationem villicationis tuæ, iam enim non poteris amplius villicare, &c.* Exponunt Ambrosius & Theophylactus in hunc locum, Hieronymus q. 6. ad Alagiam, Augustinus li. 21. ciuit. Dei, cap. 27. & alij omnes per depositionem à villicatione, mortem, per non posse amplius villicare, non posse amplius mereri, & lucrari.

DECIMVS est, Apoc. 10. *Angelus habens vnum pedem super mare, & alterum super terram, iurat per viuentem in secula seculorum, quia tempus non erit amplius, nimirum bene operandi. Denique Scripturæ hoc passim testantur, & nec vlla syllaba inuenitur pro Lutheri errore.*

Probatur SECUNDO ex Patribus. CYPRIANVS serm. 4. qui est de mortalitate, ad hoc plurimum prodesse mortem dicit, vt eripiamur à periculis peccandi. Dum enim sumus in hac vita, in stadio pugnamus, pugnae finem obitus affert. quem locum Cypriani adducens AVGVSTINVS lib. de prædest. Sanctorum, cap. 14. inquit: *Hic, atq; huiusmodi Doctor ille sententia in Catholica fide luce clarissima satis aperteq; testatur, ad huius corporis depositionem peccandi pericula, tentationesq; merendas, deinceps nulla talia quenquam esse passurum, quod etsi non testaretur, quando de hac re Christianus qualiscunq; dubitaret?*

NOTA, Lutherum non posse vocari Christianum qualemcunq; ex sententia Augustini, sed planè Ethnicum, cum de re dubitet, de qua dicit Augustinus, nullum Christianum dubitare posse. Idem Augustinus in Enchirid. cap. 110. *Quocirca, inquit, hic omne meritum comparatur, quo possit post hanc vitam releuari quispiam, & el grauari: nemo autem se speret,*

erit, quod hic neglexerit, cum obierit apud Deum promereri.

CHRYSOSTOMVS hom. 2. de Lazaro multa dicit in hanc sententiam, & hom. 37. in Matthæum: *Præsens, inquit, hæc vita tam recte, quam contra tibi viuendi tribuit potestatem; postquam vero diem tuum obieris, iudicium & poena consequetur.*

HERONYMVS in cap. 9. Eccles. *Mortuus, inquit, nec iuste possunt agere, nec peccare.* DAMASCENVS lib. 2. de fide Orthodoxa, cap. 4. *Quod est Angelis casus, idem hominibus mors.*

TERTIO probatur ratione: Nam Lutheri sententia se cum ipsa pugnat; dicit enim Lutherus animas illas debere, & posse mereri, quia imperfectæ sunt in caritate, vt nimirum per noua merita augeatur, & perficiatur caritas. Ipse idem dicit, animas illas, quia imperfectæ sunt, timere peccatas, & timendo peccare, & quia semper timent dum imperfectæ sunt, proinde etiam semper peccare dum imperfectæ sunt.

At ista pugnant inter se; nam qui peccat, præsertim mortaliter, non potest mereri dum peccat: Animæ autem illæ semper peccant, dum sunt in Purgatorio, quia semper sunt imperfectæ; ergo nunquam mereri possunt, dum sunt in Purgatorio. Præterea secundò, quia sequitur impossibile esse liberari animas de Purgatorio; nam semper peccabunt, dum timebunt; semper timebunt, dum erunt imperfectæ; semper erunt imperfectæ, donec accesserit noua caritas: noua caritas non potest accedere nisi per merita, non possunt illi mereri, dum peccant, igitur nunquam liberabuntur.

CAPVT TERTIVM.

Soluuntur obiectiones.

SUPEREST argumenta soluere. Argumentum PRIMVM; Animæ quæ in Purgatorio degunt sunt imperfectæ in caritate, igitur proficere debent & mereri vt perficiantur. Quod sunt imperfectæ probatur. PRIMO, quia si illæ animæ essent perfectæ, certè non punirentur; quorsum enim puniantur spiritus perfecti? Si diceres, vt satisfaciant Deo. Contrà, quia Deo maximè fatis fit per caritatem: *Caritas enim operis multitudinem peccatorum,* inquit Petrus, r. Petri 4.

SECUNDO, quia si is qui moritur, debitor sit adhuc de-

cem dierum ieiunij, & tamen summè diligit Deum, incredibile est Deum non condonare illi decem illos dies, cum soleat Deus libenter acceptare voluntatem, ubi non inuenit facultatem; ergo si illi non condonatur debitum, signum est non fuisse perfectum in caritate.

TERTIO, quia si essent perfectæ, non timerent pœnas; nam perfecta caritas foras mittit timorem; si non timerent pœnas, non punirentur, quia non est pœna id quod amatur & libenter recipitur, ergo nõ essent in Purgatorio, nisi essent imperfectæ.

QUARTO, quia nihil esse potest perfectum extra Deum, iuxta illud 1. Corinth. 13. *Cum uenerit quod perfectum est, euacuabitur quod ex parte est*; ergo animæ Purgatorij, quæ beatæ non sunt, necessariò imperfectæ sunt. Deinde probatur consequentia primi argumenti.

PRIMO, impossibile est in via stare, semper enim oportet progredi, aut regredi, ut Bernardus dicit, animæ autem Purgatorij sunt in via, nondum enim pœruenerunt. **SECUNDO**: *Virtus in infirmitate perficitur*. 2. Cor. 12. & aurum in fornace fit lucidius. **TERTIO**, impossibile est creaturam aliquam conservari, nisi accipiat semper amplius & amplius, donec absorbeat in suum principium, ut patet in fluuiis, qui semper accipiunt nouam aquam donec in mare ingredientur, unde cõseruatio dici solet continua quædã creatio. **QUARTO**, caritas post hanc vitam erit maior, ergo augebitur, ergo per merita.

RESPONDEO ad antecedens, animas Purgatorij posse dici imperfectas respectu earum quæ sunt in gloria; & etiam vnã in Purgatorio posse dici imperfectam respectu alterius, siue in Purgatorio, siue in hoc mundo existentis. Tamen absolutè omnem animam in Purgatorio existentem esse perfectam in caritate. Nulla enim est caritas simpliciter imperfecta; dicitur enim 1. Ioannis 2. *Qui seruat uerbum eius, uerè in hoc caritas Dei perfecta est*. Sufficit autem quilibet gradus caritatis, ut quis seruet uerbum, id est, præcepta Domini.

Ad consequentiam dico, animas Purgatorij, quatenus sunt imperfectæ respectu earum, quæ sunt in cœlo, debere perfici in caritate, sed illud augmentum non requirere noua merita; nam erit præmium omnium meritorum præteritorum.

rum. Dupliciter enim augetur caritas; vno modo in genere gratiæ, vt fiat homo aptior ad magis merendum, & hoc augmentum non datur post hanc vitam; altero modo in genere gloriæ, vt remunerentur omnia merita præterita, & hoc fiet in ipsa beatitudine. pars enim præmij erit, vt Augustinus dicit lib. 2. de correp. & gratia, cap. 10. tanta copia caritatis, vt nunquam excidere possit à beatitudine, & à iustitia, quæ ea copia caritatis præditus erit.

Ac vt ordine respondeamus ad singula capita huius objectionis. Ad PRIMVM dico, per caritatem propriè non satisfieri, sed per dolorem à caritate imperatum; & quanquam potest fieri, vt dolor internus sit tantus, & à tanta caritate procedens, vt plenè satisfaciatur pro omni reatu, tamen potest etiam fieri, vt non sit tantus dolor, & propterea remaneat aliquid in Purgatorio luendum; non enim repugnat perfectioni caritatis, quæ habetur extra regnum cælorum, reatus pœnæ, pro quo satisfaciendum sit. Ad verba beati Petri dico, caritatem operirè multitudinem peccatorum, sed non eodem modo quoad culpam, & quoad pœnam; nam culpam delet per actum suum proprium, pœnam autem tollit per opera satisfactoria, quæ ipsa caritas imperat.

Ad SECVNDVM dico similiter, si is qui moritur, summo amore doleat de peccatis, posse eum eo modo satisfacere pro omni pœna; si autem non sit tantus dolor, debere satisfacere postea in Purgatorio. Neque obstat, quod ille cuperet ieiunare, si superesset vita, & Deus acceptat voluntatem vbi non inuenit facultatem; nam in isto inuenitur facultas satisfaciendi, si non ieiunando, certè patiendo in Purgatorio.

Ad TERTIVM dico, animam Purgatorij non timere, sed pati re ipsa pœnas; timor enim est futurorum, non presentium dico præterea non repugnare perfectæ caritati timorem pœnæ, alioqui Christus qui timuit pœnas, & ex eo timore sanguinem sudauit, Lucæ 23. non fuisset perfectus in caritate. Quod autem Ioannes dicit: *Perfecta caritas foras mittit timorem*, non intelligitur de timore pœnæ, sed de timore culpæ, præcipuè propter pœnam; qui enim perfectè diligit, metuit offendere Deum, præcipuè propter ipsum Deum, non propter pœnam, quæ sequitur offendentes Deum; atque ita perfecta caritas libera est ab illo metu seruili,

quo quis nõ audet peccare, ne damnetur, peccaturus si non timeret damnari.

Ad **QVARTVM** dico, extra Deum non posse inueniri aliquid ita perfectum, quod non debeat dici imperfectum respectu perfectionis gloriæ, tamen illud ipsum erit simpliciter perfectum. vnde Paulus Philippen. 3. dicit: *Non quod iam perfectus sim: sequor autem si quomodo apprehendam.* Et infra: *Quicumque ergo perfecti sumus.* vbi se perfectum dicit absolute, & tamen imperfectum, comparatione facta ad beatos.

Iam ad **PRIMVM** in confirmationem consequentiæ, dico, animas Purgatorij non esse in via, sed in termino, quantum ad gratiæ augmentum; qui enim ad urbem aliquam tendit, & peruenit ad eius portas nocturno tempore, dicitur iam peruenisse, & totam viam confecisse, licet portas inueniat clausas, & non possit ingredi, donec Sol oriatur. Præterea quod Bernardus ait: *In via Dei non progredi esse retrogredi,* non debet accipi mathematicè, sed moraliter; non enim vult dicere in quolibet opere mereri augmentum gratiæ, aut perdere aliquid gratiæ, sed eos qui non dant operam, vt proficiant faciliè impelli posse à Diabolo & mundo ad casum, &c.

Ad **SECUNDVM** dico, in primis Paulum ad literam loqui de virtute Dei, quæ dicitur perfici in infirmitate, quia tunc magis apparet Dei potentia, quò plura ei resistunt; habetur enim in Græco *δύναμις μου* id est, virtus mea. **DICO** præterea, virtutem etiam nostram perfici in tribulationibus, sed in hac vita tantum quoad verum augmentum virtutis, quia in hac vita tantum est locus merendi; at in futura dici posse perfici in Purgatorio, non quod ei aliquid addatur, sed quod auferatur rubigo peccatorum; quomodo aurum in fornace fit lucidius, non quia illi aliquid additur, sed quia separatur à terra, & plumbo, & similibus.

Ad **TERTIVM** dico, falsissimum esse illud principium Lutheri in rebus permanentibus, solumque habere locum in successiuis, alioqui res permanentes nunquam essent eadem, & sic Deus nunc non puniret in inferno Iudam illum qui peccauit, sed alium quem postea creauit, nec remuneraret Petrum, qui meruit, sed alium quendam postea creatum. Quod autem dicitur, conseruationem esse continuam creationem,

tionem, est verum, sed intelligitur creari illud idem, non augeri vel fieri aliud nouum.

Ad QUARTVM iam est responsum.

SECVDVM argumentum Lutheri; Animæ in Purgatorio continuò peccant, ergo sunt in statu merendi, & demerendi. Probat antecedens; Animæ illæ horrent pœnas, ac refugiunt & requiem quærunt, ergo peccant. antecedens probat, tum quia alioquin non punirentur, pœna enim inuoluntaria esse debet, & amara, tum etiam, quia non deberemus precari illis requiem, & liberationem à Purgatorio, si amarent ipsæ eas pœnas.

Probat deinde consequentiam. PRIMO, quia verè amanti omnes pœnæ dulcescunt, ergo animæ illæ dum refugiunt pœnas non perfectè amant, proinde peccant. SECUNDO, quia dum refugiunt pœnas, quærunt quæ sua sunt, non honorem Dei. TERTIO, quia Deum amant amore concupiscentiæ; dum cupiunt ab eo liberari. QUARTO, quia Christus dicit, qui non accipit crucem suam, non est me dignus, id est, qui non accipit spontè & libenter. At crux animarum, Purgatorium est; peccant igitur dum eam crucem refugiunt.

RESPONDEO, animas in Purgatorio horrere ac refugere pœnas, & requiem quærere, quatenus eas considerant vt malas, & naturæ contrarias, & tamen simul eas libenter admittere, & tolerare, quatenus considerant vt instrumenta, per quæ purgantur; quomodo ægrotus horret medicinam amaram, & tamen libenter sumit, quia per eam curari sperat, neque in hoc vllum peccatum esse potest. Nam Dominus qui peccare non potuit, horruit tamen pœnas, & dixit: *Pater transfer calicem hunc à me*, Matth. 26. & David clamavit: *Quoniam tribulus, & velociter exaudi me*, Psalm. 68. Et de Petro Christus ait Ioan. vlt. *Cum sensueris alius cinges te, & ducet quo tu non vis*.

Denique S. Cyprianus ait libro de mortalitate: *Quis non tristitia carere optet? quis non ad lasitiam venire festinet?* Et B. Augustinus lib. 10. confessionis, cap. 28. de pœnis loquens: *Tolerare eas iubet non amare, nemo autem quod tolerat amat, quamuis tolerare amat.*

Ad PRIMVM ergo, quo probatur consequentia, dico, verè amanti non sic dulcescere pœnas, vt eas non sentiat, sed

fic, vt licet amaras, toleret tamen alacriter propter amatum, vt patet tum ex dictis, tum ex verbis S. Eleazari 2. Machab. 6. *Tu scis, inquit, Domine, quia cum à morte possem liberari, duos corporis sustineo labores; secundum animum vero propter timorem tuum libenter hac parsor.* Et hic fuit communis affectus Martyrum, qui reuera sentiebant acerbissimos dolores, & tamen libenter eos ferebant, licet quibusdam Deus privilegio quodam sensum doloris abstulerit per affluentiam consolationis, vt scribit Ruffinus lib. 10. histor. cap. 36. de Theo-
10 doro.

Ad SECUNDUM dico, eas non querere quæ sua sunt, sed honorem Dei; cupiunt enim citò liberari, vt possint magis, & melius Deum laudare.

Ad TERTIUM dico, eas amare Deum amore amicitia, quia bonum suum referunt in Deum.

Ad QUARTUM dico, eas accipere crucem suam, quia libenter patiuntur, nec petunt liberari, nisi secundum Dei voluntatem, & per media, quæ Deus instituit. & certè si essent
20 vera quæ dicit Lutherus, id est, animæ illæ si quærent quæ sua sunt, & amarent Deum amore concupiscentiæ, nec velent accipere crucem, non iam imperfectam caritatem, sed nullam haberent, & non in Purgatorio, sed in inferno essent.

Argumentum TERTIUM, quorundam Catholicorum. Animæ Purgatorij habent omnia necessaria ad meritum, nam habent gratiam, fidem, spem, caritatem, & liberum arbitrium saltem quoad exercitium; cur igitur non merentur? DEINDE beati mereri possunt, vt patet de Christo qui semper
30 fuit beatus, & tamen merebatur, ergo multò magis animæ Purgatorij mereri poterunt. Item diues in inferno orare possunt; at ista oratio procedit sine dubio ex caritate, merito igitur exaudiri. DENIQUE idem confirmant auctoritate S. Thomæ, qui in 4. dist. 21. quæst. 1. art. 3. ad quartum dicit, post hanc vitam non posse reperiri meritum respectu præmij essentialis, sed tantum respectu accidentalis.

RESPONDEO ad argumentum, deesse ad meritum animabus Purgatorij statum viæ; Deus enim, vt ex Scripturis manifestè probatur, solum pro tempore huius vitæ constituit

tuit acceptare bona opera ad meritum, vel demeritum. Post
hanc vitam verò bona opera erunt effectus gloriæ, & mala
effectus damnationis.

Ad PRIMAM confirmationem dico, Christum simul fuisse
comprehensorem, & viatorem, & ideo qua parte viator
erat, mereri poterat, vnde post mortem suam, quia desit esse
viator, nihil amplius meruit.

Ad SECUNDAM dico, si animæ Purgatorij orent pro se
vel nobis, de quo inferius in quæstione de suffragiis disseremus,
non mereri, sed solùm impetrare ex meritis præteritis, 10
quomodo nunc sancti orando pro nobis impetrant, licet non
mereantur.

Ad TERTIAM confirmationem dico, S. Thomam mutasse
sententiã; nam in q. 7. de malo, art. 11. disertè docet in Purga-
torio nullum posse esse meritum nec essentialis, nec acciden-
talis præmij; quod idem docent Bonaventura, Scotus, Du-
randus, & alij. fortasse etiam B. Thomas in 4. nomine meriti
non propriè vti voluit, sed impropiè; vocauit enim actum di-
lectionis in Purgatorio meritorium remissionis culpæ venia-
lis, quia est remissorius, licet non per modum meriti propriè 20
dicti, sed per modum contrarij tollentis suum contrarium.

CAPVT QVARTVM.

*Animas in Purgatorio certas esse de sua
æterna salute.*

TERTIA quæstio nunc tractanda est. *Sintne in
Purgatorio animæ certæ de sua salute, an in- 30
certo.* Lutherus artic. 38. docet, non esse certas.
Idem docent quidam Catholici, qui existimant varias esse in
Purgatorio pœnas, & vnã esse omnium maximam, incer-
titudinem salutis, qua dicunt quasdam solùm animas mul-
tari, quæ licet reuera certò saluandæ sint, tamen ipsas hoc
ignorare. ita videtur sentire Dionysius Carthusianus ob quas-
dam visiones, quas ipse refert libro de quatuor nouissimis,
art. 47. IDEM docet Michaël Baij lib. 2. de mer. operum, cap.
8. vbi probare volens peccatum veniale mereri ex natura sua
mortem æternam, adducit in argumentum, quia alioqui
seque-

sequeretur animas in Purgatorio certas esse de sua salute, quod absurdum ei esse videretur.

Denique idem videtur deduci ex sententia Gerfonis *lection. i. de vita spiritali*, & Ioannis Roffensis *contra art. 32. Lutheri*, qui admittunt veniale peccatum non esse tale, nisi ex misericordia Dei, ac proinde iuste posse puniri in æternum, si Deus velit. Hinc enim sequitur, animas, quæ habent venialia peccata, non posse certò scire, an non punientur in æternum, quanquam Roffensis in *art. 38. Lutheri* contendit
 10 animas purgatorij esse certas de sua salute, quod non video quomodo cohareat cum priorè sententia.

At communis Theologorum sententia est, omnes animas quæ in Purgatorio sunt, habere certitudinem suæ salutis. Ut autem intelligatur quantam habeant certitudinem, notandum est, tres esse gradus certitudinis.

PRIMVS est ille, qui excludit omnem spem, & omnem timorem, & talis est beatorum, quibus beatitudo non est futura, sed præsens.

SECUNDVS est ille, qui excludit omnem timorem, sed
 20 non omnem spem, & talis est in Purgatorio; nam beatitudo est illis futura, non præsens, & ideo non tollit expectationem; & rursum est ardua, quia per pœnas ad eam peruenient, & ideo illorum expectatio potest vocari spes, tamen non est contingens, sed necessaria, quia non possunt amplius ab ea excidere, & ideo tollit omnem timorem.

TERTIVS est ille, qui neque spem, neque timorem excludit, & dici potest coniecturalis certitudinis gradus, & talis est noster; nobis enim beatitudo est bonum futurum non præsens, arduum non facile, contingens non necessarium
 30 vel impossibile, & ideo propriissimè speramus, & timemus, sumus enim adhuc in prælio, in stadio, in agone.

Nunc ostendamus rem ita esse; Si animæ non haberent certitudinem salutis, id necessariò fieret propter vnam ex quatuor causis, vel quia adhuc possunt mereri, & demereri, vel quia nondum sunt iudicatæ, vel quia ignorant sententiam iudicis, licet lata sit, vel quia propter magnitudinem dolorum ita absorbetur, & obscuratur earum iudicium, ut non possint cogitare, & videre hanc certitudinem: sed nihil horum habet locum; non primum, ut patuit; non secundum, quia licet iudicium vniuersale nondum sit factum, tamen
 præter

præter illud est particulare, quo iudicantur animæ statim à morte, vt Theologi in 4. dist. 47. & B. Thomas 3. part. q. 59. art. 5. docent.

Adduci solent ad hoc iudicium particulare probandum loca duo: Vnus ex illo Ioan. 5. *Pater omne iudicium dedit filio*, cum enim dicit, *omne iudicium*, videtur plura iudicia significare, vnum videlicet particulare, & aliud vniuersale. Alter ex illo Hebr. 9. *Statusum est hominibus semel mori & post hoc iudicium*. Sed ista loca non concludunt, vterque enim potest intelligi de iudicio vniuersali; nam Ioan. 5. illud (*omne*) non 10
necessariò refertur ad duo iudicia, particulare, & generale, sed ad varios homines iudicandos, & ad varia opera, de quibus iudicandum erit, certè Augustinus exponit de vltimo iudicio. Alterius autem loci ex cap. 9. ad Hebræos sensus est, cum fuerint mortui omnes homines, tunc fiet iudicium, vt

Oecumenius exponit.

Efficaciter tamen probatur iudicium particulare ex illis verbis Ecclesiast. 11. *Facile est cor am Deo in die obitus retribuere unicuique secundum vias suas*. Item: *In fine hominis denudatio operum illius*. Et præterea idem colligitur euidenter ex alia 20
veritate; nam de fide est, mox à morte impios descendere ad æterna supplicia, vt patet Luca 16. de diuite, & iustos ad æterna gaudia, vt patet Luc. 23. de latrone: *Hodie mecum eris in Paradiso*. At non est villo modo credibile prius distribui pœnas, & præmia, quàm fiat iudicium.

Deinde Patres idem docent. CYPRIANVS sermone de mortalitate: *Gratulari, inquit, oportet, & temporis munus amplecti, quòd dum nostram fidem firmiter promissus, & labore tolerato ad Christum per angustam Christi viam pergimus, præmium vite & fidei ipso iudicante capiamus*. CHRYSOSTOMVS 30
homil. 37. in Matth. *Postquam, inquit, diem tuum obievis, iudicium, & pœna consequetur. In inferno enim, & salmista dicit, quis confitebitur tibi?* Vbi etiam si non additur statim, tamen necessariò subintelligitur. Nam refellit Chrysostomus illorum errorem, qui putabant Christum post mortem prædicaturum, & ad pœnitentiam adducturum defunctos.

Vt utrumque hoc argumento; Post mortem sequitur iudicium, & post iudicium pœna inferni, in inferno autem nemo potest confiteri Domino; igitur post mortem non est locus pœnitentiæ; quòd si Chrysostomus non vellet dicere, 10
statim

statim à morte impios iudicari, & trudi in infernum, sed differri hæc omnia in diem nouissimum, nihil valeret argumentum eius. Responderetur enim, hoc medio tempore predicari posse defunctis, dum iudicium vniuersale differtur. A *CVS TINVS* lib. 2. de origine animæ, cap. 4. *iam illud, inquit, rectissime, & Valde salubriter credit, iudicari animas cum de corporibus exierint, antequam veniant ad illud iudicium, quo eas oportet, iam redditâ corporibus, iudicari.*

His accedant exempla eorum, qui se iudicatos testati sunt. Scribit *B. GREGORIUS* lib. 4. Dialogorum, cap. 36. de quodam Stephano, qui cum esset mortuus, & iudici oblatu, audiuit iudicem dicentem; non hunc sed Stephanum Ferrarium vocari iussi, atque ita ille reuixit, & simul Stephanus Ferrarius, qui in vicinia morabatur, obiit. cui simile narrat *S. Augustinus* libro de cura pro mortuis, cap. 12. de quodam Curma. Addit autem Gregorius hæc non fieri vero errore, sed vt per istum quasi errorem, qui mortuus fuerat, reuivisceret, & narraret videntibus tormenta, & iudicium quod manet impios post hanc vitam. *Ibidem* cap. 38. narrat exemplum de quodam Criforio, qui in articulo mortis positus, adhuc viuens vidit sententiam suæ damnationis.

Duo similia narrat *Beda* lib. 5. hist. cap. 14. & 15. de duobus qui desperantes mortui sunt, quia iam viderant iudicium suum peractum, & sententiam latam. Simile narrat *Ioannes Climacus* in sua scala, gra. 7. de quodam eremita, qui in articulo mortis audiebatur quasi in iudicio positus respondero accusationibus, & interdum dicere, falsum est, non feci; interdum, feci, sed poenitentiam egi; interdum, verum dicitis, nec habeo quod respondeam.

30 *DENIQUE* existat memorabile exemplum in vita *S. Brunonis*, de quodam Parisiensi Doctore, qui in ipsa Ecclesia, dum exequiæ fierent, sublato capite ex feretro clamauit; Iusto Dei iudicio accusatus sum, & sequenti die iterum clamauit, iusto Dei iudicio iudicatus sum, & tertio die, iusto Dei iudicio damnatus sum. Est autem notandum circa hæc exemplum, tam iudicium illorum, quod ante mortem peractum est, quam istius Parisiensis, quod in triduum post mortem dilatatum fuit, pertinere ad particularem quandam, & extraordinariam providentiam, qua Deus vtitur ad nos siue instruendos, siue terrendos, alioqui regulariter credendum est iudicium

ciū fieri statim à morte; nam ordinariè tempus pœnitentię utile durat vsque ad extremum spiritum, vt aperte docet Leo Epist. 90. ad Rusticum; nec est ratio cur post mortem retardetur iudiciū, cū Deus non egeat testibus, nec allegationibus, sed in instanti possit iudicare.

Est etiam obseruandum, non posse certò definiti, an animæ deferantur ad iudicem, an ibi iudicentur vbi corpus relinquunt, & similiter an iudicentur immediatè à Christo in forma humana sententiam proferente, an solū diuina virtute, quæ vbique præsens est, an verò per Angelos sententia manifestetur. Quod enim Scripturæ passim dicunt, Christum hominem esse iudicem viuorum & mortuorum, intelligitur de nouissimo generali iudicio; nam etiam ante Christi incarnationem iudiciū particulare exercebatur; vnde non solū non est certum, sed nec admodum probabile, quod Innocentius III. affirmat li. 2. cap. vlt. de contemptu mundi, Christum in forma crucifixi apparere omnibus morientibus, tam bonis, quàm malis.

Quantum ad TERTIVM, quòd sententia iudicis lateat animas quæ iudicantur, & falsum est, & impertinens; falsum quidem, quia iudiciū particulare præcipuè fit ad hoc, vt innotescat sententia ei qui iudicatur; nam propter alios erit generale iudiciū; propter Deum non est necessarium iudiciū, ipse enim omnia nouit, ergo solū fit, vt innotescat ipsi animæ quæ iudicatur; & idem colligitur ex visionibus supra citatis. Est etiam impertinens; nam etiamsi non eis innotesceret sententia iudicis, tamen faciliè possent per se cognoscere qualis sit, ab effectu, quia videbunt se statim in inferno, aut in cælo, aut in purgatorio.

AT poterunt, inquiēs, dubitare, an sint in inferno, vel in purgatorio. Non ita est; nam in inferno blasphematur Deus; in purgatorio laudatur; in inferno non est fides infusa, neque vlla spes, aut caritas Dei: in purgatorio hæc omnia reperiuntur; ergo anima, quæ videbit se sperare in Deo, laudare, & diligere Deum, euidenter cognoscat se in inferno non esse.

AT poterit, inquiunt, metuere ne in infernum mittatur, licet ibi adhuc non sit: sed neque hoc dici potest; nam eadem fides manet in illa, quam hic habuit; hic autem credidit secundum clarissima Scripturarum testimonia; post mortem non posse fieri vltos de bonis malos, nec de malis bonos, & nullum

nullum nisi malum in infernum esse mittendum; cum ergo videat se diligere Deum, & proinde se esse bonam, non metuet damnationem.

DICES; Nos hic videmus nos diligere Deum, & tamen non sumus certi, an simus iusti, ergo etiam animæ illæ non certò colligent ex dilectione sua iustitiam suam.

RESPONDEO; Nos non videmus habitum caritatis infusum, quo iustificamur, sed ex coniecturis fallibilibus colligimus cum in nobis esse; at animæ separatæ sicut se ipsas
 10 perspicuè intuentur; nec enim pendent ibi à phantasmatibus, ita etiam vident omnia quæ in se habent, ac proinde vident, an habeant verum habitum caritatis, an non; præterea sciunt animas esse immobiles tam in bono, quàm in malo, ergo etiam si non viderent habitum suum infusum caritatis, tamen scirent nunquam se Deum blasphematuras, nec odio habituras, ac proinde nunquam in infernum mittendas. Denique ex fide nouerunt animas impiorum mox à morte corporis detrudi in infernum, nec differri vltius eorum supplicia, id enim omnes Catholici credunt ex cap. 16. Lucæ, ergo
 20 animæ quæ se vident extra infernum, credunt firmiter se in eum nunquam mittendas.

Quantum ad QVARTVM, quòd animæ illæ propter nimios dolores impediuntur à cognitione sui status, & proinde putent se esse in inferno, & in quadam turbatione & desperatione versentur, vt Lutherus dicit, falsissimum est. Nam
 PRIMÒ, anima diuitis in inferno Lucæ 16. non impediabatur à cognitione sui status, quantò minus ergo impediuntur animæ, quæ sunt in Purgatorio?

30 SECUNDO, quòd in hoc mundo impediuntur homines à recto iudicio ex intensione dolorum, prouenit ex læsione organi corporei, at ibi est pura mens spiritualis, & incorruptibilis.

TERTIO, quia Ecclesia in canone Missæ dicit: *Memento Domine famulorum, famularumque tuarum, quæ nos præcesserunt cum signo fidei, & dormiunt in somno pacis.* Vbi Ecclesia orat pro animabus Purgatorij; nam subdit, ipsis Domine, & omnibus in Christo quiescentibus, locum refrigerij, lucis, & pacis, vt indulgeas deprecamur. At certè quæ dormire dicuntur in somno pacis, non sunt anxie, nec desperant, sed potius habent

habent admixtam cum summis cruciatibus incredibilem consolationem propter certam spem salutis.

QUARTO, quia si crederent se damnatas, non peterent suffragia viuorum, nec dicerent se breui liberandas si pro eis oretur, vt patet apud Gregorium lib.4. Dialogorum, cap.40. & exemplis allatis in prima quaestione.

CAPVT QVINTVM.

Soluuntur obiectiones.

10



BIICIUNT primò testimonia quædam Scripturarum, quibus vtitur Ecclesia in officio defunctorum, dum pro animabus, quæ degunt in Purgatorio, orare cupit. Psalm.6. *Anima mea turbata est valde. Et ibidem: sana animam meam, quoniam conturbata sunt ossa mea.* Et Psalm.114. *Circumdederunt me dolores mortis, & pericula inferni inuenerunt me.* Certè ista tanta perturbatio & anxietas non potest nasci ex solis pœnis, sed ex incertitudine, & metu æternæ damnationis; nam si animæ illæ perfectæ essent in caritate, & certæ essent de sua salute, non ita timerent, cum scriptum sit Proverb.12. non contristabit iustum quidquid acciderit ei.

20

RESPONDEO, stultum esse, ex eo quod Ecclesia vtitur aliquo Psalmo in officio defunctorum, velle omnia verba eius Psalmi intelligere ad literam de defunctis; quomodo enim intelligemus de defunctis illa verba eiusdem 6. Psalmi: *Laborabo per singulas noctes lectum meum, lacrymis meis stratum meum rigabo?* Itaque Ecclesia propter vnâ aut alteram sententiam, quæ ad rem presentem facit, eorum aliquem locum Scripturæ legere solet, etiam si maior pars illius loci ad rem presentem non faciat. Sic in dedicatione Ecclesiæ legitur Euangelium de Zachæo, quia illa vltima verba: *Hodie salus huius domus facta est.* conueniunt aliquo modo dedicationi, & consecrationi Ecclesiæ. sic in Assumptione B. Virginis legitur Euangelium de Martha, & Magdalena propter illa verba: *Maria optimam partem elegit, quæ non auferetur ab ea.* Sic denique (vt omittam cetera) in officio defunctorum propter illa verba Psalm.6. *Miserere mei Domine, quoniam infirmus sum.*

30

HHHhh

Et

Et propter illa Psal. 114. *Placebo Domino in regione uiuorum.*
leguntur integri illi Psalmi.

Adde, quod falsum etiam est, quod in argumento assumitur, turbationem, & tristitiam non nasci ex dolore, sed ex incertitudine, aut desperatione salutis; nam Dominus ipse Ioan. 12. cap. de se ait: *Nunc anima mea turbata est.* Et Matth. 26. cepit contristari & mœstus esse, & tamen nec incertitudo, nec desperatio in Dominum cadere poterat. locus autem Prouerbiorum non debet accipi de quouis tristitia, sed de
10 tristitia deiciente, ac deprimente, quæ mortem operatur, quam B. Paulus 2. Cor. 7. vocat tristitiam huius seculi.

ALTERA obiectio sumitur ex illa oratione, quæ post Euangelium in Missa de mortuis recitatur: *Libera Domine animas omnium fidelium defunctorum de pœnis inferni. & de profundo lacu, libera eas de ore leonis, ne absorbeat eas tartarus, ne cadant in obscurum, &c.*

RESPONDENT aliqui, Ecclesiam orare pro agonizantibus, ne damnentur ad inferos, sed repugnat illud; Libera animas omnium fidelium defunctorum, non enim agonizantes dicuntur animæ defunctorum. Deinde usus Ecclesiæ habet, ut hæc oratio dicatur etiam in anniuersariis defunctorum pro iis animabus, quæ ante multos annos migrarunt à corpore. ALII dicunt, hanc orationem fundi pro iis, qui sunt in Gehenna, quas interdum liberari contingit, ut fertur de Traiano: sed, ut omittam improbabilem esse illam Traiani historiam, qui in Gehenna sunt iam ceciderunt in obscurum, atq; absorpti sunt à tartaro, quid igitur pro illis Ecclesia orat ne cadant in obscurum, neue absorbeantur à tartaro? Deinde Ecclesia pro fidelibus tantum orat: *Libera, in-*
30 *quit, animas fidelium defunctorum.* Non autem sunt fideles, qui damnati sunt ad inferos.

Duæ igitur solutiones alix dari possunt. UNA est, quod Ecclesia oret pro animabus, quæ in Purgatorio degunt, ne damnentur ad pœnas Gehennæ sempiternas, non quidem quod certum non sit eas non damnandas ad eas pœnas, sed quia uult Deus nos orare etiam pro iis rebus, quas certò accipturi sumus.

Sed aduersus hanc responsonem obiici potest, quia et si Ecclesia interdum oret pro iis rebus, quas certò est acceptura, non

ra, non tamen orat pro iis rebus, quas iam accepit: porro iam accepit ne animæ illæ damnentur, cum certam sententiam illæ habuerint, & securissimæ sint, deinde mens fidelium, qui pro defunctis orant vel orari cupiunt, certè eò fertur, vt animas illas iuuent, & expediant à præsentibus pœnis Purgatorij.

Verùm istæ obiectiones facilè diluuntur; nam etsi animæ Purgatorij iam acceperint primam sententiam in iudicio particulari, eaq; sententia liberæ sint à Gehenna: tamen adhuc superest iudicium generale, in quo secundam sententiam accepturæ sunt. Quocirca Ecclesia orans, ne in iudicio extremo animæ illæ cadant in obscurum, nèue absorbeantur à tartaro, non orat pro ea re quam accepit, sed pro ea quam acceptura est.

Ad illud verò de intentione fidelium, respondeo, etiam illi intentioni satisfieri; nam in illa oratione vtrumque petitur, nimirum, vt liberentur animæ illæ de pœnis inferni, id est, Purgatorij, quas in præsentia patiuntur, & postea liberentur à sententia damnationis in extremo iudicio ferenda.

ALTERA solutio est, quod Ecclesia verè orat quantum ad intentionem suam, vt animæ liberentur à pœnis Purgatorij, tamen vtatur eo modo loquendi, quasi animæ tunc migrarent à corpore, & in periculo essent æternæ salutis, quia commemorat, & repræsentat diem depositionis siue obitus; vt enim in celebritatibus festorum Incarnationis, Natalis, Apparitionis, Passionis, Resurrectionis, & Ascensionis Domini Ecclesia ita orat, ac si tunc deberet Christus, vel incarnari, vel nasci, &c. quia repræsentat illa mysteria vt præsentia, & tamen non intendit ad literam precari, vt verbum carnem assumat, aut nascatur de virgine, &c. sed vt nobis applicetur fructus eorum mysteriorum: ita quoque in sacrificio pro defunctis, quia commemoratur dies obitus illorum, Ecclesia ita pro illis orat, ac si tunc morerentur; & tamen intendit orare, vt liberentur ab inferno eo modo, quo liberari possunt, id est, vt nō detineantur diuini in illis pœnis, vel vt refrigerium aliquod doloribus misceretur. Denique, quomodo non est absurdum, nunc post mille & quingentos annos in aduentu Domini dicere: *Rorate caeli de super,*

*Et nubes pluant iustum, aperiatur terra, & germinet saluati-
rem. & alia multa id genus, ita non est absurdum pro defun-
ctis dicere: Libera eas de ore leonis, ne cadant in obscurum, &c.*

CAPVT SEXTVM.

De loco Purgatorij.



SEQVITVR quæstio quarta: *Ubi sit Purga-
torium?* De qua quæstione nihil Ecclesia de-
finiuit: sunt autem multæ opiniones.

PRIMA quorundam, qui putant ibi ani-
mas purgari, vbi peccauerunt, id est, variis in
locis. & quidem quod variis in locis animæ purgentur, satis
probabiliter colligitur ex Gregorio lib. 4. Dialogorum, cap.
40. & cap. 55. qui refert animam Paschasij, & cuiusdam alte-
rius in balneis quibusdam purgatas. Necnon ex epistola Pe-
tri Damiani de miraculis sui temporis, vbi describit visionem
de purgatione animæ sancti Seuerini in quodam flumine. At
quod omnes ibi puniantur, vbi peccauerunt, non est proba-
bile; nam contingit aliquem in multis locis peccasse, nec est
verisimile in omnibus illis purgandum. Præterea visiones
prædictæ contrarium ostendunt; nam Paschasius Diaconus
peccauerat Romæ in electione Pontificis, purgabatur au-
tem in thermis Puteolanis, & S. Seuerinus peccauerat in Pa-
latio Imperatoris, & purgabatur in flumine.

SECUNDA opinio, loca animarum non esse corporalia.
ita Augustinus lib. 12. de Genesi, cap. 33. sed retractauit lib. 2.
retract. cap. 24.

TERTIA, loca pœnalia animarum esse hunc mundum,
in quo animæ manent in corpore tanquam in carcere. Hanc
refert, & refellit Irenæus in fine li. 5. nam Scriptura dicit, ani-
mas post hanc vitam descendere in infernum, vt patet Luca
16. & alibi.

QUARTA, infernum & purgatorium animæ, nihil esse
aliud præter conscientiam acculantem & punientem pecca-
ta. ita Philo in libro de congressu quærendæ eruditionis gra-
tia, & Origenes, vt refert Hieronymus in epistola ad Auitum.
Hæc refellitur; nam si ista opinio esset vera, non minus esse-
mus nunc in inferno vel purgatorio, quam post mortem.

QUINTA est, infernum, & proinde purgatorium (sunt enim loca vicina) fore in valle Iosaphat. ita refert Chryso-
stomus sensisse veteres aliquos homin. de præmiis beatorum,
tomo 3. similem sententiam refert Gregorius lib. 4. Dialogo-
rum, cap. 42. forè argumentum istorum fuit, quia Christus
passim infernum vocat Gehennam; Gehenna autem est val-
lis quædam adeo coniuncta cum valle Iosaphat, ut pars eius
esse videatur, de quo nomine infra dicemus.

SEXTA opinio est, infernum esse statum animæ extra cor-
pus; nam dum est in corpore in luce versatur, ut ex operibus
apparet: cum de corpore exit, nihil amplius videre potest nisi
beata sit, & istæ sunt tenebræ exteriores. ita refert Theophy-
lactus in cap. 16. Luc.

SEPTIMA est, locum pœnalem animarum non esse ter-
ram, sed aërem istum caliginosum ubi Dæmones versantur.
Ita Gregorius Nyssenus in libro de anima, & resurrectione,
Chrysoctomus homil. de præmiis beatorum, & Auctor ope-
ris imperfecti in Matth. homil. 53. cui sententiæ fauet histo-
ria S. Fursæi apud Bedam lib. 3. historiæ Anglorum, cap. 19. il-
lo enim defuncto cum ab Angelis in cœlum deduceretur,
ostensi sunt maximi ignes supra aërem, qui seruabantur (ut
Angelus dicebat) ad mundi conflagrationem, & interim ex-
aminabantur ibi hominum opera.

OCTAVA est communis Scholasticorum, Purgatorium
esse infra viscera terræ, inferno ipsi vicinum. Constituunt
enim Scholastici communi consensu intra terram quatuor
sinus, siue vnum in quatuor partes diuisum, vnum pro dam-
natis, alterum pro purgandis, tertium pro infantibus sine
Baptismo abeuntibus, quartum pro iustis, qui moriebantur
ante Christi passionem, qui nunc vacuus remanet; quorum
sufficiencia sumitur penes genera pœnarum, sunt enim hæc
omnia loca pœnalia; omnis autem pœna, aut est tantum
damni, aut etiam sensus; & rursus aut æterna, aut tempora-
lis: pro pœna ergo solius damni æterna, est limbus puero-
rum; pro pœna solius damni temporali, erat limbus patrum;
pro pœna damni, & sensus æterna, est infernus; pro pœna
damni & sensus temporali, est Purgatorium.

Quia verò hæc omnia fabulas esse Caluinus dicit lib. 2.
Instit. cap. 16. §. 9. & similiter discipulus eius Beza in cap. 2.
HHHh 3 A Cor.

Actor. & Magister eius Bucerus in cap. 27. Matth. de singulis probandum est. Ac PRIMVM, quod intra viscera terræ sit locus aliquis animarum, qui generali vocabulo vocatur infernus, demonstratum est à nobis lib. 4. de Christo, cap. 9. inde petat Lector si velit plenè cognoscere, quæ ad hunc locum pertinent.

PORRO ad argumenta, quæ tunc attulimus, accedant variæ eruptiones ignis, quæ in terra apparent, quas non temerè B. Gregorius putat esse indicia quædam inferni, intra viscera terræ existentis, libro 4. Dialogorum, cap. 35. nam in eodem libro cap. 30. scribit se certa relatione cognouisse, eadem ipsa hora, qua obiit Rex Theodoricus Arianus, visam fuisse animam eius iactari in foueam Vulcani, quæ est in Sicilia, & Laurentius Surius in historia anni M. D. XXXVII. scribit circa montem Heelam Insulæ Islandiæ, vnde erumpunt flammæ, & audiuntur quædam quasi tonitrua horribilia, sæpe apparere animas, quæ dicant se mitti ad illum montem. Hæc de inferis in genere.

Nunc de singulis locis. Ac primùm quoddam infernus damnatorum sit in profundissimis terræ partibus, probatur PRIMO, quia intra viscera terræ est infernus, vt iam probauimus, sed Luc. 16. anima diuitis Epulonis dicitur fuisse in inferno, & non solum in inferno, sed etiam in loco profundissimo, quando quidem vt videret Lazarum, qui etiam tunc erat in locis subterraneis, sursum versus aspicere debuit. PRAETEREA ratio ipsa dicit, vt si locus beatorum est in summo cælo, locus damnatorum sit in loco remotissimo à cælo, nihil autem remotius centro terræ.

DEINDE, quoddam Purgatorium sit etiam sub terra, & inferno damnatorum vicinum, probatur PRIMO ex illis verbis Actor. 2. *Solusis doloribus inferni*, quæ intelliguntur ab Augustino epist. 99. de pœnis Purgatorij, vnde etiam Ecclesia in Missa de defunctis dicit: *Libera animas defunctorum de pœnis inferni, & de profundo lacu*. SECUNDO, id confirmatur ex visione, quam refert Beda libro 5. capite 13. historiæ, vbi apertè visum est Purgatorium inferno damnatorum contiguum. DENIQUE, Theologi ferè omnes docent eodem in loco esse, & eodem igne torqueri damnatos, & animas Purgatorij.

Quod

Quod autem limbus puerorum sit in inferno, probatur; nam Concilium Florentinum sessione vltima disertè definit tam eos qui moriuntur cum peccato mortali, quam eos qui cum solo originali, mox in infernum descendere, pœnis tamen disparibus puniendos; & B. Augustinus lib. 1. de Baptismo paruulorum, cap. 28. & lib. 5. hypognostici dicit fidem Catholicam non nosse nisi duo loca, vbi homines sint futuri perpetud, cœlum beatorum & infernum damnatorum. Est tamen communis opinio Scholasticorum, limbum puerorum esse in loco inferni altiore, quam sit Purgatorium, ita vt ad eum ignis non perueniat; quam sequutus est Innocentius, III. capite Maiores, extra de Baptismo. sed de hac re alibi disputandum est.

Quod denique limbus Patrum sit in inferno, sed in parte suprema, probatum est satis accuratè in li. 4. de Christo, cap. 10. Vnum solum argumentum repetemus, quod in eo loco nimis breuiter tractatum fuit. Igitur li. 1. Reg. cap. 28. anima Samuelis de locis subterraneis ascendere visa est: *Vidi*, inquit *Pythouissa, Deos ascendentes de terra.*

Respondent aduersarij illum non fuisse verè Samuelem, sed Diabolum in forma eius, vt docent Tertullianus libro de anima prope finem, Auctor quæstionum apud Iustinum quæst. 52. & Auctor quæstionum veteris Testamenti quæst. 27. apud Augustinum, & Auctor librorum de mirabilibus sacræ Scripturæ lib. 2. cap. 11. Procopius & Eucherius in hunc locum libri Regum, & Isidorus lib. 8. etymologiarum, cap. 9. qui his rationibus mouentur.

PRIMO, quia non est credibile Samuelem subiectum fuisse Pythouisse, nec etiam spontè venisse; quia artem magicam confirmasset. SECUNDO, quia Samuel non se adorari passus fuisset, vt illa vmbra fecit. TERTIO, quia non dixisset Saul: *Cras tu, & filij tui mecum eritis.* Nec enim Saulis anima ad limbum Patrum, sed ad Gehennam descensura erat. QUARTO, quia Deus negauit Sauli responsum per Prophetas, per oracula & per somnia, vt in eo capite dicitur; ergo non est credibile responsum postea fuisse per Pythouissam.

At his non obstantibus, tenendum est, verè Samuelis animam fuisse eam, quæ apparuit, & proinde vehementer confirmari sententiam nostram de loco subterraneo animarum.

Nam in primis auctores citati sunt omnes aut incerti, aut obscuri; at qui contrarium docent, certi & clarissimi sunt, nimirum Iosephus lib. 6. antiquit. cap. 15. Iustinus in Dialogo cum Triphone ultra medium, Basilius epistola 80. ad Eustathium medicum, Ambrosius in cap. 1. Lucæ, Hieronymus in cap. 7. Isaïæ, & Augustinus libro de cura pro mortuis, cap. 15. Neque obstat quod Augustinus lib. 2. ad Simplicianum q. 3. dubitauerit, an fuerit illa anima, nec ne; nam librum de cura pro mortuis scripsit posterius, & re diligentius considerata.

10 Præter hos veteres idem docent recentiores in hunc locum, Lyranus, Abulensis, Dionysius Carthusianus, & Caietanus.

Sunt etiam pro hac sententia fortissimæ rationes. PRIMA, quia Scriptura perpetuò vocat Samuelem, eum, qui apparuit: *Cum vidisset*, inquit, *mulier Samuelem*. Et rursus: *Dixit Samuel ad Saul, & intellexit ergo Saul quòd Samuel esset*. At certè non diceret, intellexit, sed cogitauit, vel putauit, si id non esset verum.

20 SECUNDA, quia Eccles. 46. ponitur in laudibus Samuelis, quòd mortuus prophetauerit, & annunciauerit Regi que ventura erant. At quænam laus est quod Diabolus alicuius speciem assumat, & decipiat? & hoc est argumentum propter quod Augustinus libro de cura pro mortuis asserit, verè fuisse Samuelem illum, qui apparuit, cuius testimonij non meminerat cum scriberet ad Simplicianum.

TERTIA, quia prædixit Sauli futura, quæ Diabolus scire non poterat, nimirum sequenti die cum filiis periturum, exercitum dissipandum, Dauidem regnaturum, &c.

30 ULTIMO, quia rationes contrariæ nihil concludunt. Ad PRIMVM dico, Samuelem non venisse iussu Pythonissæ, sed iussu Dei, & potius impediuisset quàm confirmasse artem magicam; præuenit enim Samuel aduentu suo effectum incantationis; & contrario modo ascendit atque alij soleant, qui per incantationem excitantur. & hæc est causa cur Pythonissa turbata fuerit, & sibi impostum diceret. Si enim verum est, quod Rabbinus scribunt, vmbrem mortuorum, quæ vi magicæ artis euocantur, capite deorsum verso ascendant: Samuel autem recta figura ascendit, ita vt primùm caput, deinde pectus, postremò pedes è terra emergere visi sint. Ad

Ad SECUNDUM dico, illam adorationem non fuisse latram, sed reuerentiam debitam animæ Samuelis.

Ad TERTIUM dico, illud; *Mecum eritis*, non significare in sinu Abrahæ eritis, sed mecum eritis sub terram, id est, mortui eritis; nam cum inter filios Saulis esset etiam Ionathas iustus, non erant descensuri ad eundem locum Saul, & Ionathas, & tamen Samuel dicit in genere, *Mecum eritis*.

Ad QUARTUM dico, Deum se iratum Sauli ostendere voluisse, idque fecisse tam non respondendo quando interrogabatur, quàm respondendo quando non interrogabatur; utrumque enim est signum iræ. ADDE, quòd cum Saul interrogabat Deum, si Deus respondisset, potuisset Saul declinare bellum, & pœnam sibi à Deo paratam; at cum interrogauit Pythonissam, iam erant omnia parata, & acies instructæ, & in conspectu positæ, ut nullo modo prælium detrectari posset; tunc ergo Deus, ut magis puniret Saulem, prædixit ei per Prophetam interitum suum, & filiorum, & totius exercitus.

Habemus igitur, Purgatorium, Infernum, ac limbos Patrum & puerorum, loca subterranea esse. 10

CAPVT SEPTIMVM.

Sitne post hanc vitam aliquis locus pro animabus iustis, præter Cælum & Purgatorium.

DE prædictis receptaculis subterraneis animarum, duo quædam à Theologis tractari solent, quæ hic breuiter inserere placuit, plenioris doctrinæ causa. PRIMO, quærunt, an præter hæc loca sit aliquis alius locus, ubi retineantur animæ antequam ad regnum cælorum perueniant. SECUNDO, an ex his locis egredi possint.

Quantum ad PRIMVM, difficultas est satis magna, quia ex vna parte omnes Theologi docent, non esse alia receptacula præter quatuor numerata, & Concilium Florentinum sessione vltima definit, animas, quæ nihil purgandum habent, mox recipi in cælum. Ex altera parte narrat Beda lib. 5.

HHHh 5 hist.

hist. cap. 13. visionem valde probabilem, cui ipse fidem adhibere non dubitauit. fuit autem in illa ostensum cuidam animæ, quæ ad corpus postea rediit, præter infernum & purgatorium, & regnum cælorum, quoddam quasi pratum florentissimum, lucidissimum, odoratum, amænum, in quo decubant animæ quæ nihil patiebantur, sed tamen ibi manebant, quia nondum idoneæ erant visioni beatæ. cui reuelationi multas alias conformes adducit Dionysius Carthusianus in Dialogo de iudicio particulari, art. 31. & Gregorius li. 4. Dialogorum, cap. 36.

Videretur mihi dicendum, non esse improbableem talem alium locum reperiri, ceterum eiusmodi locum ad Purgatorium pertinere, etsi enim ibi nulla sit pœna sensus, tamen est pœna damni, pœna autem non conuenit nisi animæ, quæ nondum plenè purgata est. itaque erit locus ille mitissimum Purgatorium, & quasi carcer quidam senatorius, atque honoratus.

CAPVT OCTAVVM.

Num ex receptaculis suis animæ defunctorum egredi valeant.



ALTERIVS autem quæstionis triplex esse potest sensus. PRIMVS, an possint exire nunquam redituræ, quia nimirum transferantur de vno receptaculo ad aliud. SECVNDVS, an possint exire, & rursum redeant ad suum locum. TERTIVS, an possint ita egredi, vt hic nobiscum iterum viuant.

Quantum ad PRIMVM sensum, facilè responderi potest, ex inferno damnatorum, limboque puerorum non dari regressum; ex Purgatorio, limboque Patrum dari; sunt enim animæ impiorum damnatæ ad perpetuos carceres, & ignes Gehennæ, & similiter animæ puerorum ad perpetuum exilium, & tenebras. Animæ autem sanctorum Patrum damnatæ erant ad exilium temporale, & animæ Purgatorij ad carceres temporales. ratio est, quia causa carceris, vel exilij damnatorum est culpa mortalis actualis, vel originalis, quæ nunquam remittetur; causa autem exilij Patrum

num fuit debitum temporale contractum ex peccato primi parentis, ille enim suo peccato cœlum clauserat, quod aperiri non potuit, nisi Christi sanguine re ipsa effuso; causa vero Purgatorij est reatus temporalis pœnæ, quæ necessariò finem habet.

CONTRA hoc tamen est auctoritas Ioannis Damasceni, qui in oratione de mortuis dicit, orationibus S. Theclæ liberatam de inferno animam Falconillæ cuiusdam fœminæ paganæ, & orationibus S. Gregorij Papæ animam Traiani Imperatoris.

RESPONDEO, si hæc historia defendi debeat, oportere dicere, Traianum non fuisse damnatum absolute ad inferos, sed solum punitum in inferno secundum præsentia eius demerita, & suspensam sententiam propter præuisas beati Gregorij preces; & præterea non immediate ex inferno ad cœlum transisse, sed prius corpori unitum, & tunc baptizatum, & pœnitentiam in hac vita egisse; ista enim est communis solutio B. Thomæ, Durandi, Richardi, & aliorum in 4. dist. 45. Quia tamen Traianum resurrexisse, sine teste dicitur, nec enim ullus veterum huius rei meminit, & repugnat hoc sententiæ Damasceni, qui satis aperte docet de inferno ad cœlum transisse, non autem ad hanc vitam rediisse Traianum, etsi pœnitentiam egit, in inferno illam egisse: Cum tamen solius Damasceni auctoritate nitantur auctores citati, ideo magis propendo in sententiam Melchioris Cani, qui lib. II. de locis, cap. 2. simpliciter improbat hanc historiam ut confictam, & Dominici à Soto, qui in 4. dist. 45. quæst. 2. art. 2. dicit, hanc historiam sibi creditu durissimam esse, non obstante Apologia Alphonfi Ciaconis, pro hac historia ante hoc triennium edita. Rationes autem quibus moueor sunt quatuor:

PRIMA, quia quotquot hanc historiam admiserunt, id fecerunt propter Damasceni auctoritatem; at librum illum non esse Damasceni facile probari potest; nam in eo libro auctor non solum dicit Traianum, & Falconillam ab inferno damnatorum ad regnum cœlorum transiisse, sed etiam multos alios, qui in infernum descenderant, quia fide diuina caruerint, à Christo conuersos, & saluatos quando ad inferos descendit; quod & per se erroneum est, &

contrarium verbis Damasceni lib. 2. de fide, cap. 4. ubi dicitur hominibus id esse mortem, quod fuit Angelis casus.

SECUNDA ratio est, quia nullus auctor Latinus historiae eius meminit, ut Paulus Diaconus, Anastasius Bibliothecarius, Marianus Scotus, Ado, ac ne ipse quidem Beda, qui B. Gregorij studiosissimus fuit; immò in ipsa Romana Ecclesia, & eius archiuis nulla huius rei memoria exstabat, quando Ioannes Diaconus vitam B. Gregorij scripsit; ipse enim vitam B. Gregorij ex archiuis Romanis diligentissimè collectam, & tamen lib. 2. cap. 44. dicit, hanc historiam de Traiano repertam in Ecclesia quadam Anglorum, nec fidem certam illi habitam à Romanis.

TERTIA, quia B. Gregorius lib. 34. mor. cap. 13. disertè docet, non posse orari pro infidelibus defunctis, quemadmodum nec pro Diabolo, quando quidem in eadem aeterna, & irrevocabili damnatione sunt; quomodo ergo credibile est eum id fecisse? Respondet Abulensis quæstion. 57. in 4. li. Regum, ideo Gregorium peccasse mortaliter orando pro Traiano; sed absurdissimum est & ferè blasphemum, cum constet Gregorium virum fuisse non modò sanctissimum, verùm etiam prudentissimum. Deinde si peccavit mortaliter orando, quomodo fuit exauditus? Num Deus placatur, quando offenditur? Respondet Ciaconus, non peccasse Gregorium orando, sed meruisse potius, quia licet ordinariè non liceat orare pro damnatis, tamen licet ex peculiari instinctu diuino.

AT CONTRA. Eadem historia refert Gregorium propter hoc peccatum punitum fuisse perpetuo dolore stomachi, & pedum. Respondet ipse, hunc dolorem non datum Gregorio in pœnam, sed ne elatio illi subreperet. At contrà; nam Petrus Diaconus, quem ipse citat ex libro quodam bibliothecæ Vaticanæ, dicit, Gregorio ab Angelo dictum fuisse, quòd quia præsumperat hoc petere, laboraret vsq; ad mortem dolore, &c. ergo in pœnam peccati; nam præsumptio peccatum est.

QUARTA ratio est, quia argumenta Ciaconis non concludunt; ipse enim nititur præcipuè his testibus. PRIMO, testimonio Petri & Ioannis Diaconorum Gregorij, quod ex stare dicit in bibliotheca Vaticana. SECUNDO, testimonio inno-

inominati auctoris, qui scripsit vitam B. Gregorij, quæ præ-
notitur operibus eius impressis Basileæ anno M. D. LXIV.
huius auctor videtur vixisse tempore ipsius Gregorij. TERTIO,
testimonio Damasceni. QUARTO, testimonio Ioan. Diaconi,
lib. 2. cap. 44. vitæ B. Gregorij. QUINTO, testimonio S.
Thomæ. SEXTO, testimonio S. Birgittæ. SEPTIMO, testi-
monio Mechtildis.

PRIMUM testimonium mihi valde suspectum est; nam
si illud esset verè Petri Diaconi, non diceret Ioannes Diaconi,
historiam hanc non existare in Romana Ecclesia, sed so-
lùm apud Anglos. præterea iste Petrus, dicit, Gregorium à
Deo petiuisse, vt quotquot sepelirentur in Ecclesia S. Andree
in elio Scauri, non possent damnari, dummodò fidem te-
nerint Christianam, & impetrauissent. At certè Gregorius vir
prudētissimus nunquam ita orasset; nam vel intelligit de
fide infirmi, vel de formata; si de infirmi, ergo voluisset sal-
uari homines morientes sine caritate, quod quis credat; si de
formata, non erat opus id petere, nam vbicunque sepeliatur,
qui moritur cum caritate, damnari non potest. ADDE, quòd
totum illud fragmentum redolet nouitatem, & proinde sup-
posititium videtur: vocat enim Gregorium diuum, quod no-
men eo tempore erat inusitatum. Item anteponit Cardina-
les Episcopis; quod repugnat Ioanni Diacono, qui in vita S.
Gregorij scribit, ex Cardinalibus consueuisse promoueri à
Gregorio multos ad Episcopatum, vt ad gradum altio-
rem, alia quoque habet non pauca signa nouitatis.

TERTIUM testimonium iam est reiectum.

QUARTUM est contra ipsum Ciaconum; nam Ioannes
Diaconus dicit, animam Traiani non esse liberatam de in-
ferno, sed solùm id obrinuisse, vt in inferno existens non pa-
teretur pœnam ignis, Ciaconus autem vult eam esse in celo
beatam.

QUINTUM est etiam contra ipsum; nam B. Thomas vbi
ex professo hoc tractat, nimirum in 4. d. 45. q. 2. probabi-
lissimum putat animam Traiani liberatam solùm à pœnis
infernì vsque ad diem iudicij, ac deinceps eruciandam cum
ceteris.

SEXIMUM est valde obscurum; nam S. Birgitta non dicit
Traianum esse saluum, sed solùm eleuatam ad gradum
altio-

altiozem, vbi indicat in inferno aliquid salutis recepisse.

SEPTIMUM est expresse contra ipsum; nam Mechtildis dicit, se petiuisse à Domino quid egerit cum animabus Sampsonis, Salomonis, Origenis, & Traiani. & responsum esse, Deum velle esse omnibus incognitum, quid sua liberalitas cum illis egerit. si ergo Deus vult esse incognitum, non est credendum auctoribus, qui asserunt Traianum esse in celo. Adde, quodd Deus in hac reuelatione coniungit Traianum cum Origene: At in prato spirituali, quod citatur à **VII.** Synodo, & à Ioanne Diacono lib. 2. cap. 45. vitæ B. Gregorij, narratur alia reuelatio, qua Origenes visus est in Gehenna ignis cum Ario, & Nestorio, & V. Synodus, cap. 11. dicit anathema Origeni sicut Ario, Nestorio, & ceteris hæreticis.

Quantum ad **SECUNDUM**, quidam existimant animas non posse vnquam de suis receptaculis egredi, sed omnes apparitiones esse Dæmonum, qui fingunt se esse animas de Purgatorio exeuntes, & suffragia postulantes. ita Tertullianus libro de anima circa finem, & Auctor quæstionum ad Antiochum quæst. 11. & 13. idem videntur dicere Chrysostomus hom. 29. in Matth. & homil. 2. & 4. de Lazaro, & Theophylactus in cap. 8. Matthæi, quanquam hi duo, si bene legantur, non dicunt, nullo modo posse animas egredi ad nos, sed non posse egredi pro arbitrio suo, nec verti in Dæmones, nec vāgari inter nos more Dæmonum. Hæretici huius temporis omnes apparitiones animarum rident, tanquam Dæmonum illusiones, præcipuè Magdeburgenses.

Verissima tamen est Augustini sententia libro de cura pro mortuis, cap. 15. & 16. nimis impudentiæ esse negare animas interdum ad nos redire Deo iubente vel permittente; **30** habemus enim testimonia grauissimorum auctorum, de regressu animarum ex omnibus receptaculis, præterquam ex limbo puerorū. Nam quod ex celo animæ beatæ ad nos aliquando veniant, sunt exempla certissima apud Eusebium lib. 6. hist. cap. 5. Augustinum de cura pro mortuis, ca. 16. Sulpitium in vita Martini, Paulinum in vita Ambrosij, Theodoretum lib. 5. hist. cap. 24. Gregorium lib. 3. Dialogorum, cap. 24. & 25. & in VII. Synodo action. 4.

Quòd ex limbo Patrum apparuerint animæ probat Augustinus

Rinus libro de cura pro mortuis, ca. 15. & 16. ex lib. 1. Regum, cap. 28. vbi Samuelis anima apparuit Sauli, & ex Matth. 17. vbi Moses apparuit cum Helia in monte Thabor. quamuis enim Hilarius in hunc locum, & Ambrosius lib. 1. de Cain, cap. 2. dicunt, Mosē adhuc viuere, tamen contrarium expressè habetur Deuteron. vltimo, & Iosue 1.

Quòd ex Purgatorio apparuerint, sunt exempla apud Gregorium lib. 4. Dialog. cap. 40. & 55. & alios auctores supra citatos. Quòd denique ex inferno, probat multis exemplis Auctor librorum de proprietatibus apum, & idem apparet ex illa apparitione Doctoris Parisiensis in vita B. Brunonis, qui post triduum à morte dixit se condemnatum. Credibile est, animam illam mox à morte in infernum descendisse, sed tamen ter apparuisse, & PRIMÒ, manifestasse suam accusationem. SECUNDO, suum iudicium. TERTIO, suam damnationem, vt hoc modo pluribus innotesceret hoc exemplum.

Quantum ad TERTIUM, quòd aliqui ex Purgatorio vel limbo Patrum fuerint ad vitam reuocati, nulli dubium esse potest. Nam mortui, quos excitauit Helias, Helisæus, Dominus Christus, & Petrus, & Paulus, cum fideles fuerint, creduntur fuisse in Purgatorio, aut in limbo, neque vllum sequitur inconueniens, si ex his locis aliqui resurgant, siquidem hoc nihil aliud est, quam mutare illis exilium, vel carcerem. DICENS; iam erant, certi de sua salute, & per resurrectionem fient incerti. RESPONDET bene Abulensis quæst. 57. in 4. Regum, omnes eos, qui ex Purgatorio aut limbo Patrum in vitam reuocati fuerunt, sine dubio confirmatos fuisse in gratia, vt nullo modo petire potuerint, quia alioqui iniuria illis facta fuisset.

Quòd autem ex cælo, aut inferno damnatorum reuocari possent ad vitam, videretur incredibile, nisi extarent exempla, quæ negari non possunt. Nam B. Gregorius libro 1. Dialog. ca. 9. scribit, à S. Fortunato excitatum fuisse Marcel- lum quendam virum sanctum, qui ab Angelis in optimum locum ductus fuerat. Et c. 12. scribit, à S. Severo excitatum quendam virum pessimum, qui à Dæmonibus in infernum deducebatur. Egesippus scribit li. 3. ca. 2. B. Petrum excitasse affinem quendam Cæsaris Ethnicum à morte. Nec dubitati potest, quin

Apostoli aliquos Ethnicos excitarint. Maximus ferm. 2. de sancta Agnete, dicit, ab ea excitatum filium præfecti, qui in peccato mortali obierat. Et Euodius lib. 1. de miraculis S. Stephani, dicit, puerulum mortuum ante Baptismum, ad reliquias S. Stephani excitatum.

Dico igitur, beatos iam existentes non posse reuocari ad vitam; siquidem beatitudo includit certitudinem de non amittenda vnquam felicitate, vt B. Augustinus docet de corp. & gratia, cap. 10. & ratio est manifesta, quia beatitudo est status omnium bonorum aggregatione perfectus; non habet autem omnia bona, qui non habet illam certitudinem. Si igitur aliqui sancti viri redierunt ad corpus, non fuerunt beati, sed Deus præuidens eorum excitationem, distulit eorum beatificationem, & interim detinuit eos in optimo aliquo loco, vt accidit Marcello illi, de quo Gregorius loquitur.

De damnatis similiter dico, damnatum absolute ad pœnas æternas, non posse reuocari ad vitam, quoniam alioqui fieret incerta impiorum damnatio; & sanè B. Augustinus lib. 21. de ciuit. Dei, cap. 24. nimix præsumptionis esse dicit asserere, eos non mansuros perpetuò in igne, quibus Veritas dicit: *Ite in ignem æternum*; dicit autem hoc Veritas omnibus, quos damnat tam in particulari, quàm in vniuersali iudicio. Præterea nullus esset damnatorum, qui non posset sperare salutem, & pro quo non possemus orare. nunc enim non oramus pro infidelibus damnatis, quia secūdam fidem credimus eos non posse saluari; at si possunt saltem ex priuilegio saluari, certè pro illis orandum esset, sicut in hoc mundo oramus pro obstinatis in malo, vt Deus det illis gratiam efficacem, quæ certè non datur, nisi ex priuilegio.

SED obiicit Abulensis quæst. 57. in 4. librum Regum, ei, qui excitatur ab inferno damnatorum, non remittitur neq; culpa, neq; pœna per ipsam excitationem, neq; aliud miraculum hic necessarium est, quàm simplex mortui resuscitatio, ergo fieri potest, vt tales redeant. RESPONDEO, non remitti culpam, neq; pœnam, sed dari beneficium æquiualens, quia ponitur in statu, in quo poterit à culpa & pœna liberari; ex quo sequuntur omnia absurda supra dicta, quòd non erit certa

certa impiorum damnatio: quòd illi sperare poterunt: quòd licebit pro eis orare.

Ad illa exempla, quæ adferuntur, respondet Sotus in 4. dist. 45. quæst. 2. art. 2. omnes Ethnicos, quos Apostoli excitarunt, laborasse ignorantia inuincibili fidei, & proinde in Purgatorio fuisse.

At quid respondebit Sotus Ambrosio, qui serm. 90. & Maximo, qui serm. 2. dicunt, beatam Agnetem excitasse filium præfecti, quem Diabolus necauerat, cum voluisset ipsam virginem sanctam stuprare? Igitur dico, eos qui sunt excitati, cum mererentur pœnas æternas, nõ fuisse damnatos, sed suspensam eorum sententiam, & interim punitos secundum presentem iniustitiam, vt B. Thomas docet in 4. sent. dist. 45. q. 2. art. 2. quomodo etiam respondent Richardus, Durandus, & alij ibidem.

CAPVT NONVM.

De tempore, quo durat Purgatorium.

I AM VERO de tempore, quo Purgatorium permanebit, duo sunt errores extremi. PRIMVS error est Origenis, qui extendit tempora Purgatorij vltra diem resurrectionis; ita enim habet hom. 14. in Lucam: *Ego puto, inquit, quòd & post resurrectionem ex mortuis indigemus Sacramento eluente nos, atq; purgante, nemo enim absq; sordibus resurgere poterit.* Hic tamen est error exploratus; nam B. Augustinus lib. 21. de ciuit. Dei, cap. 16. *Purgatorias penas, inquit, nullas futuras opinetur, nisi ante illud solium tremendumq; iudicij.* Et ratio est, quia Dominus Matthæi 25. in iudicio solùm duos ordines hominum dicit futuros; vnum beatorum; alterum damnatorum.

DICE S; Anima non peccauit sola, sed simul cum corpore, igitur simul cum corpore purgari debet; proinde post resurrectionem homines purgabuntur. RESPONDEO, si argumentum concluderet, probaret etiam, animam separatam non posse puniri in inferno, nec voluptatibus in cœlo frui, contra Euangelium Lucæ 16. *Crucior in hac flamma.* Et Lucæ 23. *Hodie mecum eris in paradiso.*

Dico igitur, merito puniri animam etiam solam, quia ipsa est

est subiectum & causa efficiens peccati; nam sunt quedam opera hominum, quæ non possunt fieri nisi à toto composito, nec recipi, nisi in totum compositum, vt illa omnia quæ fiunt à potentiis organicis, vt loqui, videre, audire. &c. & talia dissoluto composito non inueniuntur amplius; & si quidem tale esset peccatum, argumentum planè concluderet. at non ita est; peccatum enim est actus liberi arbitrij, & idè à sola voluntate propriè fieri dicitur, & in sola voluntate fortè maliter inuenitur; dissoluto ergo homine, peccatum intergrè, & solùm reperitur in voluntate, & per illam in anima, nõ autem in carne mortua: ibi autem puniri vel purgari debet, vbi inuenitur.

Adde etiam, quòd caro suo modo quoque punitur; nam, vt anima separata punitur pœna damni, quia caret visione Dei, & pœna sensus, quia torquetur igne; ita caro punitur pœna damni, quia caret vita, & pœna sensus, licet impropiè, quia paulatim putrefit, & in cineres redigitur: tamen prior solutio est melior; nam etiam corpora Sanctorum hæc patiuntur, qui tamen purgatione non egent.

ALTER error est Lutheri, qui è contrario nimis breue efficit Purgatorium. Vult enim, omnes peccati reliquias dolore mortis purgari in iis, qui in fide moriuntur, & idè nullum aliud esse Purgatorium, præter mortem.

Hic error facile refelli potest; nam per reliquias peccatorum vel intelligitur fomes, vel mali habitus contracti, vel reatus pœnæ temporalis, vel peccata venialia; hæc enim sola & omnia remanere possunt in homine iustificato ex iis, quæ ad peccatum pertinent, & proinde reliquias peccatorum dici possunt. Ac primùm, fomes tollitur quidem in morte, quia tunc extinguitur sensualitas; sed non propter fomitem nos Purgatorium constituimus, alioqui etiam pueri baptizati morientes, deberent purgatorias pœnas pati, cum Baptizati eis non abstulerit fomitem. At Augustinus lib. 27. de ciuitate Dei, cap. 16. disertè docet, eiusmodi pueros nullas pati purgatorias pœnas. Mali autem habitus, qui in voluntate existunt, non necessariò extinguuntur per mortem; quantum quidem sunt in potentiis, quæ organo non sunt alligatæ, vt patet. Nec tamen propter huiusmodi habitus constituimus Purgatorium; nam alioqui sequeretur, adultos, qui post multos

multos malos habitus contractos baptizantur, & statim moriuntur, vel certè p̄ Christo occiduntur, non posse saluari nisi per Purgatoriū, quia nec Baptismus, nec Martyrium dissoluit eiusmodi habitus. Videmus enim baptizatos adhuc habere easdē malas propensiones, quas antea habebant, & oportere eos paulatim actibus contrariis eiusmodi habitus tollere.

Credibile igitur est, omnes istos habitus tolli per primum actum contrarium animæ separatæ, quem statim à separatione elicit. Et si enim hic non possit vno actu destrui habitus contractus per multos actus, tamen ibi poterit, quia actus ille multò vehementior erit, cū anima tunc sit potentior, quantum ad actus spirituales, nec habeat fomitem contrarium & resistentem, vt hic habet.

Restat ergo reatus pœnæ, & peccata venialia, quæ propriè dici possunt reliquiæ peccatorum, ob quas est Purgatorium. Has autem reliquias aliquando certum est in morte purgari, aliquando certum est non purgari, aliquando dubium est quid fiat, & probabilissimum est, partim purgari, partim non purgari.

Probo singula. Ac PRIMUM quidem, quia mors violenta pro Christo suscepta, quæ dicitur martyrium, sine dubio purgat omnes huiusmodi reliquias; Cyprianus enim lib. 4. epist. 2. clarè dicit, peccata omnia passione purgari: & quòd non loquatur de culpis mortalibus, patet, quia ibidem dicit, sine caritate nec martyrium quidquam prodesse; quod ante Cyprianum docuerat beatus Paulus in priori epistola ad Corinthios, cap. 13. Itaque Ecclesia nunquam orat pro Martyribus, quia, vt Augustinus dicit serm. 17. de verbis Apostoli: *Inuisum est orare pro Martyre, cuius nos debemus potius orationibus commendari.*

SECUNDUM probo, nam qui moriuntur inuiti, vel sine usu rationis, vt amentes & dormientes, & quos repentini casus opprimunt, non possunt ea morte vilo modo purgari; nam vel ipsa mors per se absolutè purgat, vel ratione alicuius voluntarij actus ipsam concomitantis. Non primum, quia mors secundum se est quid naturale, saltem post primiparentis peccatum, vnde communis est bonis & malis, immò hominibus & iumentis; at per naturalia, quæ necessario eueniunt, non meremur, nec demeremur, nec possumus

dissoluere debita voluntariè contracta; igitur si mors purgabitur hoc loco de illis, qui sine vllò eiusmodi actu moriuntur. Præterea, videmus sæpe optimos viros pati mortem durissimam, & minus bonos leuissimam, at si in morte deberent purgari reliquæ peccatorum, necessariò contrarium fieri deberet.

TERTIVM probo; nam multi sunt, qui æquo animo mortem tolerant propter sua peccata, quorum patientia sine dubio iuvat ad satisfaciendum, sed vtrum æquiualeant debita contracta per peccata, nemo certò scire potest.

Præter hos errores fuit opinio Dominici à Soto in 4. sent. dist. 19. q. 3. art. 2. neminem in Purgatorio manere ad decem annos; & ratio eius est, quia si hic in terris aliquibus pœnis breui tempore liberari possumus ab omni pœna, quare non multò citius in Purgatorio, cum illæ pœnæ sint pœnæ infinitum grauiores, & intensiores istis? Præterea, hic sunt prolixæ pœnæ, quia non possunt esse multum intensæ, nam subiectum destruerent; at post hanc vitam possunt esse intensissimæ, quia subiectum est incorruptibile: ergo credibile est, Deum illas animas ad gloriam anhelantes brevissimo tempore per intensissimas pœnas purgare. sed istæ rationes non concludunt.

Ad PRIMAM dici potest, hic esse tempus misericordiæ, illic iustitiæ.

Ad SECUNDAM dico, Deum posse compensare extensionem intensione, sed nolle, alioqui sequeretur, animas non manere in Purgatorio ad vnâ horam, quia potest Deus augendo intensiorem, redigere pœnas decem annorum ad vnâ horam.

Præterea, repugnant huic sententiæ probatissimæ visiones Sanctorum. Scribit enim Beda lib. 5. hist. cap. 13. cuidam ostensas fuisse Purgatorij pœnas, dictumq; illi esse, animas quæ in Purgatorio degunt, saluandas omnes in die iudicij, licet aliquæ orationibus & elemosynis viuentium, & præcipuè altaris sacrificio, iuuentur, vt etiam ante diem iudicij liberentur, vbi clarè indicat, aliquos iâ defunctos vsq; ad diem iudicij mansuros in Purgatorio. Similes visiones multas afferre possemus ex Dionysio Carthusiano, & ex aliis,

Repugnat etiam Ecclesie consuetudo, quæ anniuersaria
 hæc celebrat pro defunctis, etiamsi cõstet eos ante centum
 vel ducentos annos esse mortuos, quod certe non fieret, si
 Ecclesia crederet, non puniri animas vltra decem annos. Res
 igitur est incertissima, & non, nisi temerè, definiri potest.

CAPVT DECIMVM.

Qualis sit Purgatorij pœna.

DE PœNA Purgatorij quædam sunt certa, & quæ-
 dam dubia. PRIMO, certum est, Purgatorij pœnam
 non esse desperationem & merum Gehennæ, vt Lu-
 therus sentit; id enim iam refuratum est.

SECUNDO, certum est etiam, vnam Purgatorij pœnam
 esse carentiam diuinæ visionis; non enim possunt animæ illæ
 non dolere, quod videant se propter suas culpas impediri à
 fruitione summi boni; quæ vocatur pœna damni.

Certum est TERTIO, præter hanc pœnam esse etiam ali-
 quam aliam pœnam, quam Theologi vocant pœnam sen-
 sus, quæ cõsistit in aliquo dolore proueniente aliunde, quàm
 ex carentia visionis Dei; vt enim qui peccat, auertit se à sum-
 mo bono, & cõuertit inordinatè ad creaturas, ita postea pu-
 niri debet non solum carentia summi boni, sed etiam affli-
 ctione inflicta ab aliquo alio creato obiecto.

Certum est QUARTO, in Purgatorio, sicut etiam in infer-
 no, esse pœnam ignis, siue iste ignis accipiatur propriè, siue
 metaphoricè, & siue significet pœnam sensus, siue damni, vt
 quidam volunt. Quòd enim aliquis ignis sit in Purgatorio &
 inferno, patet tum ex illis verbis B. Pauli 1. Cor. 3. *Saluus erit
 quasi per ignem.* Et Marth. 25. *Ite in ignem æternum.* tum ex te-
 stimoniis Patrum citatis in primo libro; omnes enim ignem
 appellabant Purgatorij pœnam.

His certis positis, & in quibus omnes conueniunt, dubi-
 um est. PRIMO; An ille ignis sit propriè dictus ignis, an me-
 taphoricè? SECUNDO, si sit propriè dictus, quomodo possit
 agere in animas separatas? TERTIO, à quibus ministrentur
 istæ pœnæ, à Dæmonibus ne, an ab Angelis bonis, an per se
 agant? QUARTO, an ista pœna sit maior omnibus pœnis
 huius vitæ?

CAPVT XI.

Ignem Purgatorij esse corporeum.

VANTVM ad PRIMVM, communis sententia Theologorum est, verum & proprium esse ignem, & eiusdem speciei cum nostro elementari. Quae sententia non est quidem de fide, quia nusquam ab Ecclesia definita est, immò in Concilio Florentino Græci aperte professi fuerant, se non ponere ignem in Purgatorio, & tamen in definitione facta sessione vltima, definitur Purgatorium esse, nulla mentione ignis habita. Tamen est sententia probabilissima.

PRIMO, propter consensum Scholasticorum, qui non potest nisi temerè contemni.

SECUNDO, propter Gregorij auctoritatem lib. 4. Dialogorum, cap. 29. vbi disertè asserit, ignem, quo puniuntur animæ, esse corporeum. Neque obstat, quod lib. 15. cap. 14. moralium dicit, ignem Gehennæ esse incorporeum; est enim mendium scriptorum, qui posuerunt (incorporeum) pro (corporeum) vt patet ex sequentibus, dicit enim statim corpora literviere.

TERTIO, propter Augustinum, qui in eandem sententiam propendit lib. 21. cap. 10. de ciuit. Dei.

QUARTO, quia in Scriptura passim pœna impiorum vocatur ignis; & regula Theologorum est, vt verba Scripturarum accipiantur propriè, quando nihil absurdi sequitur.

QUINTO, quia corpora damnatorum puniuntur igne post resurrectionem, vt patet Matth. 25. *Ite in ignem æternum;* at corpora non possunt vri, nisi igne corporeo. Est autem idem ignis corporum damnatorum, & spirituum corpore vacantium; nam ibidem dicitur: *Qui paratus est Diabolo & Angelis eius.*

SEXTO, quia Sap. 11. dicitur; Per quæ peccat quis, per hæc & torquetur; sed homines peccant sæpe sensibilia oblectamenta inordinatè cupiendo, ergo puniri debent sensibilibus obiectis; ignis igitur quo puniuntur, sensibilis est.

SEPTIMO, id confirmatur ex eruptionibus ignis in monte Æthna, aliisque locis, de quibus diximus, cap. 6.

CAPVT XII.

Sciri non posse, quomodo ignis corporeus animas urat.

DE SECUNDO, verissima sententia est, non posse in hac vita sciri, quomodo ignis corporeus agat in animam incorpoream; id enim ingenue confitetur Durandus in 4. dist. 44. quæst. vlt. & ante Durandum B. Augustinus lib. 21. de ciuit. Dei, cap. 10. vbi dicit, animas torqueri ab igne miris, sed veris modis; & B. Gregorius, cum lib. 4. Dialogorum, cap. 29. dicit, ex igne visibili inuisibilem pœnam animas trahere; vocat enim inuisibilem pœnam, quia occulta & incognita est nobis. Sed licet non sciamus quomodo id fiat, posse tamen fieri, docet Augustinus ex alio simili; videmus enim animam incorporeâ vniri corpori humano, & ei vitam dare, & cum illo simul gaudere & pati, cum tamen modus huius vnionis sit planè ineffabilis? Quis capiat, quomodo spiritus sit forma corporis, cum inter corpus & spiritum nulla sit proportio? Sicut ergo potuit vniri spiritus carni, vt illi vitam communicaret, ita potest vniri spiritus igni, vt ab illo pœnam trahat, licet modus vnionis sit prorsus incognitus.

CAPVT XIII.

An in Purgatorio torqueantur animæ à Dæmonibus.

DE TERTIO dubio res est omnino incerta; nam quod non torqueantur à Dæmonibus, nec ab Angelis, sed à solo igne, docent Scholastici, vt D. Thomas in 4. dist. 20. art. 5. & rationem reddunt, quia omnes animæ Purgatorij in vltimo confictu Diabolum superarunt, idèd non decet iustitiam diuinam, vt sinat eas ab hoste deuicto vexari. Deinde, hic in terris etiam perfectos viros Dæmones vexant, quia sperant se posse eos ad peccatum pertrahere; at animas Purgatorij sciunt in gratia confirmatas non posse cadere, & vexationem illis

necessariò profuturam ad celeriore purgationem; nõ igitur credibile est, Dæmonum opera animas illas cruciari.

Ex altera parte, quoddã Dæmonibus torqueantur animæ Purgatorij, docent multæ reuelationes, vt illa beati Fursæi apud Bedam lib. 3. hist. cap. 19. & apud Dionysium Carthusianum lib. de quatuor nouissimis, & lib. 1. vitæ B. Bernardi, cap. 10. Maneat igitur & hoc inter secretã, quæ suo tempore nõ bis aperientur.

10

CAPVT XIV.

De grauitate pœnarum.



QUARTO, pœnas Purgatorij esse atrocissimas, & cum illis nullas pœnas huius vitæ comparandas docent constanter Patres. AVGVSTINVS in Psal. 37. *Quamuis, inquit, salus per ignem, grauior tamen erit ille ignis, quàm quidquid potest homo pati in hac vita.* GREGORIVS in Psal. 3. pœnitentialem: *illum, inquit, transitorum ignem omni tribulatione præfenti existimo intollerabiliorem.* BEDA in eundem Psalmum dicit, nulla esse supplicia martyrum, vel latronum cum illis purgatorij pœnis conferenda. Idem habet B. Anselmus in 1. Cor. 3. & B. Bernardus sermon. de obitu Humberti.

Idem probant omnes reuelationes, quæ apud Bedam lib. 3. & 5. historiarum, apud S. Birgittam, apud Dionysium Carthusianum, & in vita Christianæ mirabilis habentur.

Idem probat ratio, saltem de pœna sensus, nam tam ad dolorem, quàm ad gaudium tria concurrunt; potentia, obiectum, & coniunctio vnus cum altero. ³⁰ Tam quantum ad potentiam, sine comparatione capacior est doloris potentia rationalis, quàm animalis, nam quantum ad apprehensionem intellectus, est veluti fons, sensus veluti riuulus, quantum ad appetitum, voluntas est veluti fons, appetitus inferior est veluti riuulus. cum ergo anima ipsa nuda immediatè torqueatur, maximus debet esse ille dolor ex parte patientis; nunc enim non tam anima, quàm corpus torquetur, & per corpus aliquis etiam dolor ad animam transit.

Quantum ad obiectum, si ibi est verus ignis, erit omnino acerrimus; cum ad hoc solum sit institutus, vt sit instrumentum

tum

tum iustitiæ diuinæ; si non sit ignis verus, erit aliquid multò horribilius, quale Deus parare potuit, qui potentiam suam in hoc ostendere voluit.

Quantum ad coniunctionem, maxima erit; nam hic vbi sunt omnia corporalia, non fit coniunctio, nisi per contactum extremitatum, & superficierum, at ibi animam ipsam intimè pœna illa penetrabit.

Quamuis autem aliquo modo omnes admittant, pœnas Purgatorij esse maiores pœnis huius vitæ, tamen dubium est, quomodo hoc intelligatur; nam B. Thomas in 4. dist. 20. quæst. 1. art. 2. docet duo. PRIMO, pœnam damni esse maximam pœnarum, tam quæ in Purgatorio, quàm quæ in hac vita reperiri possint. SECUNDO, dicit, minimam pœnam Purgatorij esse maiorem maxima pœna huius vitæ.

PRIMUM probat, quia sicut possessio desiderati boni gignit gaudium, ita absentia desiderati boni gignit dolorem: Sed bonum, quod animæ Purgatorij desiderant, est summum, & desiderium etiam est maximum; intellectus enim clariùs cognoscit, quàm magnum bonum sit videre Deum, & appetitus tum naturalis, tum etiam infusæ caritatis exercit vires, & intensissimus est, nec impeditur à mole corporea, & sensibilibus delectationibus; vt in hac vita exempla dari possunt, vt si quis vehementissima fame vexaretur, vel arderet siti intolerabili, & videret ante se mensam instructam optimis cibus, dulcissimoque vino, nec posset quidquam attingere, & tamen sciret alioqui sibi parata illa omnia fuisse.

Probat deinde SECUNDUM D. Thomas, quia omnis, qui in Purgatorio degit, cruciatur saltem hac pœna damni, quæ est omnium maxima; ergo minima pœna Purgatorij est maior, quàm sit maxima pœna huius vitæ.

At B. Bonaventura in 4. dist. 20. art. 1. quæst. 2. docet PRIMO, pœnam damni in Purgatorio non esse maiorem omnium pœnarum, siue Purgatorij, siue huius vitæ. SECUNDO docet, Purgatorij pœnas esse maiores pœnis huius vitæ, solum in hoc sensu, quia maxima pœna Purgatorij est maior, quàm sit maxima pœna huius vitæ, licet aliqua pœna Purgatorij reperiat minor aliqua pœna huius vitæ. Quæ sententia mihi placet; nam licet absentia summi boni ex se generet in

amante summam tristitiam, tamen in Purgatorio mitigatur. hæc tristitia, & leuatur magna ex parte propter certam spem illius boni acquirendi; ista enim certissima spes affert incredibile gaudium, & quod magis propinquat finis illius exilij, tantò magis gaudium crescit. Itaque solùm in inferno poena damni est summa, quia est annexa desperationi certissimæ, & de hac loquitur Chrysostomus homil. 24. in Matthæum, cum mille Gehennas dicit nihil esse, si conferantur
 10 cum amissione diuini conspectus; & Augustinus, qui in Enchiridio, capite 112. dicit, minimam poenam damni, si tamen æterna sit, maiorem esse omnibus poenis huius vi-

DICES; At damnati non diligunt Deum, ergo non cupiunt videre. **RESPONDEO,** non diligunt Deum propter Deum, sed tamen propter seipso coguntur conspectum eius ardentissimè diligere, quia intelligunt in visione Dei consistere suum summum bonum.

Confirmatur hoc argumentum. **PRIMO,** quia si poena damni esset grauissima, etiam in Purgatorio, sequeretur, Patres in limbo passos fuisse grauissimam poenam: quod ad falsum est, vt Luca 16. dicat Abraham diuiti damnato de Lazaro: *Tu cruciarius, hic vero consolatur.* Et B. Augustinus epist. 99. negat, posse intelligi de S. Patribus illud Actor. 2. *Soluti doloribus inferni,* quia nimirum non in doloribus, sed in requie illos Christus inuenerit. Et B. Gregorius lib. 13. moral. cap. 22. dicit, Patres in inferno non tormenta vlla, sed requiem habuisse.

Confirmatur **SECUNDO,** quia Augustinus, Gregorius, Beda, Anselmus, & Bernardus, cum dicunt, poenam Purgatorij esse maiorem omni poena huius vitæ, disertè loquuntur de poena ignis, per quam intelligunt omnes poenam sensus, non damni.

Alterum dictum Bonauenture, probatur **PRIMO,** quia ex certis reuelationibus constat, aliquorum poenam esse tam exiguam, vt nihil pati videantur, quales sunt illi, qui albis vestibus induti, visi sunt in locis amœnis & lucidis, apud Bedam lib. 5. hist. cap. 13.

SECUNDO probatur, quia potest fieri, vt quis moriatur, nullum debitum secum ferens, nisi vnus verbi otiosi: at in-
 credi-

credibile videtur, propter vnum solum otiosum verbum pati debere aliquem supplicia grauiora omnibus pœnis huius vitæ.

TERTIO, quia licet sit quæstio; An pœna Purgatorij semper crucient æque grauiiter, ab initio vsque ad finem purgationis? An verò paulatim minuantur, donec finem accipiant? tamen probabilior sententia est, paulatim remitti; hinc autem sequitur, non quamlibet Purgatorij pœnam esse maiorem maxima pœna huius vitæ; nam pœna illa Purgatorij, quæ est prope finem, debet esse ad eum remissa, vt amplius remitti non possit; hic autem pœnæ inueniuntur intensissimæ, quæ plurimum remitti possent.

Quòd autem pœna Purgatorij paulatim remittatur, probatur; nam S. Bernardus in vita S. Malachie scribit, oranti Malachia pro sorore defuncta, ipsam de sanctam ter apparuisse. Primo, in veste nigra, & extra Ecclesiam. Secundo, in veste subfusca, & intra limen Ecclesie. Tertio, in veste alba, & ad ipsum altare cum ceteris Sanctis. Ex quibus ipse intellexit, animam sororis paulatim remittentibus se pœnis ad finem purgationis venisse. Et similes multæ visiones adferri possent.

CAPVT XV.

Suffragia Ecclesie defunctis prodesse.

QUATVOR explicanda sunt de suffragiis defunctorum. PRIMVM, an suffragia viuorum profint defunctis. SECYNDVM, quot sint genera suffragiorum. TERTIVM, à quibus fieri possint. 30
 QVARTVM, quibus profint.

De PRIMO, hæretici huius temporis omnes, & alij veteres, quos citauimus initio huius disputationis, negant, prodesse defunctis viuorum suffragia. Quòd autem profint, probari potest Scripturis, Conciliis, Patribus, & apparitionibus animarum, quæ omnia peri debent ex prima quæstione. Quibus addenda est ratio, quam tunc non attulimus, quia præsupponebat Purgatorium esse, quod nondum erat demonstratum.

Ratio

Ratio est Petri Cluniacensis in epistola contra Petrobrufianos: Ecclesia tota est vnum corpus, cuius caput est Christus, ergo debet habere communicationem tam capitis cum membris, quàm membrorum inter se; nam, vt dicitur 1. Corinth. 12. pro inuicem sollicita sunt membra, & si quid patitur vnum membrum, compatiuntur omnia membra. Sed iusti defuncti sunt membra huius corporis; nam sunt colligati nobiscum & cum Deo in fide, spe, & caritate. vnde B. Augustinus lib. 20. de ciuitate Dei, cap. 9. *Neque enim, inquit, pro-
rum anima defunctorum ab Ecclesia separantur, quæ est regnum Christi;* igitur viuentes possunt ac debent iuuare defunctos, vt membra eiusdem corporis. Præterea Christus, qui caput est, profuit viuens in terris viuentibus, mortuus mortuis, viuens mortuis, & mortuus viuentibus; ergo etiam decet, vt membra inter se ita agant, vt iusti viuentes viuentibus, mortui mortuis, viuentes mortuis, & mortui viuentibus profint.

Ac primum, quòd Christus viuens profuerit viuentibus, patet, quia remisit peccata Magdalene Lucæ 7. Paralytico 20 Matth. 9. Zachæo Luc. 19. Petro Luc. 22. Latroni Luc. 23, curauit etiam corporaliter plurimos, vt dicitur Marci 1. Actor. 10. & alibi. *QvOD* mortuus mortuis, patet; nam descendens ad inferos, soluit plurimos à doloribus inferni, vt dicitur Actor. 2. & simul aperuit sepulera, & multa corpora Sanctorum excitauit, Matth. 27. *QvOD* viuens mortuis, patet; nam pueliam in domo, adolescentem in via, Lazarum in sepulcro mortuos reuocauit ad vitam, Matt. 9. Luc. 7. Ioan. 11. *QvOD* denique mortuus viuus, patet; nam morte sua vitam nobis æternam promeruit, & nunc in cælo semper interpellat pro 30 nobis, & aduocatum nostrum agit, Hebr. 7. & 1. Ioan. 2.

Probatur TERTIO & vltimo; nam ex quatuor membris diuisionis, tria sunt certè manifesta, ergo & quartum debet habere locum; nam quòd viuentes iuuentur à viuentibus, nemo negat, cum videamus doceri, instrui, pasci verbo & Sacramentis alios ab aliis. & Iacobus dicit cap. 5. *Orate pro inuicem & saluemini.*

Quòd etiam mortui mortuis profint, patet; nam Heliseus mortuum alium suscitauit, 4. Reg. 13. & Abraham mortuus in sinum suum Lazarum mortuum recepit, Lucæ

Lucæ 16. Nec ulli dubium esse debet, quin Sanctorum defunctorum animæ cum Christo regnantes, orent pro Sanctorum animabus in Purgatorio laborantibus; cuius contrarium temerè asserit Dominicus à Soto lib. 4. sentent. distinct. 45. quæst. 3. artic. 2. nam præter Petrum Cluniacensem loco notato, B. Augustinus libro de cura pro mortuis, cap. 4. ad hoc dicit prodesse mortuis sepulturam in Basilicis Martyrum, vt qui recordatur mortui, simul recordetur Martyris, & eius precibus mortui animam commendet: & Ecclesia tota in illa oratione; Deus veniæ largitor, &c. supplicat Deo, vt B. MARIA intercedente, & omnibus Sanctis, animas defunctorum ad perpetuæ beatitudinis consortium peruenire concedat.

Quod autem mortui profint viuentibus, patet; nam 2. Machab. 15. legimus, Oniam & Hieremiam dudum defunctos, viros fuisse orare pro populo Iudæorum viuentium. Porro beneficia exhibita à sanctis defunctis, hominibus hæc viuentibus, innumerabilia & certissima sunt. Vide Augustinum lib. 22. de ciuitate Dei, cap. 8. & Theodoretum in libro de Martyribus. Non est incredibile, etiam animas Purgatorij pro nobis orare, & impetrare, quandoquidem anima Paschasij & S. Seuerini miracula operabantur, etiam si in Purgatorio degerent, vt patet ex Gregorio lib. 4. Dialogorum, cap. 40. & Petro Damiano in epistola de miraculis sui temporis.

Et quanquam S. Thomas in 2. 2. quæst. 83. artic. 3. contrarium docet, tamen ratio eius non conuincit; nam si animæ illæ non orant pro nobis, vel causa est, quia non vident Deum, vel quia sunt in maximis tormentis, vel quia sunt nobis inferiores, sed nihil horum dici potest. Non PRIMVM, quia tempore veteris Testamenti orabant Sancti defuncti pro viuis, vt patet ex lib. 2. Machab. cap. vlt. cum tamen nec illi viderent Deum.

Non SECUNDVM, quia diues in inferno orabat pro fratribus suis, Lucæ 16. cum esset tamen in maioribus tormentis, quam sint animæ in Purgatorio. Præterea Martyres in hoc mundo in tormentis constituti orabant pro se, & aliis, vt patet de S. Stephano, Actor. 7. Item dolor animabus non perturbat vlllo modo iudicium rationis, nec impedit affectum

ctum bonum voluntatis; ista enim nobis accidunt ratione
corporalium organorum, quibus illæ carent. Denique, non
videtur dubium, quin pro seipsis orent, non obstantibus tor-
mentis, ergo, &c.

Non etiam TERTIVM, quia in hoc mundo nos oramus
pro Episcopis & summis Pontificibus, qui sunt nobis superio-
riores, & etiam oramus pro illis, quos non dubitamus nobis
esse sanctiores, sicut orabant Christiani olim pro Apostolo
Paulo, qui eorum orationes petebat, Rom. 15. & alibi.

10 Præterea, animæ Purgatorij etiam si nobis sunt inferior-
res ratione pœnarum, tamen superiores sunt ratione gratiæ
& caritatis, in qua iam confirmatæ sunt; oratio autem, quæ
ex caritate procedit, hanc potissimum superioritatem requi-
rit, si ullam requirit, ergo probabile est eas pro nobis orare.
Sed quanquam hæc vera sint, tamen superfluum videtur ab
eis petere, ut pro nobis orent: quia non possunt ordinariè co-
gnoscere quid agamus in particulari, sed solum in genere
sciunt nos in multis periculis versari, sicut nos de illis solum
in genere scimus eas valde torqueri; nam nec rebus nostris
20 interfunt, ut probat B. Augustinus libro de cura pro mor-
tuis, cap. 13. nec in Deo orationes nostras vident, cum non
sint beatæ, nec est verisimile eis reuelari ordinariè, quid aga-
mus, vel petamus. Si ergo viui profunt viuis, mortui mor-
tuis, mortui viuis, cur non etiam prodesse poterunt viui
mortuis?

Supereest argumenta solvere, quæ restant, præter ea, quæ
fecimus in prima & secunda quæstione. Argumentum PRÆ-
MVM, Eccles. 9. *Viventes sciunt se morituros: mortui autem nihil
nouerunt amplius, nec habent ultra mercedem, nec partem in*
30 *hoc seculo in opere, quod sub sole geritur.*

RESPONDEO, loquitur Sapiens de bonis huius vitæ, &
vult dicere, mortuos non scire, quid agatur de rebus, quas
hic reliquerunt, nec posse illis uti propria actione, ut come-
dendo, bibendo, eleemosynas faciendo, &c. Ideò sequitur:
Vade ergo, & comede in lætitia, non tamen hinc concluditur,
quia a nobis iuuari possint.

SECUNDO, obiicit Calvinus præfatione institutionis
Ambrosii, qui lib. 1. de Abraham, cap. 9. *Docemus, inquit,*
Et non distinus in hære amnis mortuis, sed quantum satis est officij
defe-

deferamus. Hoc non faciunt, inquit Caluinus, qui perpetuam de mortuis sollicitudinem gerunt.

RESPONDEO, Ambrosium hic agere de luctu & pompa funeris, quam merito vult esse moderatam; quod autem non prohibeat sollicitudinem orandi pro defunctis, patet ex oratione ipsius de obitu Valentiniiani iunioris; nam in fine alloquens Gratianum & Valentinianum defunctos, ait: *Beati ambo, si quæ meæ orationes valebunt, nulla dies vos silentio præteribit, nulla nox non donatos aliqua precum mearum contextione transcurret, omnibus vos oblationibus frequentabo.* 10

TERTIO, obiiciunt Hieronymum, qui in cap. 6. ad Galat. exponens illud, Vnusquisque onus suum portabit: *Docemur, inquit, per hanc sententiam nouum dogma, quod latitat; dum in præsentis seculo sumus, sine orationibus, sine consiliis inuicem posse nos coadiuari: cum autem ante tribunal Christi uenerimus, non Iob, non Daniel, nec Noë rogare posse pro quoquam, sed unumquemque, portare onus suum.* Hæc autem Hieronymi sententia ab Ecclesia approbata uideretur, quippe quæ in decreto Gratiani can. In præsentibus, 13. quæst. 2. iam dudum relata est. 20

RESPONDEO, Hieronymum loqui de iis, qui mortaliter peccant, & sine pœnitentia moriuntur, ut Gratianus annotauit. Vel dicendum, Hieronymum loqui de nouissimo iudicio; quando cessante Purgatorio cessabunt etiam suffragia, & solum iudicis vltima sententia executioni mandabitur. Quod ita sit Hieronymus intelligendus, patet ex libro ipsius contra Vigilantium, ubi grauitè accusat Vigilantium, quod dixisset, posse nos orare pro inuicem dum uiuimus, post mortem autem nullius pro altero orationem audiendam. 10

QUARTO, ita ratiocinantur: Melius est per se, quam per alium satisfacere; minus enim beatur qui per alium, quam qui per se satisfacit, ergo non debemus orare pro defunctis, ne illis gloriam minuiamus.

RESPONDEO, in hac vita melius est per se satisfacere, quam per alium, quia dum satisfacimus, simul meremur gratiæ & gloriæ augmentum; at in Purgatorio, ubi animæ non possunt mereri, non est melius satisfacere per se, quam per alium.

QVINTO; Nescimus, inquit, ubi defuncti nostri sint, & scæpe dum putamus eos in Purgatorio esse, illi sunt in inferno, vel etiam in cælo, ergo frustra oramus.

RESPONDET Augustinus libro de cura pro mortuis, capite vltimo, melius esse, vt supersint suffragia iis, qui non egent, quàm vt desint iis, qui egent; sicut benefacimus iniustis in hoc mundo, ne prætereant iusti. Adde, quòd opus bonum nunquam est frustrà; nam est meritorium facienti, etiamsi nihil prodesset ei, pro quo fit.

10 SEXTO, Dei iustitia reddit mala pro malis, bona pro bonis, sed nemo patitur pro culpa alterius, quia non porrabit pater iniquitatem filij, Ezechiel. 18. nemo igitur debet frui bonis alienis.

RESPONDEO, neminem pro culpa alterius puniri, nisi particeps sit eiusdem culpæ, vel consensu, vel imitatione. De talibus enim dicitur Exod. 20. Deus punit peccata Patrum in filiis in tertiam & quartam generationem; quod intelligitur, quando filij imitantur parentes, vt exponit Hieronymus in cap. 18. Ezechiel. Augustinus in Psal. 108. Chrysostomus homil. 29. in Genes. & Gregorius lib. 15. moral. cap. 22. ita ergo non est absurdum, aliquem frui bonis alterius, si cum vtriusque consensu & voluntate fiat, vt hoc loco; nam animæ Purgatorij cupiunt iuuari, & nos volumus eas iuuare; præterea punire vnum pro alio, iniustitia est, ac acceptare bona vnius pro altero, misericordia & liberalitas est.

CAPVT XVI.

Quot sint genera suffragiorum.

30



VANTVM ad SECVNDVM, tria sunt genera suffragiorum: Sacrificium Missæ, Oratio, & opera quælibet pœnalia & satisfactoria, vt elemosina, ieiunia, peregrinationes, & similia. Porro distinguimus orationem ab operibus satisfactoriis, eùm tamen etiam ipsa sit satisfactoria, quia oratio duobus modis iuuat defunctorum animas; vno modo, vt opus quoddam pœnale & laboriosum, & hoc modo poterat comprehendì sub opere satisfactorio; alio modo iuuat, vt est impetratoria, quod

quod est ipsi orationi proprium; quomodo etiam Beatorum orationes profunt nobis, & animabus Purgatorij, licet satisfactoriæ non sint.

Ad hæc iuuantur etiam defuncti indulgentiis, sed ideo non faciunt illæ quartum genus suffragiorum, quia indulgentia nihil est aliud, quàm applicatio satisfactionum, seu pœnalarum operum Christi & Sanctorum, defunctis. Nam ideo dicuntur indulgentiæ concedi defunctis per modum suffragij, nõ per modum absolutionis; non enim potest Pontifex absolvere defunctos à pœnis, quomodo absoluit viuentes, quia illi non sunt ei subiecti, isti sunt; potest tamen tanquam summus dispensator thesauri Ecclesiæ comminicare illis bona opera pœnalia, quæ in thesauro sunt. sed de hac re alibi dicendum est. vide interim Caietanum tomo 1. opusculorum, tract. 16. quæst. 5. & 6.

Quòd hæc ita sint, patet ex testimoniis Patrum. AMBROSIVS de sacrificio & oratione pro defunctis, sic loquitur lib. 2. epist. 8. ad Faustinum de obitu sororis: *Non tam deplorandam quàm prosequendam orationibus reor, nec mastrificandam lacrymis tuis, sed orationibus animam eius Domino commendandam.* De eleemosyna autem agit in lib. 2. de excessu Satyri fratris, qui inscribitur, De fide resurrectionis; hortatur enim parentes, vt portionem hæreditatis, quæ ad filios mortuos pertinebat, spiritibus ipsorum per eleemosynas pauperum transmittant.

AVGVSTINVS serm. 32. de verbis Apostoli: *Orationibus, inquit, sanctæ Ecclesiæ, & sacrificio salutari, & eleemosynis non est dubium mortuos adiuuari.*

CHRYSOSTOMVS homil. 69. ad populum: *Non temerè ab Apostolis hæc sancita fuerunt, vt in tremendis mysteriis mortuorum fieret commemoratio, sciunt enim multam illis contingere utilitatem.* Idem hom. 41. in 1. ad Corinth. *Inuocatur mortuus non lacrymis, sed precibus, supplicationibus, eleemosynis.*

His adde Angeli testimonium apud Bedam lib. 5. histor. cap. 13. *Multos, inquit, preces viuentium, & eleemosyna, & ieiunia, & maxime celebratio Missarum, vt ante diem iudicij liberentur, iuuant.*

VNUM hic solum est dubium; An non etiam restitutio reialienæ proficit defunctis, ac proinde sit quartum genus suffra-

gij. Nam sæpe dicuntur animæ apparere, ac petere, vt restitutio pro ipsis fiat earum rerum, quas ipsi aut obliuisci sunt, aut non potuerunt restituere. & S. Birgitta lib. 6. reuelationum, cap. 66. affirmat, animam tamdiu cruciari, donec restituatur quod iniuste ablatum est.

Respondet Dominicus à Soto in 4. distinct. 45. quæst. 2. artic. 3. eiusmodi restitutionem non iuuare, si fiat; nec obesse defuncto, si non fiat; nam Deus non punit, nisi pro culpa propria in hac vita contracta; vel ergo defunctus peccauit non restituendo, vel non peccauit; si non peccauit, quia fortè non potuit, aut bona fide possedit, non debet etiam puniri; si autem peccauit, punietur pro culpa negligentia illius in Purgatorio; sed posteaquam pœnas debitas dederit, saluabitur, siue res illa restituatur, siue non; ille enim iam est factus impotens simpliciter ad restituendum, neque debet pendere salus eius ab alterius voluntate, alioqui posset anima in Purgatorio manere in æternum, si nimirum hæres nunquam restitueret; quare si restitutio possit fieri, & non fiat negligentia hæredis, peccabit quidem hæres, non tamen id nocet animæ; si verò fiat, nihil animæ illi proderit, quia restitutio non est satisfactio pro culpa; satisfactio enim est opus bonum pœnale, pœnale autem est dare suum, non restituere alienum.

Ad illas apparitiones respondeo, fortè animas non petere restitutionem, vt restitutionem, sed vt eleemosynam; licet enim non profit animæ, si restituat rem alienam is, qui tenetur restituere, tamen bene proderit, si restituat alius, qui non tenetur; illa enim eleemosyna quædam est, & proinde satisfactoria.

30

CAPVT XVII.

Quis possit animas iuuare.



VANTVM ad TERTIVM, qui potest suffragiis suis iuuare animas, est is, qui est iustus; homo enim iniustus, nõ potest pro se satisfacere, & multò minus pro aliis.

Sed obiciet; Nõne Missa mali Sacerdotis prodest defuncto?

functo? Nōne etiam si dominus iustus iubeat dari eleemosynas de suis rebus pro defunctis, & dentur postea à ministro iniusto, tamen eleemosynæ illæ proderunt? RESPONDEO, prodesse, sed non esse in his casibus ministrum iniustum, qui suffragatur, sed dominum iustum.

DICES rursus; quid si Prælati iustus iubeat, spirituales filios orare, vel ieiunare pro defunctis, & illi filij sint iniusti?

RESPONDET Paludanus in 4. sentent. distinct. 45. quæst. 1. prodesse illa omnia. Melius id negat Sotus ibidem quæst. 10. 2. artic. 2. Nam quando seruus de pecunia domini sui facit eleemosynam, illud opus propriè est domini, non serui, & idèd malitia ministri non vitiat opus; at dum subditus orat, vel ieiunat, opus propriè est ipsius subditi; ipse enim suo labore operatur, non labore domini sui. vnde B. Hieronymus libro contra Vigilantium, dicit, melius esse dare eleemosynam pauperi iusto, quàm iniusto, quia ille orans pro benefactore, exauditur, alter non exauditur.

CAPVT XVIII.

Quibus profint suffragia.



VANTVM ad QVARTVM, certum est, Ecclesiæ suffragia non prodesse beatis, nec damnatis, sed solum iis, qui in Purgatorio degunt; quia priores non egent, posteriores non possunt iuari; id quod docent omnes Scholastici in 4. distinct. 45. sequuti Augustinum, qui in Enchiridio, cap. 110. & de cura pro mortuis, cap. 1. dicit, Ecclesiæ suffragia pro valde bonis gratiarum actiones esse, pro non valde malis propitiationes, pro valde malis nulla esse adiumenta mortuorum, sed qualescunque viuorum consolationes.

At sunt in contrarium tres difficultates. PRIMA, de beatis. Videtur enim falsum, quod beatis non profint suffragia; nam Epiphanius hæresi 75. & Cyrillus catechesi 5. mystagogica, & Chrysostomus in sua liturgia, dicunt, sacrificium offerri Deo pro Apostolis, Martyribus, Prophetis, &c.

KKKKK 2

Præ

Præterea SECUNDO, Ecclesia in orationibus de Sanctis sepe legit: *Sumpsimus, Domine, sancta mysteria, quæ sicut Sanctis tuis profunt ad gloriam, ita nobis, quæ sumus, proficiant ad medelam.* Et in antiquis Missalibus, ut testatur Innocentius III. cap. Cùm Marthæ, extra de celebratione Missarum, in die S. Leonis, dicebatur: *Annue, quæ sumus, Domine, et anima B. Leonis hæc profuit oblatio.* Et licet hæc oratio mutata sit, tamen adhuc hodie in secreta oratione in eodem festo dicitur: *S. Leonis Confessoris tui atq; Pontificis annua solemnitas nos tibi reddat acceptos, et per hæc pia placationis officia, et illum beata retributio comitetur, et nobis gratia tua dona conciliet.*

Præterea CHRYSOSTOMVS homil. 33. in Matth. exhortans ad eleemosynas pro defunctis filiis: *Putas, inquit, eum maculis inquinatum da illi sua, et illis se à maculis detergat: putas in iustitia decessisset pro te ipsa tua, ad mercedis et retributionis adfectionem.*

AD PRIMUM facilis est responsio; sacrificatur enim pro Sanctis, non ut eis aliquid petamus, sed ut pro gloria illis collata Deo gratias agamus. id enim est, quod Augustinus dicit, pro valde bonis gratiarum actiones esse.

Ad reliqua respondet Innocentius, ubi supra dupliciter. PRIMO, cùm Ecclesia petit gloriam Sanctis, qui regnant caelorum iam possident, non petere, ut illi in gloria crescant, sed, ut apud nos gloria eorum crescat, id est, ut toti mundo gloria eorum innotescat, & illi ubique magis & magis glorificentur. SECUNDO dicit, non videri absurdum, si petamus illis augmentum gloriæ alicuius accidentalis. Adde TERTIO, fortasse peti gloriam corporis, quam habebunt in die resurrectionis. nam etiam si gloriam illam certò consequentur, & debetur eorum meritis, tamen non est absurdum hoc illis desiderare & petere, ut pluribus modis debeat. Cùm ergo Augustinus dicit serm. 17. de verbis Apostoli, iniuriam facere Martyri, qui orat pro Martyre, intelligitur de illis, qui Martyri precantur remissionem peccati, vel gloriam essentialem, quasi illa careret.

SECUNDA difficultas est de damnatis. Nam Augustinus Enchirid. cap. 110. dicit: *Quibus autem profunt suffragia, aut illi hoc profunt, et plena fiat remissio aut tolerabilior sit ipsa damnatio.* Et cap. 112. sic ait: *Pœnas damnatorum certis temporum in-*
serualia

teruallis existiment, si hoc eis placet, aliquatenus mitigari, dummodo intelligatur in eis manere ira Dei, hoc est, ipsa damnatio.

Item CHRYSOSTOMVS homil. 3, in epistola ad Philipenses, posteaquam dixerat orandum pro defunctis, subdit: *Verum istud quidem de illis dicimus, qui in fide abscesserunt, Catechumeni vero neque hac digni consolatione censentur, sed omni huiusmodi sunt auxilio destituti, præter unum solum, quod autem illud? pauperibus eorum nomine dare licet, unde eis nonnihil refrigerij accedit.*

Præterea DAMASCENVS in oratione de defunctis, non solum refert de Traiano & Falconilla liberatis ex inferno per orationes Gregorij & Theclæ, de quibus supra diximus, sed etiam addit ex historia Palladij ad Laufum, S. Machario aliquando percontanti cranium aridum cuiusdam idololatæ, an eis prodesse preces viuentium, responsum fuisse ex cranio: *Quando pro mortuis offers preces, nos interim aliquid leuamenti sentimus.*

Præterea PRUDENTIUS in Hymno de nouo lumine Patris Sabbarthi ait:

*Sunt & spiritibus saepe nocentibus
Pœnarum celebres sub stigeferis, &c.*

Denique INNOCENTIUS III. cap. Cùm Marthæ, ponit quadrimembrem diuisionem; dicit enim, ex mortuis quosdam esse valde bonos, qui non egent suffragiis; quosdam valde malos, qui non possunt iuari; quosdam mediocriter bonos, quibus suffragia profunt ad expiationem; quosdam mediocriter malos, quibus profunt ad propitiationem; at certè vltimum membrum non videtur conuenire, nisi pueris in limbo. Si enim valde boni sunt in cælo, valde mali sunt in Gehenna ignis, mediocriter boni in Purgatorio: vbinam erunt mediocriter mali, nisi in limbo? ergo illis profunt suffragia, cùm tamen in Purgatorio non sint.

Respondeo ad PRIMVM, Augustinum per tolerabiliorem damnationem intelligere mitigationem pœnarum Purgatorij, vt patet ex præcedenti trimembri diuisione.

Ad SECUNDVM dico, Augustinum ibi non agere de oratione pro defunctis, & solum dicere, non esse erroneum concedere, damnatos puniri citra condignum, quod clariùs docet lib. 21. de ciuitate Dei, cap. 24.

Ad TERTIUM, Chrysoſtomus ſolum videtur negare orandum eſſe publicè, vel ſacrificandum pro Catechumenis, vt etiam aliquando definiuit Concilium Bracarenſe l. canon. 35.

Ad QUARTUM, B. Thomas in 4. diſt. 45. artic. 2. quaſt. 2. poſt reſutatas ineptas ſolutiones Præpoſitiui, Porretani, & aliorum, reſpondet, animas damnatorum orationibus Sanctorum non percipere veram aliquam pœnarum mitigati-
 10 nem, ſed ſolum inane, & fallax aliquod gaudium, quod ni-
 mirum videant ſe habere ſocios in pœnis, quale eſt gaudium Dæmonum, cum aliquem decipiunt. At fortasſe melius reii-
 cerentur, vt falſa & apocrypha, quæ afferuntur de illo cranio; non enim in libro Palladij tale aliquid inuenitur, nec eſt ve-
 riſimile, S. Macharium orasſe pro infidelibus.

Ad QUINTUM nihil aliud dico, niſi more poëtico luſiſſe Prudentium.

Ad VLTIMUM, quod multos torquere ſolet, ſuſpicio Innocentium III. memoria lapſum putasſe diuiſionem, quæ
 20 eſt apud Auguſtinum trimembris, fuiſſe quadrimembrem; nam apud Auguſtinum iidem ſunt mediocriter boni, & me-
 diocriter mali. Innocentius autem diſtinguit hoc mem-
 brum in duo, dicens: *Alij ſunt mediocriter boni, alij mediocri-
 ter mali;* poſſumus tamen dicere, mediocriter bonos dici, qui
 nullam habent culpam, ſed tamen habent reatum pœnæ; mediocriter malos dici eos, qui habent culpam aliquam, ſed
 venialem tantum.

TERTIA difficultas eſt de animabus Purgatorij. Nam
 Theologi conueniunt in duobus, & in vno non conueniunt.
 30 Conueniunt PRIMO, quod ſuffragia omnia profint omni-
 bus, ſaltem quatenus adferunt nouum gaudium. id enim
 commune eſt omni bono operi, vt de illo gaudeant omnes
 boni, iuxta illud Pſalmi 118. *Particeps ego ſum omnium iumen-
 tium ſc.*

SECUNDO conueniunt, quod ſuffragia communia, quæ
 ſunt pro omnibus defunctis, profint etiam omnibus anima-
 bus Purgatorij, non ſolum in ratione gaudij, ſed etiam in ra-
 tione ſatisfactionis, nulla enim eſt cauſa cur aliqui exclu-
 dantur.

At dissentiunt de suffragiis particularibus. Nam Caietanus in tomo 1. opusculorum tract. 16. quæst. 5. docet, omnes quidem animas iuari posse, & iuari etiam communibus suffragiis: at particularibus, quæ pro illis fiunt, non iuari nisi illas, quæ peculiariter meruerunt, vt sibi talia prodesse; dicit autem eas peculiariter mereri, quæ hic in terris habuerunt specialem deuotionem ad claues Ecclesiæ, & solliciti fuerunt pro animabus aliorum; & probat ex Augustino libro de cura pro mortuis, cap. 1. & in Enchirid. cap. 109.

Alii verò, quos citat B. Thomas in 4. dist. 45. quæst. 2. art. 10. dicebant suffragia, quæ fiunt pro vno, non ei solum prodesse, verum etiam omnibus aliis, nec minus aliis, quam illi, sicut lucerna accensa pro domino, æqualiter illuminat seruos, qui in eodem loco sunt.

Sententia communis est in medio, quod nimirum suffragia particularia, omni & soli illi profunt in ratione satisfactionis pro quo fiunt. Quod *omnis* contra Caietanum, patet, quia fundamentum communicationis suffragiorum non est aliquod peculiare meritum, sed status gratiæ. S. enim Augustinus cum dicit solis illis prodesse suffragia qui meruerunt vt sibi prodesse possint, per exclusiuam, solis, non excludit vllas animas Purgatorij, sed animas damnatas. & notandum, diligenter Augustinum in Enchiridio non dicere suffragia iuare illos defunctos qui meruerunt vt sibi prodesse sent, sed qui meruerunt vt sibi prodesse possent.

Quocirca Caietanus, qui dicit omnes animas iuari posse, sed de facto non iuari, non habet pro se Augustinum, vt ipse arbitratur. Quod autem hæc suffragia particularia soli illi profunt, pro quo fiunt, patet; nam applicatio eiusmodi bonorum pender ex intèctione applicantis, nec debent comparari ista suffragia luminilucernæ, sed potius pecuniæ, quæ soluitur ab vno pro altero.

Notandus est etiam locus Augustini pro hac sententia ex libro de cura pro mortuis, cap. 4. vbi dicit idèd Ecclesiam orare interdum pro defunctis omnibus in genere, vt quibus defunt parentes vel amici, qui pro eis orent, & proinde remanent auxilio destituti, habeant saltem auxilium à communi matre, quæ est Ecclesia.

CAPVT XIX.

De funere.



DIXIMVS hætenus de spiritibus defunctorum: Nunc de sepultura corporum dicendum est. Hæretici huius temporis non reprehendunt ipsam sepulturam: reprehendunt tamen multa circa sepulturam.

10 **PRIMO**, quòd in locis sacris sepeliamus, atque ad hoc erigamus cœmeteria. Hoc reprehendunt hæretici aliqui in Boëmia apud Æneam Syluium de origine Boëmorum, cap. 35. & potest afferri argumentum, quòd nihil profit locus sepultura, ex illis verbis Luca 12. *Ne terre amini ab his, qui occidunt corpus, & post hæc non habent amplius quod faciant.* Item ex capite Sacris, extra de sepulturis, vbi dicitur nihil obesse hominibus piis sepulturam vilem, aut nullam. Item ex Augustino lib. I. de ciuitate Dei, cap. 12. & libro de cura pro mortuis, vbi dicit, sepulturam & funeris pompam solatia esse viuorum, non mortuorum præsidia.

SECUNDO, reprehendunt vsum cereorum, & quia in Concilio Elibertino can. 34. statutum fuit, ne cerei de die in cœmeteriis accenderentur: *Non enim spiritus defunctorum, inquiunt Patres, inquietandi sunt.*

TERTIO, reprehendunt anniuersaria, & tot repetitiones exequiarum die 3. 7. & 30. quia signum est dissidentia, easdem preces toties iterare; & præterea quia B. AMBROSIVS lib. I. de Abraham, cap. 9. super illud Genes. 23. surrexit **30** Abraham ab officio funeris: *Docemur, inquit, ut non diutius inhareamus mortuis, sed quantum satis est officij deferamus.* Quem locum expendens Caluinus præfatione instituit, dicit ab Ambrosio reprehèdi eos, qui nullum finem faciunt orandi pro mortuis.

QUARTO, reprehendunt quòd putemus sepulturam esse opus meritorium, & Deo gratum, cum tamen nullam inueniatur à Deo mandatum; immò Dominus Matthæi 25. enumerans opera misericordia non meminerit sepultura.

His non obstantibus asserimus, sepulturam rem esse bonam, & vtilem, & ritus omnes Ecclesiæ in sepeliendis mortuis esse antiquos, & sanctos. Quod sit res bona, & meritoria, probatur ex illo 2. Regum 2. *Benedixit eos à Domino, quia fecisset misericordiam hanc cum domino Sestro Saul, & sepelisset eum, & nunc retribuet vobis Dominus.* Tobia 12. Angelus extollit inter alia opera Tobia quod mortuos sepelierit. Matt. 26. *Opus bonum operata est in me, mittens enim unguentum hoc ad sepeliendum me fecit.*

Quod sit res antiqua & vtilis, facile demonstrari potest; 10
nam omnia quæ nunc in Ecclesia seruamus, semper in vsu Ecclesiæ fuerunt. PRIMVM, corpora mortuorum nunc lauantur, id etiam olim fiebat, vt patet Actor. 9. de Tabitha, & apud Gregorium lib. 3. Dialogorum, cap. 17. & lib. 4. cap. 16. & 27.

SECUNDO, corpora cum honore, & multitudine comitantium deferuntur ad sepulcrum. ita etiam legimus factum olim Gen. 50. & Luc. 7. & apud Gregorium Nazianzenum orat. 2. in Iulianum, Sulpitiu in vita S. Martini, Hieronymum in vita S. Fabiolæ, & S. Paulæ, & alios. 20

TERTIO, corpora fidelium in templis, & locis sacris sepeliuntur; ita olim Iacob & Ioseph Patriarchæ in terra Ægypti mortui, in terra promissionis sepeliri voluerunt, vnde Christus erat nasciturus, & vbi templum Domini futurum erat, Genes. 49. & 50. DEINDE temporibus Christianorum, corpora fidelium in templis sepulta fuisse testantur Ambrosius lib. 1. de Abraham, ca. 9. Hieronymus in vita Paulæ & Fabiolæ, Gregorius lib. 3. Dialogorum, cap. 13. & Augustinus libro de cura pro mortuis, cap. 1.

QUARTO, corpora fidelium cum hymnorum, & psalmo- 30
rum cantu sepelienda, testantur Gregorius Nazianzenus orat. 2. in Iulianum, Chrysostomus hom. 4. in epist. ad Heb. Hieronymus in vita S. Pauli Eremitæ, & S. Paulæ viduæ, & S. Fabiolæ, Sulpitius in vita S. Martini, & omnium antiquissimus Dionysius Arcopagita, cap. 7. de Ecclesiastica hierarchia.

QUINTO, ad funus fidelium lampades & cerei accendi adhibebantur, vt nunc etiam fit. Nyssenus epist. ad Olympiam de obitu sororis, Nazianzenus & Chrysostomus locis notatis,

tatis, Hieronymus in vita Paulæ, & Theodoretus lib. 5. *historia*, cap. 36. & alij.

Sexto, sacrificium altaris pro eis offertur, ita etiam olim testibus Tertulliano lib. de corona militis, Cypriano lib. 1. epist. 9. Augustino lib. 9. Confessionum, cap. 12. Ambrosio oratione de Valentiniani obitu, & aliis.

Septimo, non solum cum sepeliuntur, sed etiam die anniuersaria, p defunctis offertur, & oratur, vt patet apud Tertullianum lib. de Monogamia, & Gregorium Nazianzenum
10 oratione in Cæsarium fratrem.

Octavo, non solum die anniuersaria, sed etiam die 3. 7. & 30. vt est apud Ambrosium oratione de obitu Theodosij initio, id quod etiam nunc seruatur.

Nono, eriguntur tituli, idem olim Gen. 37. Actor. 2. 1. Machab. 13.

Decimo, dantur eleemosynæ pauperibus, idem olim Chrysostomus hom. 32. in Matth.

At quæ sit huius rei utilitas, pauld obscurius est. at que imprimis reiciendi sunt duo errores, quos reicit D. Augustinus libro de cura pro mortuis, cap. 2. **Vnus**, quo Ethnici putabant sepulturam esse necessariam, vt animæ requiescere possent, iuxta fabulas Virgilij 6. *Æneidos*. **Alter** est, quo quis putare posset in corporibus defunctorum adhuc sensum aliquem inesse.

His reiectis erroribus, dicimus multiplicem esse utilitatem sepulturæ, tam viuus, quàm defunctis: & viuus quidem quadruplicem. **Primam**, quòd per sepulturam arceatur fœtor & horror cadauerum, quæ non parum viuus nocerent.

30 **Secundam**, quòd eo studio testantur viui fidem resurrectionis, & immortalitatis animarum; nō enim tam diligenter corpora mortuorum curaremus, nisi putaremus ea resurrectione. Neque cereos accenderemus, nisi animos viuere post mortem corporum significare vellemus.

Tertiam, quòd admoventur propriæ mortis, vnde etiam tumuli defunctorum monumenta dicuntur.

Quartam, quòd eo officio satisfaciant viui aliquo modo affectui suo quo mortuos prosequantur; si enim vestes, & anulos amicorum bene collocari volumus, certè multo magis

magis corpora. & hoc est quod Augustinus dicit, cum ait, sepulturae pompam solatia esse viuorum.

Porro mortuis ex sepultura, alia quadruplex accedit utilitas, PRIMAE, quod consulitur honori eorum, adhuc in hominum memoriis uiuentium; non enim caret ignominia quadam, quod fecerit nostri corporis aliorum conspectibus patet; quocirca non leuis poena iudicatur, cum quis à iudice priuatur sepultura, & iubetur in patibulo, aut rota pendens, esse auium esca.

SECUNDA, quod satisfat desiderio eorum, quod dum uiuentem habuerunt; nemo est enim qui carnem suam odio habeat, ut dicitur Ephes. 5. & idè quisque dum uiuit cupit etiam post mortem corpus suum honestè tractari; immò credibile est, animos corpore solutos, etiamsi fortè nesciant quid corporibus eorum accidat, tamen cupere ut honestè habeantur, sicut etiam cupiunt ad ea reuerti, ut Augustinus docet lib. 12. de Genes. ad literam, cap. 35. atque hinc uidemus Prophetam inobedienti datum in poenam, ut non sepeliretur cum patribus suis, 3. Regum 13.

TERTIA utilitas nascitur ex eo, quod à multis deducuntur ad sepulcrum; hinc enim per accidens fit, ut à multis procioretur.

QUARTA, ex eo sumitur, quod in templis Sanctorum sepulcrum habent; inde enim fit, ut eorum amici, cum eorum recordantur, simul etiam recordentur eius Sancti, in cuius templo sepulti sunt, & frequenter eius patrocinio eos commendent. Hanc utilitatem ponunt D. Augustinus libro de cura pro mortuis, cap. 4. & 5. & D. Gregorius lib. 4. Dialogorum, cap. 50.

Ex his ad argumenta responderetur. Ad PRIMVM dico cum; Augustino lib. 1. ciuit. Dei, ca. 12. Dominum loqui de dolore, quo affici possunt corpora dum uiuunt. idè enim ait: *Post haec non amplius habent quid faciant*; quia corpus mortuum etiamsi secetur, aut lanietur, aut cremetur, nihil planè doloris sentit. Hinc tamen non sequitur, non esse aliquam eleemosynam, satisfacere desiderio hominis, quod habuit dum uiuere, & quod fortè adhuc habet, ut corpus suum sepeliatur. SECUNDO dico, loqui Pontificem in ea decretali de utilitate ad salutem aeternam, ac docere, nec per se prodesse sepulturam,

nec per se obesse ad salutem consequendam, quamquam per accidens prodesse potest, ut diximus, ratione precum amicorum. TERTIO, idem dico, Augustinus enim solum docet, sepulturam per se non esse præsidium mortuorum, ad vitam æternam consequendam, sed solatium viuorum: tamen quod per accidens proficit, ipsemet docet ibidem.

AD ALIUD ex Concilio Elibertino, respondeo, in eo Concilio reprehendi, & prohiberi eam carimoniam, quia fiebat ex superstitione Gentilium, qui putabant corpora mortua sentire aliquid; illo autem errore sopito, non est malum eadem carimonia uti ad alium finem, nimirum ad significandum animas viuere, & suo tempore etiam corpora resurrectura, & nostros defunctos esse filios lucis, non tenebrarum. Quod autem Concilium dicit, non esse inquietandos spiritus defunctorum, non significat spiritus illos reuera inquietari, sed displicere illis eiusmodi errorem; quomodo Ambrosius dicit lib. 2. epist. 8. non debere mortificari lacrymis animam sororis defunctæ.

AD TERTIUM dico, non esse signum diffidentia, sed desiderij, & feruoris, repetere easdem preces; id enim fecit Paulus 2. Cor. 12. ter Dominum rogauit; & Dominus ipse Matthæ 26. ter eandem orationem repetiuit.

Ad Ambrosium supra respondimus, ca. 15. non loqui eum de orationibus, sed de fletu, & dolore; nam ipse idem oratione in Valentinianum dicit: *Beati ambo, si quis mea oratione valebunt, nulla dies vos silentio præteribit, nulla nox non donatos aliqua precum mearum contextione transcurret, orationibus vos & oblationibus frequentabo.*

AD VLTIMUM ex Euangelio Matth. 25. responderetur. PRIMO, cum Chrysostomo homil. 84. in Ioannem, ubi dicit, Dominum non addidisse, mortuus fui, & sepelivisti me, quia sponte sua homines non solum hanc elemosynam facere solent, sed etiam nimium in ea facienda excedere; sicut enim in aliis bonis rebus, ita etiam in hac abusus quidam se admiscuit, quo diuites preciosis vestibus induti sepeliri solent; melius enim esset, & mortuis multo gratius, & vtilius, ut Chrysostomus ibidem dicit, precium illarum vestium dare pauperibus pro anima eius qui sepelitur. Dominus igitur, tum ut abusus corrigeret, tum quia necesse non videbatur hoc

hoc officium valde commendare, hanc eleemosynam cum
meritis non numeravit.

SECUNDO, dici posset, Dominum non meminisse huius
eleemosynæ, quia est omnium minima, & obscurissima, ut
Augustinus docet libro de cura pro mortuis, capit. 3. vo-
cabat enim Dominus ostendere, se iustè remuneraturum bo-
nos, & damnaturum malos; & idè solùm eorum operum
meminit, quæ euidenter, & omnium iudicio sunt
opera misericordiæ. Atque hæc de
tota hac disputatione
sufficiant.

Finis sexta Controuersie generalis.

PLAUS DEO, VIRGINIQVE MATRI MARIE.

E R R A T A.

Folio 15. Vers. 9. infallibili. 46. 3. exeundum. 33. 33. non redundat.



